

ASO LULU, 22 IUNI 2016

Na tauaofia le Fono Aoao Faitulafono i le itula e 9:00 i le taeao e tusa ai ma le Polokalame o Fonotaga a le Palemene 2016.

Na nofoia le Nofoa e le Fofoga Fetalai i le itula e 9:00 i le taeao.

Tatalo.

FOFOGA FETALAI: Ou te faasilasila atu ua toe amataliaina nei Taulumaga a le Fono Aoao Faitulafono.

FAASILASILAGA MAI LE TAITAI O LE MAOTA

Na fofogaina e le Fofoga Fetalai le Faasilasilaga mai le Taitai o le Maota.

E tusa ai ma le Tulafono Tumau 76 a le Palemene ua tuuina atu nei le Faaaliga i le Fono Aoao Faitulafono mo le iloiloina o Tulafono Tau Faaofi ua faaaliga iinei:-

1. Tulafono Tau Faaofi o Tagata e Suesueina Mafuaaga Lilo o Maliu 2016.
2. Tulafono Tau Faaofi o Teuteuga o le Tulafono o Fono a Nuu 2016.
3. Tulafono Tau Faaofi o Teuteuga o le Tulafono o Tulaga o Tagatanuu 2016.
4. Tulafono Tau Faaofi o le Kampani a le Landing 2016.
5. Tulafono Tau Faaofi o Teuteuga o le Tulafono o le Gaumativa 2016.

TUUINA ATU i lenei aso 20 Iuni i le tausaga 2016.

**(Sainia): Susuga Hon. Tuilaepa Auelua Fatialofa Lupesoloai
Lolofietele Aiono Neioti Galumalemana Dr. Sailele
Malielegaoi.
TAITAI O LE MAOTA.**

22 IUNI 2016

SAUNOAGA FAAFEILOAI A LE FOFOGA FETALAI

FOFOGA FETALAI: O paia ma mamalu faalupe o Samoa, o le a le toe paopaoina faatupe e fai ai -ai o le taulafoga, aua e le o ni sa e toe avea pe toe aufagaina pe tapueina faalaaui toto. O paia lava e tumau, aua o Samoa o le atunuu tofi. Ua popo foi ona paia ma mamalu maualuga i le Atua, ma Lana Talalelei.

Ae avea ia lenei avanoa ou te faatalofa atu ai ma le agaga faaaloalo i lau Afioga i le Taitai o le Malo i lau Afioga i le Palemia, le Sui Palemia ma le Kapeneta, Minisita Lagolago ma le mamalu o le Palemene.

Ou te faatalofa atu foi i le mamalu o Faauluuluga o Matagaluega ma Faalapotopotoga a le Malo i lenei taeao. Avea foi le leo faatauavaa e fai ma sui o lenei Palemene, tatou te faatalofa atu ai aua le faafofoga mai a Samoa, i le afio o Lana Afioga Mamalu, O Le Ao le Malo, afifio o Sui o le Fono a Sui Tofia, le afio o le Faamasino Sili faapea alii ma tamaitai o le faamasinoga, o le paia lava lea aua taitai o ekalesia ma Feoi o le Talalelei. O le paia lava lea aua Aiga ma Tama, o Tama ma Aiga, o le Usoga ia Tumua ma Pule, o Ituau ma Alataua, Aiga i le Tai ma le Vaa o Fonoti. e faapea foi le tapuaiga mamalu o le Aufaigaluega paia a le Atua o lo o faapena ona faanonomanu aua se manuia o Samoa ma lenei Palemene. Ae tapuai maia ma le manuia ae se i alofaiva lau Palemene aua lana fonotaga.

Ua faapea foi ona tatou faatasi ma nisi o sui o alo ma fanau i aoga maualuluga latou te molimauiina ma mataituina ia galuega a le Fono Aoaofa Fautulafono. Ou te faatalofa atu i le paia o pule aoga ma aiga faiaoga aemaise o alo ma fanau.

TUUIINA ATU O PEPA

Na tolaulauina e le Failautusi Pepa nei ua faataatia i luga o le Laulau a Fono e tusa ai ma le Tulafono Tumau 48.

1. S.R. 2016/4, Tulafono Faatonutonu o le Komesina o Sulufaiga (Ombudsman) Vaega o Suesuega Faapitoa) 2016.
2. P.P. 2016/2017 Nu. 28, Lipoti a le Faamasinoga Sili i le Talosaga Faiga Palota a le Itumalo Faaalaalafaga Nu. Tu Taulaga Sisifo.
3. P.P. 2016/2017 Nu. 29, Lipoti a le Faamasinoga Sili i le Talosaga Faiga Palota a le Itumalo Faaalaalafaga Safata i Sisifo.
4. P.P. 2016/2017 Nu. 30, Lipoti a le Faamasinoga Sili i le Talosaga Faiga Palota a le Itumalo Faaalaalafaga Alataua i Sisifo.
5. P.P. 2016/2017 Nu. 31, Lipoti a le Faamasinoga Sili i le Talosaga Faiga Palota a le Itumalo Faaalaalafaga Falelatai ma Samatau.
6. P.P. 2016/2017 Nu. 32, Lipoti a le Faamasinoga Sili i le Talosaga Faiga Palota a le Itumalo Faaalaalafaga Faleata i Sisifo.
7. P.P. 2016/2017 Nu. 33, Lipoti a le Faamasinoga Sili i le Talosaga Faiga Palota a le Itumalo Faaalaalafaga Aana Alofi Nu. 1 Sisifo.
8. P.P. 2016/2017 Nu. 34, Lipoti Faaletausaga a le Pulega o Tupe Faava o Malo a Samoa 2014.

22 IUNI 2016

Tuuina atu o Pepa

9. P.P. 2016/2017 Nu. 35, Lipoti Faaletausaga a le Faalapotopotoga o Suesuega Faasaienisi a Samoa 2014-2015.
10. P.P. 2016/2017 Nu. 36, Lipoti Faaletausaga a le Faalapotopotoga o Suesuega Tausi a Samoa 30 Iuni 2014.
11. P.P. 2016/2017 Nu. 37, Lipoti Faaletausaga a le Faalapotopotoga o Esetete Tausi a Samoa 30 Iuni 2015.
12. P.P. 2016/2017 Nu. 38, Lipoti Faaletausaga a le Pulega o Malae Vaalele a Samoa 2015.
13. P.P. 2016/2017 Nu. 39, Lipoti a le Malaga mo Sui Usufono o le Palemene i Ausetalia 23-27 Me 2016.

TUUNA ATU O LIPOTI A KOMITI FAAPALEMENE

Na tolaulauina e le Failautusi Lipoti a Komiti Faapalemene nei ua faataatia i luga o le Laulau a Fono e tusa ai ma le T.T.51(5).

1. P.P. 2016/2017 Nu. 40, Lipoti a le Komiti o Tupe Maua ma Tupe Totogi i le Tala Faatatau o Tupe Faaopoopo Lona Lua 2015/2016.
2. P.P. 2016/2017 Nu. 41, Lipoti a le Komiti o Tupe Maua ma Tupe Totogi i le Tala Faatatau Autu o Tupe 2016/2017.

TULAFONO TAU FAAOFI O LE FAATATAUINA O TUPE FAAOPOOPO (NU. 2) 2015/2016 MA LE TULAFONO TAU FAAOFI O LE FAATATAUINA O TUPE 2016/2017 - felafolafoaiga i luga o le faitauga faalua

FOFOGA FETALAI: E tusa ai ma le Tulafono Tumau 132 o le a faaauau felafolafoaiga i Tulafono Tau Faaofi nei e lua e pei ona valaauina ma e tatau ona saunoa sa'o lava i Tulaga Tau Tupe ma le Tamaoaiga o Samoa faapea Faiga Faavae tau Tupe a le Malo. Ia ma o le avanoa foi lenei mo sui usufono, e saunoa ai e tusa ai o le Tala o le Tupe pei ona tuuina atu i le tatou Palemene, ma o le avanoa foi lenei e saunoa ai sui usufono, o saunoaga foi nei e taua o saunoaga faa-taupou, ae ao lava ona faapuupuu i tulaga o tatou taimi ina ia mafai ona faagasolo le tatou galuega i tulaga masani. Ou te tapa ma le faaaloalo sui usufono e tulai e tamua aua foi le faafofogaaga a le itumalo ma le atunuu.

Afioga TOLEAFOA KEN VAAFUSUAGA POUTOA (Lefaga & Faleaseela): E muamua ona momoli atu le agaga faafetai i lau Afioga i le Fofoga Fetalai i le taulaga siitia foi aua lenei taeao fou i le alofa ma le agalelei o le Atua.

FOFOGA FETALAI: Malo faafetai. O lea ua tulai mai le sui usufono o lana uluai Nofoaiga lenei ma le Paeaiga lenei, le Afioga i le sui usufono mamalu mai Lefaga ma Faleaseela. Saunoa lau Afioga i le sui usufono mamalu.

22 IUNI 2016

LAUGA FAA-TAUPOU

Afioga TOLEAFOA KEN VAAFUSUAGA POUTOA: E muamua ona momoli atu le agaga faafetai ma le faamalo i lau Afioga i le Fofoga Fetalai i le taulaga siitia foi i lenei taeao fou aua foi le faafofoga a lo tatou Matai Sili i le lagi aua lo tatou vatapuia ma lo tatou Atua, i le maleifua mai o le Palemene i lenei taeao fou, i le maleifua mai o lau Afioga i le Palemia ma le Kapeneta, aemaise o sui usufono mamalu o le Fono mamalu o le Palemene o Samoa.

Lau Afioga i le Fofoga Fetalai faafetai mo lou avanoa aua se sao o lenei itumalo o Lefaga ma Faleaseela i le Tala o le Tupe ua folasia nei i le Maota o le Palemene. I le saunoaga manino ma le malamalama a le Minisita o Tupe i le taimi ua tuanai.

Lau Afioga i le Fofoga Fetalai, e momoli atu le faamalo a lenei itumalo i lou toe pale mai i le tofi o le Fofoga Fetalai e pei ona e umia i tausaga ua tuanai, ia faamanuia le Atua i lou alofaiva i le faafoeina o le Palemene o Samoa.

Ae ou te le i asaina le tai na iloa e Leuteleleite, e ao ona ou vaisausauina ia Sa ma Tia o le vavau o Samoa, aua o lele ua paia ma pau Tiafau o le Malae o le Faautugatagi a le atunuu. O Malae e lipoi ai manuia o le atunuu ma ona tagata. Tatou taalolo laia paia o Tiafau o tootoouli, ma tootoo tau le malae, o le usoga aua le puipuiga o le Malae leai. Aua Aiga o Tupu, Aiga o Nofo, ma Aiga o Papa, ma Aiga na Tafaifa.

E faatulou atu aua le tapuaiga leleoa i Lana Afioga Mamalu O Le Ao o le Malo Tutoatasi o Samoa, lau Afioga Tui Atua Tupua Tamasese Efi ma lau Masiofo Filifilia. E faatulou atu foi i le afifio o Sui o le Fono a Sui Tofia, lau Afioga i le Tama Aiga Tuimalealiifano Tuitaalili Suatipatipa Vaaletoa Sualauvi II ma lau Masiofo, lau Afioga Hon Tuiloma Lameko ma lau Masiofo, lau Afioga i le Suafa Afioga Hon Le Mamea Ropati Mualia ma lau Masiofo.

E faatulou atu foi i lau afioga i le Faamasino Sili ma lou faletua ma le mamalu o le Faamasinoga a Samoa. E faatulou atu foi i lau Afioga i le Palemia o le faauluuluga o le Malo Tutoatasi o Samoa ma lau Kapeneta mamalu, lau Afioga i le Fofoga Fetalai ma le Palemene o Samoa ua potopoto.

E le faagaloina foi faauluuluga o Matagaluega ma Faalapotopotoga le Aufaipisinisi Tumaoti faapea paaga o atinae o Malo mai fafo. Lau tapuaiga Samoa i le afio o Tama ma o latou Aiga, Aiga ma o latou Tama, le Usoga ia Tumua ma Pule, Ituau ma Alataua, Aiga i le Tai ma le Vaa o Fonoti.

Ou te faatulou atu foi i le tapuaiga a Taitai o Ekalesia ma le Aufaigaluega i so o se fata faitaulaga i totonu o Samoa, o lo o toa ma filemu ma manuia Samoa i la outou galuega tatalo i le ao ma le po.

O le paia lava lea, ou te faamalulu atu, e le faagaloina foi le tapuaiga a o tatou uso i Sasae le Faigamalo a lau afioga i le alii Kovana ma le Lutena Kovana, i le afio o lau Afioga i le Faamasino Sili ma le Faamasinoga, le afifio o Sui o Maota e lua, o le paia lava mai Laloifi ma Falesau, Gagamoe ma le Utumoe, o le fatu le gae ma ma leo utumau. O paia na i le usoga i le paia ma faleagafulu, o le Laau na Amotasi, afio i le Faatui ma Auvaa o Tootoo ma upu ia te oe le Manuatele. O paia na o Samoa mai le matafanua o leniulesa, i Saua seia paia Mulifanua. O le pa e sopoia o le Vai Suatoto ma le Ana o Vaatausili i Fili ma Puletuu.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

Ae ou te le i oo atu i le Tala o le Tupe, e momoli atu lava le faafetai tele ma le faamalo a lenei itumalo o Lefaga ma Faleaseela, lau Afioga i le Palemia, lau Susuga Tuilaepa Sailele Malielegaoi. O le faaululuga o le Malo ma le faigamalo talu ai, i la outou faatupu ma le faatamalii, lele ua seei ai le tama matua o lenei itumalo i tofiga maualuluga a le atunuu. Faafetai le faaeaea ma se tofa na ae i se tautua a Le Mamea Ropati ia Samoa ma ona tagata. O la outou pule lea.

E momoli atu foi lau faafetai i le Afioga Le Mamea Ropati ona o le tauaveina o le mamalu o le itumalo i upufai a le Palemene i tausaga e tele. Ia faamanuia le Atua i lou tulai mai, ia maua sau tofa aua Samoa. Lou itumalo pele ia te au Lefaga ma Faleaseela, o le paia lava lea o le afifio o le aiga Sa Tuala ma le latou tama, ma le mamalu ia Tuisavailuu, Leitu ma le Gagaeolo, afifio Aiga e lua Taulagi ma i laua Matua, alaatai tootoo o Maauga, Taloolevavau ma Leausalilo, ma polo e fa o le Faleaana ma le tagata o le vavau. Le tapuaiga paia i faletua ma tausi, le itupa paia i saoa ma tamaitai, ma le malosi o le tatou itumalo.

E le faagaloina foi le tapuaiga a le itupa paia i le Aufaigaluega Paia a le Atua i so o se fatafaitaulaga i totonu o lou itumalo. I le afio o lau afioga Patele le Tama Pule o le Matagaluega, lau susuga i le Toeaina ma le faletua ma le Aufaigaluega galulue ma outou faletua, i susuga i Faafeagaiga ma o outou faletua.

E momoli atu foi lau faafetai ma lau faamalo i le paia o lou itumalo, ona o le avanoa ua ou nofo ai i le nofoa lea, o le agaga maualuga o le fia tautua i lou finagalo, aemaise o le igoa pele o si ou itumalo pele o Lefaga ma Faleaseela. Ou te ave foi le faamalo i ou tuafafine ma uso sa o matou tauva aua se tofi o le itumalo, malo le finau, malo le taalo faatausala, faafetai le faatamalii, faafetai le taaalo faatupu, leaga o Sa Tuala o le Aiga Faalagilagi. Ae tapuai maia, se i momoli manaoga o lo ta itumalo.

Lau Afioga i le Fofoga Fetalai, o le Tala o le Tupe ua taulimaina nei, e momoli le faafetai i le Minisita o Tupe, lau Afioga e fou le tofiga ae le fou lau matafai. E avatu foi le faamalo i le manulauti i saunoaga a lau Afioga i le Minisita o Tupe, i le tulaga lea o le lufilufileleina o le tatou tamaoiga ma faaogaina ma le tata e tusa ma taiala faaletulafono o faiga faavae o le tatou Malo. Ua matauina le tulaga o le faamuamua o lau faasoia i le Soifua Maloloina ma Aoga. E matua lagolagoina e lenei itumalo aua o le lumanai manuia lea o le atunuu pe a soifua manuia ma aoaoina lelei ona tagata, aua le va feagai ai ma uso mai fafo faapea le atinaeina o le atunuu e faalagolago i le tulaga o le aoaoina lelei. Ua matauina foi i le Tala o le Tupe o le taiala mo le atinae o Samoa, le Strategy mo Samoa, lea o le a amatalia nei mo le isi 4 tausaga o lumanai 2016-2020. O le agaga maualuga a lava tapena se faamoemoe ma lelei lona faatinoina ma nofo malamalama le atunuu ona faaitiitia ai lea o le faitio. Ae tautuana aua le faavaivai pe a iai ni toatuga e fetaiāí ae tatou faamoemoe aua e le tuulafoaiina i tatou e le Atua le Tama.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

O le agaga o le Tala o le Tupe ia fai fuafua ma ia gafatia le tamaoaga o le atunuu, e ao lava ona i ai le tofa manino aua fuafuaga mo le lumanai, ia lototele e uunai ma atinae polokalame ia manuia ai Samoa, ae le gata foi i leaí . O lenei ua faagasolo le tatou faigamalaga mo le Paeaiga Lona XVI o le Palemene o Samoa. O lea ua tatau ona tuu atu loa manaoga o lenei itumalo i le Afioga i le Palemia ma Minisita o le Kapeneta aua le latou pule faasoa. Lau Afioga i le Minisita mo le Soifua Maloloina, o lena ua i ai le talosaga o lenei itumalo mo se matou falemai (sub-center), lea ua i ai Motootua mo gasegase o le atunuu atoa ma lenei vaega o Upolu. A o le talosaga i lau Afioga i le Minisita mo le Soifua Maloloina, e talosaga se sub-center mo si o matou itumalo e agai i ai e tau latalata mo le siaki faafomai. E tau savali atu i inei le fomai ma le tausi soifua e pei ona faia foi i isi vaega o le atunuu.

Lau Afioga i le Minisita mo Aoga, Taaloga ma Aganuu, faafetai tele mo le faleaoga fou o lo o fausia i le taimi nei mo si o matou nuu i Savaia Lefaga faapea foi Faleaseela, faafetai mo le faasoa. Ae pau lava o lea o se tuualalo, o alauni mo nai alo ma fanau o le Iunivesite lea local scholarship, o le talatala mai a se matua faapea faatoa maua le tupe pe a faaiuiu le kuata. Ae silafia o nai seleni nei e fesoasoani i le tologiina o lesitala, tusi aoga ma faasoasoa i pasese o nai alo ma fanau. O nai isi aiga e lima vaivai, o le fautuaga mo se auala e vave ai ona maua a latou alauni, fai aku ai foi. O pili aoga o fanau i le NUS, matou te lagona e le faigofie, a o le tuualalo ia mafai ona maua le aoaoga ma faaiuina a latou aoga. Ae tuu atu i ou tafatafa o lo o i ai le tofa ma le moe.

Lau Afioga i le Minisita mo Galuega, Felauaiga ma Atinae Eseeese a le Malo, o lena ua taoto atu se talosaga a lenei itumalo, ae paga lea e tele a matou auala e fia faafou ae fia ave le faamuamua i auala o nuu nei e lua o Tafagamanu ma Faleaseela. Aisea? Ona e le o i ai se auala e sosola mai ai i uta pe a tulai mai se mala faalenatura pei ona tatou molimauina i le Tsunami 2009. A silasila lau Afioga i le matou vaifanua e matuaí tele lava le afaina o soifua o nuu nei e lua ona o le leaga o auala e pei ona faatalosagaina. Faafetai mo auala ua maea ona faia mo isi nuu o le itumalo e i ai Safaatoa, Savaia, Gagaifo, Matautu ma Matafaa. Ae o le talosaga faamolemole, e toe fia faaleleia auala o Safaatoa. Savaia, Gagaifo ma Matafaa. O lea na maua sa asia e lau Afioga le auala o le fesootaiga o Faleaseela ma Falelatai, e lelei le faaifo i Falelatai ae faaletonu le auala lea i tua o Faleaseela. O lea ou te talosaga atu ai mo le toe faaleleia faamolemole lau Afioga i le Minisita. O se tasi lea o auala mo fesootaiga mai le malae vaalele i nuu o Apia ma Samoa atoa, ma e tele foi tagata tafafao maimoa mai ma le tatou atunuu e malaga taamilo mai ai i lenei auala. E talosagaina foi se auala sima faaneionapo po o se auala laupapa i le vai sima o le Liua le Vai o Sina i Faleaseela ina ia faasaoina ai lenei meaalofoa taua, ma le isi, aua a oo ina pa lenei vai, e poloka ai le femalagaaiga a auala. O le tatalo lea ma le agaga mauualalo i lau Afioga Papalii, se i e alofagia si o matou itumalo i lau faasoa.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

I lau afioga i le Minisita mo Leoleo, Auaunaga o Tineimu ma Faalavelave Tutupu Faafuasei, Falepuipui ma Auaunaga toe Fuataina, faafetai ma faamalo i le auaunaga a le Matagaluega, o lea ua maua atu le fuafuaga a le Matagaluega ma le Malo, o lea sii atu le falepuipui fou i Tanumalala. E lagona lava le atuatuva. Aisea? Ona o lea e aafia i lalo o si ou itumalo. Aua a fai palota, o lo o aafia i lalo o faiga palota o Lefaga ma Faleaseela. Ae paga lea, ua tautuauega so matou manatu, ae pau lava o lea, e talosaga atu i lau Afioga i le Minisita ma le Malo, ia silafia le saogalemu ma malupuipua nuu ma afioaga o lo o taulalata ane i afioaga. O le talosaga i lau Afioga, faamolemole ia fau se falepuipui pei o fale o atunuu i fafo, ia lava le aufaigaluega, afai e 200 pagota, ia 200 foi leoleo, ia tofu le leoleo ma lana tagata e vaai ma le sosola soo o pagota.

O le isi vaega lau Afioga, o le mu o le tane suauu lea na tulai mai i le uafu i Matautu. Faafetai i le Atua, aua o le mea moni, a faateteleina, ua leai se taulaga o Apia. Faafetai i le taavale fuimu a le Malae Vaalele i Faleolo lea na i ai le vailaau faapitoa na vave foia ai lenei faalavelave. O le fautuaga, se i silasila ane, ua tatau nei ona i ai se taavale fuimu faapea e leo ai le tatou taulaga i Apia, aua o lena e te silafia, e tele tane penisini, suauu ma kesi i totonu o le tatou taulaga, e aoga mea tutupu e silafia ai mea e tatau ona faatinoina mo le lumanai.

Lau Afioga i le Minisita mo Faatoaga, Faalapopotoga o Suesuega Faasaienisi ma Faigafaiva, faafetai mo le ponesi mo le aufaifaatoaga koko lea na tufa talu ai nei. O le tatalo, se i silasila ane lau Afioga i aufaifaatoaga talo, fai, tamato, kapisu ma isi, ae faaaauu i ai le faaso. O le mea moni, o lea e fua le galue a le aufaifaatoaga i lona malosia, e mafai ona faatino ai lana ia faatoaga i mea tau tupe. Ae a fesoasoani le tatou Malo e ala i mea tau ponesi mo le aufaifaatoaga, e le taumate o le a fau ma soloi nei faaeleleaga e mafai ona tatou maketi atu i fafo, tino mai lou faamoemoe ona tuutiitia lea o le okaina o ia oloa i atunuu i fafo.

Lau Afioga i le Minisita mo Punaoa Faalenatura ma le Siosiomaga, lau Afioga i le Sui Palemia, o le tatou polokalame o le suavai o le lalolagi lea sa faatinoina i si o matou nuu i Faleaseela. O la matou tatalo, o taligalu o Faleaseela ma Gagaifo Lefaga, toe pau lava lea o nuu ona soo loa lea o si o matou itumalo o Lefaga ma Faleaseela i taligalu. Ou te tatalo atu foi ia alofagia e lau Afioga le matou talosaga lea sa tuuina atu i le Minisita mo Galuega e uiga i auala ia e lua, o Faleaseela ma Tafagamano. O le fesootaiga i taimi o mala faalenatura, ina ia vave ona faatino aua ua maoae fesuiaga o tau ua tatou i ai i lenei vaiata.

Lau Afioga i le Minisita mo Tina ma Tamaitai, Atinae o Nuu ma Afioaga ma Agafesootai, faafetai mo faamanuiaga mo le lalagaina o le ie o le Malo. O le talosaga ia alofagia aua ne i faagataina a ia i ai se isi faaopoopoga aua e le faigofie lenei matalalaga ina ia tupu pea lo latou fiafia ma faatino le atinae o le ie a le Malo.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

Lau Afioga i le Minisita mo Fesootaiga, Faamatalaga ma Fesootaiga Vavave Faaneionapo, e i ai lava isi vaega o si ou itumalo e matua le maua ai lava se TV. O le vaega lea e amata atu i le Liua le Vai o Sina seia paia Faleaseela. E tatalo atu se i silasila ifo i ai lau Afioga i le Minisita.

Lau Afioga i le Fofoga Fetalai, o nai motugaafa na o si ou nei sui usufono aua se sao o le matou itumalo i le Tala o le Tupe. Afai ua le tautamalii se lagona ma se faafofoga ma le faaleoina o se manatu, ia malu ave i fale i lau Afioga ma le faafofogaaga a le Maota, aemaise o le faafofoga tapuai mai a Samoa.

Lau Afioga i le Palemia ma lau Kapeneta, ua tuutasi atu le faiva o Pili, ia faamanuia tele le Atua i o outou faiva. Ia manuia tele taulumaga a le Palemene, pei ona feagai ai nei. Soifua.

Na faaalua le agaga fiafia o sui usufono o le Maota i le patipati o latou aao i le maea ai o le Saunoaga Faa-Taupou a le sui usufono mo Lefaga ma Faleaseela.

FOFOGA FETALAI: Malo faafetai. Faafetai saunoa i le sui usufono mo Lefaga ma Faleaseela. Ua tuu atu le avanoa i se tasi o sui usufono e fia saunoa. Leai, e le tauanauinaí .

Susuga Hon Tuilaepa Auelua Fatialofa Lupesoliai Lolofietele Aiono Neioti Galumalemana Dr. Sailele Malielegaoi (Palemia): Lau Afioga i le Fofoga Fetalai, ou te iloa o lo o manino le Tala o le Tupe a le Palemene, ae ua lava ia lauga ae faagasolo le tatou Tala o le Tupe.

FOFOGA FETALAI: E leai se mea e noatia ai le Faaiuga a le Fofoga Fetalai, afai lava ua lava lea lauga, o lea foi ua faatu mai vaeatu foi le faafofoga tapuai mai a Samoa, aemaise foi o itumalo o lo o faitau mai toeaaina aemaise foi o itumalo. Ia, tulai maia le sui usufono mo Aiga i le Tai, e pei e manaia le felafoaiga o le isi itu ma le isi itu. Tulai mai le sui usufono mo Aiga i le Tai e saunoa. O le uluai Paeaiga foi lenei a le sui usufono mo Aiga i le Tai, ia manuia lau saunoaga.

LAUGA FAA-TAUPOU

Susuga MULIPOLA LEIATAUA LAKI (Aiga i le Tai): Faafetai i lau Afioga i le Fofoga Fetalai mo lou avanoa. Ou te manatu o lea ua tu mai lagi le lagaali a Tamafaiga, o lele foi ua maea ona sisi i lagi le atu a le tautai matapalapala, i le faapolo ma le faasagi e pei ona saunoa i ai lau Afioga i le Fofoga Fetalai. Faamalo le tapuai. Ae manatu o le a fagatonu ia le malama ma vili tonu le ifi a Maina.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

E ava ta le tuaoi fesili aʻi le lauuta, ae lauama tootoo le tofa faaolofaiva ma le faautautaga taufalaula, a o le gagana o faletetele, a ifo i manu le filiga tupetoga a tupu ma sao o aiga Samoa, ona faapea lea, se ua o tatou sootuli ma faavao tutui faasuli tupolata. Ua lia ai nei le gagana, aua ua o'o o'o tutu o tatou gafa, lele ua tau i le vai malu le aa tagata. Ua sina nei la le aso i Falemua, a o tapuaia le seuga i Falevaai. O le a ou le sopoloa la faalupe filimafua, pe ou te sii se matalalaga. E faigata Samoa o lele ua papaga ma menamena le aneanea, i sa ma faiga o Samoa i lana filiga tupetoga aua le Maota ma le malae o tofiga i Tiafau. Tulouna ia la le paia faatafafa o le Maota Fono a Samoa, le afio o lau Afioga i le Fofoga Fetala'i o le Maota, tulou le afio o lau Afioga i le Palemia ma lau Kapeneta, tulou le afifio o sui usufono mamalu o le Palemene ma le Fonousu a Samoa. Ou te muai faapoipoi lilia faalaa'u tuvanu ma ou faatulou, i le ee faafogafoga mai o Lana Afioga Mamalu O Le Ao o le Malo Tutoatasi o Samoa, lau Afioga Tui Atua Tupua Tamasese Efi ma lau Masiofo, faatulou atu foi i le afifio o a outou Afioga mamalu i Sui o le Fono a Sui Tofia ma outou Masiofo, faatulou i le afio o lau Afioga i le Palemia, lau Tofa Auelua Fatialofa Neioti Dr. Tuilaepa Sailele Malielegaoi ma lou faletua. Tulou le afifio o a outou afioga i alii ma tamaitai Minisita o le Kapeneta ma outou faletua, tulou le afifio o sui usufono mamalu o le Palemene i lana Paeaiga Lona XVI ma outou faletua. Tulouna le afio o lau Afioga i le Faamasino Sili ma le Ofisa o le Faamasinoaga, tulou le afifio o Faaluuluga o Matagaluega ma Faalapotopotoga Tumaoti a le Malo, faapea le Tafatolu o le Faigamalo a Samoa.

Ou te faatulou atu foi Samoa i le ee faafogafoga mai i maota ma laoa i nai o tatou matua tausii, tama ma tina matutua, ae a le tapuaiga i pulega mamalu a alii ma faipule o afioaga taitasi, faletua ma tausii, sa'ao ma aualuma, malosi o le nuu seia oo lava i alo ma fanau. Samoa e, o oe lava o le ua faalaofiegata. O le aomamala, tulou le afifio o Tama ma o latou Aiga, o Aiga foi ma o latou Tama, le Usoga a Pule ma Tumua, Itua'u ma Alataua, Aiga i le Tai ma le Vaa o Fonoti.

E le vaea le fala ooto aua paia o suli ma Feoi o le Atua i fatafaitaulaga e fia, o e o faanonomanu aua se manuia o Samoa ma ona tagata. Ia lele ua maea faaee i luma maota ou feaoga, ua ao i ai faalupega o Samoa, tulou lava. Ou te faatulou atu foi i le tapuaiga a nai o tatou uso a Malo i Sasae, le Faigamalo a Tutuila ma Manua, i le afio o lau Afioga i le Kovana Sili ma le Lutena Kovana ma lau Faigamalo, le afifio o Maopu alaalatai le Tama Matua, ma le mamalu i le Faleagafulu. O paia aua Sua ma le Vaifanua, Fofu ma Aitulagi, Saole ma Salea'umua ma le Launiu na Saelua. Tulou le afio o le Laau na Amotasi, Afifio Faatui alaalatai le auvaa o Tootoo ma upu ia te oe le Manuatele. O ou paia sausaugata na Samoa, manatu o le a taoto atu ia faamoe i ulupaga ma le faasauga o le atu folasa. Taoto foi faa'ia o le atumauga o le vavau le gae'e ma tau'ia ma lolo'u faalaa'u tapu'e ou mamalu ma o ou paia e tumau e le ave'a. O paia mai lava i le Tai Samasama o le Tuimanua seia paia Fili ma Puletuu na tauilo ai manu o malo.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafolaiga i luga o le faitauga faalua**

Ae o se avanoa lelei ou te faatalofa ma faafeiloai atu ai isi ou itumalo o Aiga i le Tai le itumalo ou te mimita ai, le itumalo ou te nenee ai. Se Aiga i le Tai e le o se itumalo itiiti oe, ua iloga o oe o le feagai a Tumua ma Pule, o oe o le pae ma le auli. O le tootoo e tausia le filemu. O ou paia mai lava i le Faamata seia paia Luatimu o le Uluaiou o malo, o paia e le avea. Faamalo le soifua manuia faamalo le lagi e mama. Faatulou atu i paia o nai afioaga, mai Mulifanua seia paia Apolima ma Manono. Faamalo le soifua manuia, le paia i le afioaga e susu ai Usoalii ma Alo o Malietoa, Susu Pouli ma Fuaolefau. Afio le Tapaau, alaalatai le mamalu ia te oe Ati ma Lautolo. Ae a le afioaga o Apolima si ou nuu pele ou te mimita ai, i le susu o Sau ma le aiga Sa Sau, susu Lilo ma Usoalii, alaalatai le Tuua ma le mamalu ia Sauma.

E faatalofa isi ou nuu pele o Manono, i le paia o le toafa o Alii ma le toalua o Tulafale, ma le mamalu i le Fale-Manono. Si ou pitonuu o Faleu, susu ai le susuga Tutasi o le Uluaiou o Malo, susu i lau susuga Leiataualesa o oe e te pule i le nuu faigata, alaalatai le Tulafale, susu Usoalii Faafeagai, susu le susuga i le Matua ia Vaisagote, faapea le mamalu o le aiga Sa Mutimuti. E le mafai foi ona faagaloina lau faatalofa isi ou pitonuu pele o Lepuia, i le susu o lau susuga Leiataualetaua, o le paia lava lea i le Falelima alaalatai le matua ia Vai ma le mamalu i le Faletolu. Faatalofa atu i si ou pitonuu pele o Apai, susu ai le susuga i le Alo o le Malietoa, lau susuga Tuilaepa, susu Usoalii ma le Matua ia Finau, alaalatai oe le Pologanoa. Ae a si ou pitonuu pele o Salua ma Satoi, susu ai lo oulua toalua Taupau ma Mulipola, susu le susuga i le Tapunuu lau susuga Luatutu, alaalatai le aiga Sa Tuilagi faapea lau fetalaiiga Auapau ma le Falefa o Salua. Lou itumalo e, o ou paia le popo ma ou pa le solo e taoto a ala oo. O upu e fai i le itulagi lea, se ua ou tu i Taumeasina ae ou tepa i le matagofie. I le agaga solia e maa faafilifili auro ai upu ma momoli atu le agaga faafetai tele i lou itumalo.

Faafetai mai le taele o lou agaga, o mea uma foi o i totonu ia te au ia faamanu atu i Lona Suafa Paia, aua foi nei galo se mea e tasi o Ana meaalofa. Ua faapena se mafauauga, faafetai tele i lau pule ua to, ua pale ua pale, ua ula ua ula, titi e ua titi, se ua malie i lau faaaloalo. Faafetai le faaeaea i la outou pule ua to, e ala i la outou faiga filifiliga i le Faiga Palota, lea ua outou tusi aao ai, e avea ai le auauna e fai ma tofi o le itumalo i lena lima tausaga. Faamalo le tofamamao, faafetai le utaga na saili, faafetai le saili malo. O ai ea le tagata ua e manatu mai ai? O ai foi le atalii o le tagata ua e saili mai ai? O le auauna e tu ma le apa fafano ma le ie soloi, e pei o la Iesu, ou te le i sau e auauna mai tagata ia te Au, ae ia Ou sau ia ou auauna atu i tagata. Lou itumalo e, ua leai se auro leai se ario e tau ai lo outou agalelei ma le faaaloalo maualuga lea. Ia tapuai maia ma le manuia, se i ou taumafai i se malosi e gata ai. O upu e fai i le itulagi lea, o le a le poia faleolo, o le a faa a le pou ae saili le ia a tautai.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

E le mafai foi ona galo Afia isi ona vao, isi ou uso a auuuna tulou, lau Susuga Ifopo Matia Filisi. O le sa tulai mai i le tofi i lena lima tausaga ua mavae, se ua faamalo le faatoatoa. Faafetai galue, faafetai mo galuega lelei, sa faatino mo lo ta itumalo. Agalelei le Atua ma ia faamanuia, ae tapuai maia se i ou liliu ane e faaauau le faiva o le tautua. Aua o le mea moni, e le i fausia Roma i se aso e tasi.

E le mafai foi ona galo lau faafetai ma le faamalo i nai ou uso a sui tauva, o e sa o matou tauva i le tofi faipule o Aiga i le Tai. Lau susuga Mulipola Oliva faapea lau fetalaiiga Tautaiolevao. O paia ma mamalu o le a le oo i ai se faamatalaga, e taoto lava, a o se alao. Ae faamalo le faatamalii, faafetai le faatausala, se o upu lava a le atunuu, e tau lapalapa tama a o le auso Tapuai maia ma le manuia, ae se i ou liliu ane e asu se vai ma ati se afi aua lo tatou itumalo. A o le i siia lou vaa mo le faatamasoaliiiga, lou itumalo e, ou te tatalo atu, ou te fia nonoina lau saaga, se i saa faaoti mai mo au, se i ou fili se pasina, pe fili se pauli, se pule po o se lautifa, ina ne i fili puea le mafua, ona le tali lea o le momoo o le taliuta. Aua o faiva e tapuaia o faiva manuia, e potu lava le tautai, ae le atoa ia i le liu o lona vaa. Ou te tapa foi tulua i le tata i lau tapuaiga i Suli ma Feoi o Auauna a le Atua i lona itumalo, o lau tatalo e manuia ai ou faiva alofilima. Samoa e, ou te le alu loa e faigata lou fita, tapuai i faiva o mafaufauga, aua lava se Samoa manuia ma le filemu, aua o lo o outou po le fala ma ula le mulila, o le a fisaga ai le tai. Ou te musu e alu le fai ae tuu lona foto, pe gau foi le tila, lafo i Manono, ae ou te momoo i se suasami aua Samoa potopoto, aua Samoa mo a taeao. Tapuai maia ma ia vivili faamanu a tagi lau tapuaiga. E vivii ae lou loto i le Alii aua e lelei o Ia, e faavavau lava Lona alofa. O Lona alofa lea ua maleifua mai ai i faguga lelei ma alafai mai i le manuia le paia o le Maota lea i ona mamalu le aveva, aemaise o Samoa i lavasiga eseese o le soifua valaauina.

O lea ua tatou fesilafai ai i pue o manu ae le o pue o mala, ua vaelupe maua ae le vaelupe saa. Aua e i ai se tofa na liliu, po o se faautaga na saili mamao, ausaga le tuvae, e saasaa e le faia, e faalua le tutu i le finagalo o le Atua. Ae tatou faafetai i le Atua, o le Faavae o le Malo o Samoa, ua manuia ai i tatou, taalolo atu ia paia o le Atua i le Aiga o Sa Levi, o le latou lea faiva alofiaao. Ae o paia o Samoa i paia faale-Malo, o paia faale-Talalelei ma paia faale-Atunuu manatu o le a ou le saena le atoseu o seuga. Aua o lea ua maea ona faailo le lupe mua o faiva seu a tamalii. Aua o Samoa o le atunuu tofi e le o se atunuu taliola. E le toe tau tapuea faalau le ola, aua pe mafuli lava le laau e sosolo lava ona aa. O ou paia e tumau e oo i le faavavau, ae o po tala o Samoa nei fai ma lape, e mai le oneone le utufia seia paia Fili ma Puletuu, o taeao e fia o le atunuu, ma le ala soifua, ua ta'ui i le avafatafata. Ae se i faavavavaga lou taimi e fai ai se sao o Aiga i le Tai, i le atinae e le gata o le itumalo, a o Samoa ma ona tagata, ina ia totogo ae pea moemoe fou i pitovaa o Samoa.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

Ae ou te le i paia la le pa i Fualaga pe ou te asaina le vai o le tama, faafetai atu i lau Afioga O Le Ao Mamalu o le Malo ma lau Masiofo, i lo oulua faiva alofiaao e ala i le soifua valaauina, ua faa-Ao i ai Samoa. Faamalo le onosai faafetai le tauatai. I le agaga fiafia ma le meæmeæ momoli atu ai le agaga faamalo i lau Afioga i le Palemia. Faamalo mo le faafoeina o le sa o Samoa i le tele o tausaga. E ui lava e le faigofie ou faiva alofi aao, i le feagai ma faitioga feagai ma tiga, aepeitai, faafetai lele ua tele suiga lelei. Siitia le tamaoaiga ma tauaoloa e atunuu tetele o le lalolagi. O le fesili e mafua i se a? lelei faatino o lau Faigamalo, se ua malie toa ua malo tau, faafetai i le tofamamao. Le tofa na saili i le Atua, ua aæ manuia ai lau faatautaiga. Se o upu i le gataifale, e le tau faafuluina le pa osofia, o le maa foi e piitia e le tau laeia. A o Afioga a le Atua, æ oge meaai leona taanoa, ae leai se mea e mativa ai le tagata e matau i le Atua.ø Le Atua o le puna o le oa ma le tamaoaiga Na te utufia le tofa, ae sufi i lau faautautaga. O le tatalo, tau ina faalua atu le agaga o le Atua i lau Afioga i lenei Nofoaiga.

A o se avanoa lelei foi e momoli ai le agaga faafetai tele i lau Afioga i le Minisita o Tupe, e tusa ma folasaga matagofie, se ua taliga e fialogo le mauga o Matautia, e ala i le tatou Tala o le Tupe. Ua lelei tapena mea uma, o le mea sili ona faafetai ai Aiga i le Tai, ua faaitiitia a tatou tupe faaalua, o lona uiga o le a faateleina a tatou tupe totoe ma o le a siitia ai le tamaoaiga. Faafetai i lau Afioga mo le Tala o le Tupe.

Lau Afioga i le Fofoga Fetalai, lau Afioga i le Palemia e tauala atu manaoga o lenei itumalo i a outou Afioga i Minisita o le Kapeneta. Lau Afioga i le Minisita mo Galuega, Felauaiga ma Atinae Eseeese, lau Afioga Hon Papaliitele Niko Lee Hang, e tatalo atu ma le agaga faaaloalo nai ou aualatetele. E le o toe po malae i le taua ma le aoga o aualatetele aua le faafaigofie o femalagaiga, aemaise foi le tau atinaeina o le tatou atunuu. E momoli le agaga faafetai tele i galuega faaaauu o lo o faatino atu i le taimi nei. Ua faaleleia le tele o nisi o vaega o le auala, peitai lau Afioga, o nisi vaega e le o faaleleia ua sili ona ogaoga, e manatu ou te le tolovaaina le upega o lo o i ina le uta a le faimea, ae na ona faaoloolo maau atu, se i alofa silasila ane. Ua fa nei masina talu ona uma ona sua nisi o vaega o le auala o Aiga i le Tai. Lau Afioga ua le iloa po o fea ua aga i ai le konekarate sa feagai ma lea galuega. E fa masina o feagai pea lenei itumalo ma le mamalu o le atunuu ma le pefu i taimi uma tulou, afaina ai le soifua maloloina. O le mea e popole ai le agaga ma le mafaufau, ona ua faaoga e le mamalu o le itumalo le suasami se i tulou, e tau faaitiitia ai le pefu ae ua fai ma mea ua sili ona afaina ai a tatou meatotino, se i alofa, se i tautuana le tatalo a Aiga i le Tai.

Lona lua o lau talosaga lau Afioga i le Minisita mo Galuega, Felauaiga ma Atinae Eseeese, i tulaga o ou auala galue. E le o toe po malae lau Afioga i le taua aua le atinaeina o faatoaga, ae a nai fanau i le ala usu i le aoga i le savalia, tama ma tina matutua lau Afioga, e moni e le itiiti le galuega fai, peitai, e tuutuu atu i autafa o lau Afioga se i alofagia nai ou auala galue, ua lata i le 30 tausaga e le toe faaleleia.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoga i luga o le faitauga faalua**

E lua nai ou auala galue i Lalovi, sasae e tuaoi ma Fuailoloo, a o sisifo e tuaoi ma Satuimalufilufi. E tasi lou auala galue i Apolima lau Afioga, ua matua faaleagaina ai le tele o taavale, ona o le omoomo ma le patupatu, tulou le faafofoga a Samoa ma le Maota. E tasi lou auala i Faleu, tasi lou auala i Lepui, faapea si ou pitonuu o Salua. Lau Afioga e tatalo atu ma le agaga faaaloalo, se i alofagia nai ou auala galue aua le tau atinaeina.

O le tolu o talosaga lau Afioga i le Minisita mo Galuega, Felauaiga ma Atinae Esee, o ou vai paipa. Faafetai i le Matagaluega mo le auaunaga. E le itiiti lo outou sao i le tautuaina ma le atinaeina o le atunuu. Peitai lau Afioga, e fai si utiuti o le suavai i totonu o lou itumalo. E tele o vaega e faatoa maua le suavai i le tuneva o le po pe a faaititia le faaogaina o le suavai. Ua na o le tafaala i le main road, agai atu i tua i le 60 i le 80mita i tua. E faapitoaugafa se faamatalaga i le suavai paipa mo lou motu o Manonotai. Lau Afioga e oo mai i le taimi nei, e leai se suavai paipa o maua ai i lou nuu. Ua na o nai tane o lo o tau talitali ai le matelaina ona o le leai o se suavai. Peitai a oo nei ina leai se uaga, ia ona agai mai lea i le motu o Upolu. Lau Afioga e tau saili se vaa, e tau saili se taavale, tapena le agai i uta ma le toe foi i le motu. O aga faigata ia ma le taugata o lo o feagai ma le motu. Sei alofagia, talosagaina ni nai pamuvai i lou itumalo, aua le faaleleia o lea vaega. Lau Afioga e le o po malae, e suavai ma vailaloe loaloa tuamaota ma tualaoa o Aiga i le Tai, o lo o sapi ai le vai o Aggies Resort. Faamolemole lau Afioga, na o le tatalo atu, ae le aoaia e Laupua Tamafaiga.

O le fa o au talosaga lau Afioga o le talosaga faamanatu, e ala i lou uafu tele aua le fesagaiga i le feoaiga a motu e lua, aemaise o Samoa. Ua matua faaleagaina le fale ma le uafu, tulou, ua taetaei ma mavaevae le sima ma ua le toe saogalemu, ma ua lamatia ai le sofua femalagaai o tagata i aso uma.

E tele atinae lelei tau turisi ua siitia i le motu. Peitai o le faigata lea o lo o feagai ma i latou ua faatinoina ia atinae, ona o le faaletonu o le uafu. Lau Afioga ou te tatalo atu ma le agaga faaaloalo. O le isi vaega o lau talosaga lau Afioga mo Galuega, e moomia ni ou moli faailoilo aua tulaga i le faailoaina o lou alavaa, mo le saogalemu aua le feoaiga o motu e lua. Ou te manatua, sa i ai moli i le vaitaimi o agai i aoga i tai i le motu, peitai ua leai se mea i le taimi nei. Lau Afioga e le tau faailoaina le taua o nei moli, e le gata i le soifua femalagaai, ia iloa alavaa, faapena foi ona faailo vaega e papau aua lava le soifua lelei o tagata femalagaai.

O le ono o au talosaga lau Afioga, e tauala atu i lau Afioga le faafetai ma le faamalo, i le Afioga i le Alii Pule ma le Matagaluega o Malosiaga Faaletise, i nisi o moli sa faamoliina ai nisi o uafu laiti o le motu, peitai lau Afioga ua toetiiti lava soo uafu. E talosaga atu ma le agaga faaaloalo, faamolemole se i alofagia nisi moli aua lava le faamalamalamaina o le feoai o le mamalu o le motu ma le atunuu. E faatupulaia nei faafitauli pe a oo ina i ai le suiga o le tatou daylight saving pei ona i ai i le suiga o a tatou taimi. E lagolagoina e Aiga i le Tai le Daylight Saving, ia pe a fai ma a tatou moli. Lau Afioga na o le tatalo atu, ae talitonu o lo o i ina le uta a le faimea.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

FOFOGA FETALAI: Ou te le fia faauilavea i le saunoaga matagofie a le sui usufono mamalu ona o le saunoaga faa-taupou, ia ae ua ou vaai atu pei e tele le tapenaga, ia o lo o faapena ona, ia e a pe a malie le sui usufono e faapuupu mai, o le sui usufono foi ua masani i le faatekonolosi i nei vaitaimi. Faapuupu mai pei e faafaigofie ai foi na faamau e le Minisita, le Malo uma ai foi lau tapenaga. I lo o le uma o lau 30 minute, ae o lo o faapena ona.... ua na o se faamanatu, ae saunoa mai le sui usufono.

Susuga MULIPOLA LEIATAUA LAKI: Faafetai i lau Afioga, ia o lea o le a faama atu, faafetai mo le avanoa.

O se tasi o vaega o le talosaga i lau Afioga i le Minisita, o le tulaga i ou taligalu, o se vaega o lou taligalu i tafaala, sasae ma sisifo o le Maota o le susuga i le Faafeagaiga Metotisi i le afioaga o Lalovi, e le o au atu i ai le taligalu lau Afioga. Ua foi mai le faatinoina o le taligalu i le isi pito o lou itumalo aepetai, e le o faatinoina se taligalu i lea vaega i tafaala. O le popolega, ona e gatasi lelei le auala ia ma le suasami pe a oo ina sua ooooo. E afaina ai le auala, ia aemaise foi o le mamalu o le itumalo o lo o nofo ai, Lau Afioga, o upu a le atunuu, ÷e logo lava le tuli i le tataøse i alofa.

O se tasi vaega o lau talosaga e agai atu i lau Afioga i le Sui Palemia, lau Afioga Hon Fiamē Naomi Mataafa, le Minisita mo Punaoa Faalenatura ma le Siosiomaga. E manatu e le itiiti le agaga faafetai i le tele o galuega lelei sa faatino mo le motu o Manono. Peitai lau Afioga, o upu e masani ai le tatou faigamalo lenei, o le mea e lelei mo Upolu e lelei foi mo Savaii. E i ai le manatu o le sui e lelei mo Upolu ma Savaii, ua sili foi ona lelei mo le motu o Manono. O le tulaga i ou taligalu faatamilo lau Afioga, ua maitauina le afaina, o le fua faatamilo o le motu, ona ua aia ma soloia le tele o vaega. E moomia se taligalu faamolemole, aua le faatumauina pea o le motu ona o le aafiaga o suiga o tau i lenei vaitau. E le o nofoai lou afioaga, o lo o faatino le lauina o le maa aua le puipuia, peitai a oo ina sau le Tsunami, ia o le a avea maa aua e laiti e fai ma auupega malosi e faatamaia ai meatotino aemaise o le soifua manuia o ona tagata.

Lau Afioga ua taatia atu se tasi o talosaga e ala i eleele, lau Afioga mo le silafia, o lo o tuafale foi si ou nuu i ou eleele. Tatalo atu ma le agaga faaaloalo, e pei ona tusi atu, se i alofagia ia eleele aua le fofoga taumafa ia aemaise foi o se vaega e tua i ai pe aafia i vaitaimi o lologa ma Tsunami.

Lau Afioga i le Minisita mo Faamasinoga ma Pulega Tau Faamasinoga, Komisi o Komesina o Faiga Palota, e tatalo atu ma le agaga faaaloalo, se i alofagia se tofi faaopopo o Aiga i le Tai, silasila ane lau Afioga i le Faiga Palota talu ai, siitia maualuga i le 4,035 le Lola o Aiga i le Tai. Tatalo atu o fea o i ai le tofa ma le faautaga se tofi faaopopo mo Aiga i le Tai.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoga i luga o le faitauga faalua**

O se tasi o vaega o le talosaga lau Afioga, e le o toe po malae i le tulaga o lou itumalo, tulou le afio o lau Afioga i le Minisita mo Fesootaiga, Faamatalaga ma Fesootaiga Vavave Faaneionapo lau Afioga Hon Afamasaga ua tapa fua i lou suafa, e le o se tuli ua vale aemaise o le afioaga o Satuimalufilufi. O le talosaga e tau ina faaololomaa atu aua e tupu lava matagi i liu o vaa, lau Afioga pe le tatau ona tuu le afioaga o Satuimalufilufi i totonu o lou itumalo faa-palota. A silasila lau Afioga i le faatulagaina o lenei itumalo, o Paepaeala i Mulifanua ona sosoo lea ma Satui fou, ona toe sosoo lea ma Mulifanua ona toe sosoo foi lea ma Satui, maea Satui ona sosoo lea ma Apolima, ona toe sosoo foi lea ma Satui, ona faatoa oo lea ia Manono. Lau Afioga i le Fofoga Fetalai, o manatu e faatupu lagona e maua ai foi se tofa ma se faautaga ae sili ona lelei mo le Ofisa o Faiga Palota mo le faafaigofieina o le latou galuega, aemaise foi o itumalo e lua pei ona i ai.

Ona faaiu lea o lau talosaga i lau Afioga i le Minisita mo le Soifua Maloloina, lau Afioga Hon Tuitama Talalelei Tuitama, e le o po malae i tulaga e pei ona i ai, e talosaga atu ma le agaga faaaloalo ina nei ou tagisa ae se i alofagia se maota gasegase mo le motu o Manono, aua lava le faafaigofie e pei ona maua e fiu e tau saili se vaa, e tau saili se taavale aemaise i vaitaimi ogaoga ma le louloua o le tau. Ou te manatu e afaina lava le soifua o le toeaina ma le loomatua e le i maua lava se vaa ma se taavale, aua lava le soifua lelei ma le soifua manuia tutusa o tagata uma. O le talosaga atu lea ma le agaga faaaloalo. Lau Afioga i le Palemia ma le mamalu o le Kapeneta, faapea sui usufono mamalu o le Palemene aemaise o le fita faafogafoga mai a Samoa mai ona ao e oo i ona iu, ae le gata i lea o le taufalemau i le Aiga o Sa Levi. O se sao lena o Aiga i le Tai e tauala atu i lau Afioga i le Fofoga o le Maota. Ae afai ua sala se gagana ma lapelapea sa matou afa, o le ftatalo, ðA utu le sami, asu i le upega.ö O le faanaunautaiga, aua lava ne i ðFaavaituuaipuina le vai faae,ö ina ne i nape le afa ona maumau lea o le suavai aua o avanoa e le au maua.

Ia manuia tele lau Afioga O Le Ao o le Malo, manuia a outou Afioga i Sui o le Fono a Sui Tofia, manuia lau Afioga i le Fofoga Fetalai, ia maua sou finagalo aua le faafoefoeina o le Maota. Ia manuia lau Afioga i le Palemia ma le mamalu o le Kapeneta, ia manuia sui usufono mamalu o le Palemene, faapea lau tapuaiga Samoa. Ia manuia tele le faafogafoga mai a le paia o si ou itumalo. Soifua ma ia manuia.

Na faaalua le agaga fiafia o sui usufono o le Maota i le patipati o latou aao i le maea ai o le Saunoaga Faa-Taupou a le sui usufono mo Aiga i le Tai.

FOFOGA FETALAI: Malo faafetai o lea ua faafogafoga le itumalo i le saunoaga a le sui usufono mo Aiga i le Tai. Ua avanoa foi le tatou Palemene mo se tasi o saunoaga.

Ia, tulai maia le sui usufono o Falealili Sisifo.

22 IUNI 2016

LAUGA FAA-TAUPOU

Tofa AUMUA ISAIA LAMEKO (Falealili Sisifo): Lau Afioga i le Fofoga Fetalai ma le mamalu o sui usufono o lenei Palemene. Ua faaifo le faiva o Ana e pei o le fetalai i le faiva i le tai, lafo foi i le liu le atu o le tautai matapalapala, tulima foi le tu i le tula le lupe sa faalele aua ua sao nei i matau le fuifui alii. Ua tuul le vaatele ina ua tulau le folauga, ae faapei o le fetalai a Tulatala, òUa malie toa ua malo tau, ò ae siva ai nei le teine ma lana fuifui ile, aua ua logo nei le fua ma le paio, e pei o le upu ia Tinilau. A o le aso ma tulaga o le tatou aso i le maleifua mai ma le soifua maua ma le lagi e mama, i le paia ma le mamalu o lenei Fonotaga. Ua malo afua ua malo ua maua lo tatou taeao fesilafai, aua ua mua mu le aso, e pei o le fetalai ia Tualemoso. Ua toa foi le tai sua ae noanoa le taitau. Ua fotupule foi le faiva o tama aua ua loloma le tai o Tumua. Ua toa foi le tai o Ala, aua ua ula ma ua matagofie ai foi le aso. Aua ua moe man ala, ua moe Fogalevasa. Ua tatou fesilafai ai nei i avatui ma avafatafata e pei ona silafia e Saoluaga. Ua tele ai lava upu i man , ae itiiti upu i mala, ae ua i le agaga le matagofie ma le manaia o lo tatou taeao fesilasilafai. A o lenei aso, ua fai i lagi le tuligasiã a Sa Tagal . O paia ma mamalu o lenei aso ma le Palemene o Samoa.

Lau Afioga i le Fofoga Fetalai, le paia i le afio o le Afioga O Le Ao Mamalu o le Malo o Samoa lau Afioga Tui Atua Tupua Tamasese Efi ma lau Masiofo, afifio Sui o le Fono a Sui Tofia ma a latou Masiofo. Afio lau Afioga i le Faamasino Sili ma lou faletua, Afio lau Afioga i le Palemia ma lou faletua, afifio tamaitai ma alii Minisita o le Kapeneta, Minisita Lagolago ma sui usufono o le Palemene, afifio Susuga i Faafeagaiga e fia o lo o tauasuina le Ipuvai o le Ola i so o se fatafaitaulaga i Samoa. Afifio faaululuga o malo mai fafo, afifio faaululuga o Faalapotopotoga, Matagaluega a le Malo, afifio saotamaitai, sao aualuma ma le malosi o nuu i so o se afioaga i totonu o Samoa. O le paia lava lea o Tama ma o latou Aiga, Aiga ma o latou Tama. Le Usoga a Tumua ma Pule, Itua ma Alataua, Aiga i le Tai ma le Vaa o Fonoti.

Ou te fia pai foi i le Faigamalo a Tutuila ma Manua, i le afio a lau Afioga i le Kovana Sili ma lou faletua, Lutena Kovana ma lou faletua, o le paia lava lea i le mamalu o Sua ma le Vaifanua, Fofa ma Aitulagi, Saole ma Saleaamua ma le Launiu Saelua, Tootoo o le Faleula ma upu i le Manuatele. O paia ia ma mamalu faaleaganuu, faalemalo ma le faatalalelei o lo o tatou sapi ai nei. Ia faaopea ia ta fua nai le sami ae tatou tuli alavaa e tasi. Tau ia o le Atua ua lava lea mo tatou i le aso nei. Faafetai la i le Atua au ua Ona faia mea matagofie ua tatou fesilafai ai nei i au-o-manu ae le o au-o-mala, i luma o nuu ae le o tua o nuu, i mauga o ao ae le o mauga o Lilaumea. E faapena ona tatou viia le Atua au mai ia Ia le alofa, ua ala ai ona tatou oaoa i faleseu ma saã i maaomalie pe sa foi i lagitau.

Le paia o si ou itumalo o Falealili Sisifo amata mai Saga seia oo i Sapunaoa, susu lau Susuga Tuatagaloa le Saofetalai ma Toosavili o le Ki o le Malo, afio mai lau Afioga Meleisea o le saoaualuma, afio mai Leilua ma le toafa Tamatane, afio mai le Matua ia Fanene, afio mai Salevalasi, susu mai Tuisamoa o le Tapaau Faasisina o le solomuli a Manumea, susu mai le paia o Leusoalii, susu mai oe Lufilufi ma upu ia te oe Taulauniu.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

Susu mai oulua suafa Sale , Saoleititi, Taito ma Ula, afio mai le Matua lau Afioga Alaimoana maliu mai Sa Alaimoana faapea le mamalu ia te oe le Falealili, maliu mai oe Talaolefale lau tofa Falaila ma le lauti na laulelei ia te oe Falealili. Susu mai Pulotu o le alo o Tuatagaloa, maliu mai le alii o aiga lau tofa Talauena, maliu mai le Anofale ma ou manu faapea upu ia te oe Falealili. Afio mai alo o Fanene, afio mai Teo o oe o le Anavataua na faaleo ai papa o Tupua, susu mai lo outou Usoalii, maliu mai le aiga Sa Talo i lau tofa Talooolemaagao ma le uso na toto, maliu mai Muatua ma Saleaalii ma le lauti na laulelei. Afio le mamalu o lo outou tofa, maliu mai Leavasa ma Vaelopa o e na leleo i le fale o Ituau ma Alataua, o tootoo o le aava, maliu mai Tuiloma ma Taituuga o manu o le Tuasivi e fagogota i tai e lua, susu mai Patea o le alalata ma le alo o le Tuatagaloa, susu mai Taa o le nafa na tausi o le alo o Malietoa. Susu mai Muliava o le fofoga o le vai, susu mai Fuataufao o oe o le Suafa faalupea, alaalatai mai e matutua lau tofa Muliaga ma Maseafa alaalatai le mamalu o le lotoifale o Manu Samoa. O paia na ma mamalu o lo tatou itumalo o Falealili Sisifo, a o le aotelega o le faalaniga o leni itumalo o Falealili lea ua vaeluaina. O le paia ia Alalagafa la lua nofo o Tulafale, tauagaeseese ia te oe Falealili. E momoli atu ai le faafetai ma le faamalo i lo tatou itumalo i la outou faaeaea i le maea ai o le tatou Faiga Palota i le tausaga leni, faamalo faafetai o la outou pule lea. O le a teu i le va o lou fatu ma lou mama ma e le mafai lava ona galo. E avea foi leni avanoa faatauvaa e momoli atu ai le faafetai tele ma le faamalo i sui o Falealili i le Paeaiga talu ai le Tofa Tusa Misi Tupuola ma le Tofa Tuiloma Pule Unasa Alaimoana Lameko, i le asaina o le gasu o le taeao ma faataatia le alafua mo galuega o lo tatou itumalo. Faafetai fai o le faiva, faamalo tautua, faamalo faaeaea itumalo.

Ia ona ou liliu mai lea e fai sina faamatalaga i le Tala Autu o le Tupe i leni tausaga. I le vaavaai i le Tala Faatatau o le Tupe mo le Tausaga 2016/2017 ua atagia ai vaega nei. O le mea muamua, ua siitia i le 3.1% le tupe maua i le 2016/2017 pe a faatusatusa i le 2015/2016, e momoli atu ai le faafetai ma le faamalo i le Minisita o Tupe Maua, Ofisa Sili o Pulega ma le aufaigaluega o le Matagaluega o Tupe Maua mo galuega o le aoina o tupe aua galuega faatino ma galuega atinae o le tatou atunuu.

O le vaega lona lua, ua siitia i le 76.5% tupe faameaalofa mai fafo pe a faatusatusa i le 2015/2016 ma e maua ai alamanuia mo tatou tagata o lo o galulue i galuega faavaitaimi i fafo atu o Samoa. E maua ai foi alamanuia mo pisinisi tau tagata tafafao maimoa mai ma maua ai galuega mo o tatou tagata i Samoa nei ma siitia ai le fua faatatau o oloa o lo o auina atu i fafo. O le mea moni lau Afioga i le Fofoga Fetalai o lo o ave pea le faamamafa a le Malo i vaega nei. O le Matagaluega o Aoga, siitia i le 10.2%, Matagaluega o le Soifua Maloloina 9.7%, Matagaluega o Tupe 8.5%, Matagaluega o Galuega ma Atinae Tetele 5.2%. Lau Afioga i le Fofoga Fetalai, ia na o ni manaoga o leni itumalo mo a tatou Matagaluega o lo o i ai.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

O le Matagaluega o Aoga, e talosagaina le siitia o le tulaga aoao o le numeracy ma i ai ni guidelines ma ni meafaigaluega (text book) e faaaoaga e tamaiti mo aoga tulagalua aemaise kolisi. Ia siitia le capacity o faiaoga aua le aoaoina o tamaiti, ma e momoli atu ai le faafetai ma le faamalo i le Minisita mo Aoga ma le Ofisa Sili o Pulega ma le Matagaluega faapea le Tapaau ma le aufaigaluega a le Iunivesite Aoao o Samoa ma Iunivesite mai fafo, o lo o tatou faipaaga mo lea faamoemoe.

Seo atu i le Matagaluega o le Soifua Maloloina lau Afioga i le Minisita, e talosagaina pea se fomai faapitoa e taitasi i le vaiaso mo le Falemai i Poutasi. I le Matagaluega o Galuega ma Atinae Tetele, e talosagaina lava le eletise ma le vai taumafa e faaogaina ai ia tatou community service obligations i nuu i uta i Sapunaoa, Matautu, Malaemalu ma Satalo.

O le vaega lona lua e momoli atu le faafetai tele i le Afioga i le Palemia ma le Kapeneta mo le faatatau o auala galue o Vaovai, Satalo ma Sapunaoa. Ia ae o totonu o lenei itumalo, o lo o tele lava auala galue e le i faatatau taiepi o le matou nuu i Saleilua i le auala galue Numera 3, Numera 2 ma le Numera 1. O Poutasi Numera 1, o Matautu Numera 1, o Tafatafa Numera 1, Malaemalu Numera 1 ia ma le auala galue i le pitonuu o Piu ma Sapunaoa e le i faatatau. E talosagaina foi lau Afioga i le Minisita mo auala laupapa fords i le vai lea i Satalo ma le vai lea i le pitonuu o Piu i Sapunaoa.

Mo le Matagaluega o le Siosiomaga i le galuega o le totoina o le togatogo i Sapunaoa, Satalo, Malaemalu, Vaovai ma Poutasi. O le galuega mo taligalu i Iliili, Saleilua, Matautu, Malaemalu ma Sapunaoa i le tuaoi ma le vai lea e i Salesatele. Ia, o le vaega lona tolu o le faatatau o auala mo le Tsunami i Poutasi Satalo ma Faleulu i Sapunaoa. Mo le Faalapotopotoga o Tagata Tafafao Maimoa Mai, ou te talosagaina le faatatau o auala agai i mataaga ma turisi i Iliili i Saleilua ma Poutasi ma Tafatafa e tolu auala lelei i mataaga ia ma Malaemalu i le auala fou ia e i ai i le taimi nei.

O le Matagaluega o Faatoaga ma Faigafaiva, e talosagaina le siitia o le faasao o le gataifale. Lua, e talosagaina meafaigaluega (materials) mo nuu taitasi mo le toe totoina o le niu, koko ma le kofe, e faaogaina ai le tatou stimulus package. Tolu, siitia meafaigaluega (materials) mo le talo Salani, talo Fusi, ma le talo Tanumalala mo le aufaifaataoaga ina ia ausia matatia mo le totoina aua le auina atu i maketi i fafo ae ia lava foi a tatou meaai taumafa i totonu o lo tatou atunuu, (food security).

O le Matagaluega mo Fesootaiga, Faamatalaga ma Fesootaiga Vavave Faaneionapo, e talosagaina lava ma le faaaloalo e le ola le telefoni feaveai i gataifale o Falealili Sisifo i le amata atu i iliili seia paia Sapunaoa seiloga e te sau i uta i le auala ta, ona faatoa maua lea o le fesootaiga ma isi tagata o lo o faaogaina telefoni feaveai. E talosagaina foi ina ia faapena ona faaauuina atu le tatou cable mo le faaogaina o le tatou internet.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

O le Matagaluega o Pisinisi, Alamanuia ma Leipa, e talosagaina le siitia o le maua o avanoa tutusa mo o tatou tagata saili galuega ua maua Tusipasi maualuluga mai Iunivesite ia siitia le mauaina o avanoa tutusa mo nai o tatou tagata saili galuega e le o i ai ni Tusipasi. Ia faaauuina pea o le Polokalame faa-Aperenitisi e uunaia ai o tatou tagata e leai ni Tusipasi ae i ai agavaa o matata eseese ma taualoa ai a latou pisinisi. Fa, ia silasila totoa i avanoa tutusa mo le toe aumaia lea o le tatou (GEGS) Government Exports Guarantee Scheme mo tagata faipisinisi i faatoaga, faigafaiva, gaosia o oloa, garment ina ia uunaia ai le auina atu o oloa i fafo ma fesoasoani ai i lo tatou tamaoia. E talosagaina foi le faafaigofie o ala fua faataatitia ina ia agavaa ai i ia fesoasoani.

O le Faalapotopotoga o Tagata Faigaluega a le Malo, e talosagaina le faatalatalanoaina o le aufaigaluega a le Malo e faatatau i faiga faavae ia latou penefiti e pei ona aiaia i le Tulafono Faava o Malo, o Leipa aemaise o le tatou Faavae.

O le vaega mulimuli o le Matagaluega o le Komesina o Faiga Palota, e talosagaina le toe vaeluaina o Falealili Sisifo aua o le taimi nei e 10 nuu o lo o i ai e pei o Iiili, Saleilua, Poutasi, Vaovai, Matautu, Matavai, Tafatafa, Malaemalu, Satalo ma Sapunaoa mo le isi Faiga Palota o lo o lumanai.

O le a seu lou vaa i fanua, afai ua i ai se upu ua sala po o se gagana ua le tau tamalii i la outou faafofogaaga, ia malu ave i fale i o outou finagalo, o ni tauao mani ao lelea i lau Afioga i le Fofoga Fetalai, Afioga i le Palemia ma le Kapenea, Minisita Lagolago ma sui usufono uma o le Palemene ia faamatafi e le Atua i ni nuu le ain ae aumai man mo Samoa nei ma a taeao. Ia aua nei solo le fue pe tulolo le tootoo i le Usoga a Pule ma Tumua, ae ou ola i le alofa ma le agalelei o le Atua. Soifua.

Na faaalua le agaga fiafia o sui usufono o le Maota i le patipati o latou aao i le maea ai o le Saunoaga Faa-Taupou a le sui usufono mo Falealili Sisifo.

FOFOGA FETALAI: Malo faafetai. Ia o saunoaga la nei e atoa i ai le tulaga o mea e manaomia e Itumalo o lo o lava lo latou taimi. Malo faafetai, e le tau laeiina pe faafuluina le sui usufono i le saunoaga, malo faafetai.

O lea ua tulai mai le isi toa o le Palemene le sui usufono mo Aana Alofi Nu. 2.

Tofa ILI SETEFANO TAATEO TAFILI (Aana Alofi Nu. 2): Faafetai atu lava i lau Afioga i le Fofoga Fetalai mo le avanoa. O lea ua maea ona e toto le niu i le tuaoi aua le alofa ma le agalelei o le Atua i lenei aso, ona matou manatu lea leai e le faaitiitia le agaga faafetai i le Atua, aua pe tetele lava timuga e le magalo ai le alofa o le Atua. A o lenei taeao ma le aso, o lea ua tatou fesilafai i lagima ma le soifua laulelei aua le polo faasoa a le Atua e ala i le foai i le soifua ma le malosi.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

Ou te manatu o lenei itula o le a ou le toe faloina le afa loloa a o le a tuu sao sa matou faamatalaga aua lo matou avanoa e pei ona i ai lenei taeao. Lau Afioga i le Fofoga Fetala'i o le Fono Aoa'o Faitulafono o le Malo Tutoatasi o Samoa, ma le mamalu tele o sui usufono filifilia o le Palemene i le afio o lau Afioga i le Palemia o le Taitai o le Malo, afio lau Afioga i le Sui Palemia, faapea le paia ma le mamalu o Minisita o le Kapeneta, Minisita Lagolago ma le loaloa o le Palemene i ona tulaga faalua.

Ou te tulai atu i le ava ma le faaaloalo tele e fia faaaogaina lenei laolao matagofie mo lou uluai avanoa i totonu o le Maota o le Atunuu se i taumafai atu ai se leo mo le Itumalo o Aana Alofi Nu. 2. E le tau faafuluina le pa e aina ma le lautifa e osofia i le paia o le Maota, aua pe la ea o sau upu o le a toe faaopoopo ai pe toe suia ai se iota se tasi o Sa ma Faiga o le Maota o le Atunuu. O le Maota e tulutulu i tao ae ato i paia ma mamalu. O le Maota e pola puipui i saunoaga ma fetalaiga, ma poupuu i le faaaloalo ma le avafatafata. O le Maota pogisa e teu ai le tofa ma le auafa mau ma moega lafo e sii ai Samoa i ona upufai aua se manuia lautele o ona tagatanuu o lo o taputapu'ai ma tui le mulipapaga. Ou te le utuvai tofo i lo outou paia aua e leai lava se poto po o se vave na te toe tolovaelupega i le loloto o le tai, ae tau lava ina ou faapito amo le avega ma ou faapea atu ma le migao, nuunuu atu ia faatini o tausala i le au tulatoa ma le aufueloloo o le Maota o ua loa ona pale mai i saofaiga a le Palemene o lo o i ai le tofa ma le uta. E tata liu o le vaa ae popoe, e see lilia foi lou sui usufono i totonu o le Palemene, e tautala foi ma le faaaloalo ma le faateete, afai foi ou te taumafai atu i se upu ae le logomalie pe paopapa i le faafofogaaga ia vaatele mai. Ae o motugaafa na fili aua se sao o lenei Itumalo, ae afai e i ai se aoga ia fatu ai le titi ma sui ai le faasolo aua Samoa ma lona manuia.

E le faagaloina i le agaga le tapuaiga a Lana Afioga Mamalu O Le Ao o le Malo, lau Afioga Tui Atua Tupua Tamasese Efi ma lau masiofo. E faapea foi le nofo a Sui o le Fono a Sui Tofia. O le paia lava lea aua Tama ma o latou Aiga, Aiga ma a latou Tama, le mamalu ia Pule ma Tumua, Ituau ma Alataua, Aiga i le Tai ma le Vaa o Fonoti. Ae tainane foi le faafofoga tapuai a o tatou uso i le Motu i Sasae, le paia ia Sua ma le Vaifanua, Fofu ma Aitulagi, Saole ma Saleaamua ma le Launiu na Saelua. Le Laau na Amotasi, Auvaa ma Tootoo ma Upu i le Manuatele. E manuia faiva o le Palemene ona o lau tapuaiga, e pei ona patipati taoto le Feepo.

Ou te faatalofa atu foi i le afio o lau Afioga i le Failautusi o le Fono Aoa'o Faitulafono faapea le aufaigaluega a le Ofisa o le Fono. O le tapuaiga i Ofisa Sili o Pulega o Matagaluega ma Faalapotopotoga Tumaoti a le Malo, le au Faasalalau i Leitio, Televise ma Nusipepa, faafetai mo lo outou sao.

Ou te faafeiloai atu foi i lenei taeao i le malotia o le Maota o le Palemene po o le Maota o le atunuu i alo ma fanau faapea le aiga faiaoga ua tatou auai mai ona o le fia molimauina o lenei faamoemoe.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

E le faagaloina foi le tapuaiga a le Auaifaluga paia a le Atua o Suli ma Feoi o le Talalelei o lo o faafale-le-malu ma faafaletulua i totonu o lou itumalo faapea foi Samoa atoa. Faafetai mo le tauasuina o le Ipuvai o le Ola aua se inumaga faale-agaga o Samoa ma ona tagata mo nei ma a taeao. Faamalo le fai tatalo.

Lau Afioga i le Fofoga Fetalai, ina ne i ou laa loa ae fia afea lou itumalo pele o Aana Alofi Nu. 2, o lo o faafofoga tapuai mai aua e le galo afia i si ona vao, i le afio o Sooaefalagi ma Alo Tamalelagi ma i laua Faiga, alaalatai lau Tofa Alipia o oe o le Matua-na-togi. O le mamalu i le Faleiva ma Faletui-aana ma lau Fetalai Leulumoega e te pola puipui aua Aiga-e-fa ma Laau-na-faufau, le Nofo a Too ma Aana-sa-na-eseese, o oe o le Tumua. Faafetai tele mo le tapuaiga a o alofaiva lo tatou itumalo mo lana faiga filifiliga, malo le seu silasila.

E faapea foi le tapuaiga i lou nuu pele o Nofolii aua le afio o le Aiga Sa Tuala, afio Taimalieutu o le Fofoga o le Vai, Afio le Falefa o le Aiga Sa Tuala o le Aiga Faalagilagi na masaesae ai le lagi. Afio Muagututia o le Aloalii ma le Tama Sa Tuala, Susu foi le Matua o le Aiga Sa Tanuvas i ona matafale e fa. O Tanuvasa na itulua ai Aana, o Tanuvasa ma Aana na atoa ia te oe le itumalo. O le Laau na Fausia na faufau ai Malo. O le mamalu o le nofo a ituaiga o le Faleaana ma lau Fetalai Faiumu Ataata. Alaalatai foi le Fale Aana i Gagaae ma lo la Tapaau ia Tauti ma Malaitai faapea le Lauti na laulelei. Le paia e o lou itumalo, ua faamalo ma faafetai le saili Malo, ia aua ne i a tatou le viiga a ia tuuina atu i le Atua e Ona le manuia, ua malie le pule i maga, ua malie le ua na to i va, o lau faaea ma lau puleto ua tototetele ua ou sapaia faatualeele. O lau faaaloalo lea ua ou tiu ai nei ma ou sapi ai i upufai o Malo, a o ai ea le tagata ua e manatu mai ai?

Ou te fia faaogaina foi lenei avanoa taua e momoli atu ai le faafetai tele i le Tofa Tolofuaivalelei Falemoe Leiataua, o le sa ma tauva i le tofi o le Nofoa o le Palemene. Faafetai i le Atua ua toa le tai o galu fefatiai o lea ua matafi le lagi a ua lafo le malu, faafetai le tofa faatamaalii ma le tausinio faafaleupolu. Ia tatou faagalo fatia ua sola ae tuli i luma so tatou ai aua e taaalo a tama a o le uso, Aana Alofi Nu. 2, o outou o le uso ia te au.

Lau Afioga i le Fofoga Fetalai, e avea foi lenei avanoa taua ou te momoli atu ai lau faafetai tele i le sa tulai mai i le foe ma le Nofoa o lenei itumalo i tausaga e tele le Tofa Tolofuaivalelei Falemoe Leiataua, faafetai i lau Tofa sa tulai mai i le Nofoa mo galuega uma na e faia mo lo ta itumalo. O a foi ni galuega o lo o totoe ae fia faaauau ia taatia mai lou faatuatuaga ia te au ou te faaauauina la ta tautua e pei ona i ai. Lou itumalo e, tapuai maia, aua le faatoina faiva aua e talitonu le taofi e le i fausia le matagofie o Roma i se aso ma se tausaga e tasi.

Lau Afioga i le Fofoga Fetalai, avea ia lenei avanoa i lau lauga mua e fia faaleo atu ai nisi o galuega atiae po o ni galuega fia faaleleia i totonu o lou itumalo.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

Lau Afioga i le Palemia ma le mamalu o le Kapeneta, ou te le tau selu atu, ina ne i tatou fao le viiga o le Atua, a o lo outou paia o le vaietele e tafe uma i ai punavai, o le afitutu foi e atiafi i ai sui usufono uma o le Maota i mataupu ua mafatia ai o latou itumalo. Afai foi ua se tai taliga i le faafofogaaga ae ioe le manatu o l e tuitui ma le loto maualalo, e toina mai.

Lau Afioga i le Fofoga Fetalai faapea le Kapeneta aemaise o le Minisita e fitoitonu i lenei talosaga, o le auala galue o si ou nuu o Nofolii, e le i oo lava i ai se faalauleleiina po o se ta foi. E tatalo atu ma le agaga faaaloalo se i tagai ane i lo matou auala galue. Na manatu, e le gata ina logolelei ma lelei i le feoai a si ou itumalo, ae o lo o faapea foi ona i ai aseta a le Malo i nei auala. E lua pamuvai, ae tasi le faatanoavai a le Pulega o le Suavai o lo o i ai i le auala galue lea. E faapea foi i laina eletise malolosi a le Malosiaga Tau Eletise. Ae ioe le talitonuga, o le faalauleleiina o le auala galue lea, o le a faapea ona faafaigofie ai feoaiga ma felauaiga i le tulaga o galuega faatino.

O lona lua o lau talosaga i le Malo ma le Kapeneta, o le pitonuu o si ou nuu o Vaialua i le tuaoi ma Fasitoouta, ua tele lona afaina ma ua lamatia le saogalemu o o lo o alaala ma papaaao ai ona o le siitia pea o le suatai. Ma o le pitonuu foi lea o lo o i ai le Maota o Lana Afioga Mamalu O Le Ao o le Malo, e faapea foi i le Tamaaiga, le Afioga ia Tuimalealiifano. Lau Afioga i le Papaliitele o lo o fitoitonu i ai galuega ma felauaiga, e tatalo ma le agaga maualalo se i tagai ifo i lea vaega.

O lona tolu i lau talosaga, o le suavai taumafa mo si ou itumalo o o lo o alaala ma papaaao i nuu a uta. I Leulumoega lava latou ia, pe afa maila le sau mai tai i le auala agai i le main road i uta, na o latou na o lo o maua le suavai taumafa, a o le isi vaega o lo o alaala ma papaaao seia paia le auala o lo o faalava ifo i Aleisa, o i latou na o lo o taliilagi le vai. Semeamanu le poloketi a le CSSP ma le Koluse Mumu ua maua ai le faamamaavega mo nisi o aiga o lo o nonofo i uta e pei ona i ai nisi ua faamanuiaina i tanevai. E tatalo atu ai i le Afioga i le Minisita, e faafetaia le Malo mo le auala galue o si ou nuu o Leulumoega, e ese mai le auala Maligi pei ona lauiloa e le toatele o le atunuu. E matagofie lenei auala, ma o le toatele foi o aiga ua nofoia, ae peitai ane, e le i oo i ai se eletise, e le i oo foi i ai se vai. E tatalo atu ai ma le agaga maualalo, e fia maua se vai ma se laina eletise mo i latou o lo o alaala ma papaaao i lea vaega o Leulumoega, e faapena foi i Nofolii i o lo o nonofo i uta, se i tagai ifo le Pulega o le Malosiaga o le Suavai i se faamamaavega mo i latou nei.

Lau Afioga i le Fofoga Fetalai ma le mamalu o le Palemene, ou te talitonu ua lava lea lauga, e toe maua foi nisi manatu i se taimi o i luma. Ae o se manatu i le Tala Faatatau o le Tupe ua i luma o le Laulau a Fono, e avatu lau faafetai tele i lau Afioga i le Minisita o Tupe. E fou lau Afioga i le tofiga ae fou lou silafia i lea matata. Faamalo faafetai. E lagolagoina e le itumalo o Aana Alofi Nu.2 le Tala o le Tupe i lona aotelega.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

Lau Afioga i le Fofoga Fetalai, ua matou manatu, o le a seu i fanua se matou faamatalaga. E ui i le naunau i le avanoa faaauuro ua tuuina mai mo lenei sui usufono, ae manatu e le sili le toa e aea le olo i lo l na te pulea lona loto. Ia lagi e mama ma ia faafualoa e le Atua le soifua o Lana Afioga Mamalu O le Ao o le Malo, faapea Sui o le Fono a Sui Tofia, lagi e mama i lau Afioga i le Fofoga Fetalai o le Maota, ia faamanuia le Atua i le Palemia ma le Sui Palemia ma le Aiga Kapeneta ma sui usufono uma o le Palemene. Ia manuia le tapuaiga a si ou itumalo o Aana Alofi Nu.2, aemaise o le faafofoga a Samoa ae ou ola i le alofa o le Atua. Soifua.

Na faaalua le agaga fiafia o sui usufono o le Maota i le patipati o latou aao i le maea ai o le Saunoaga Faa-Taupou a le sui usufono mo Aana Alofi Nu. 2.

FOFOGA FETALAI: Malo faafetai, ua maea ma faaii mai le saunoaga a le sui usufono mamalu mo Aana Alofi Nu. 2. Malo faafetai, o le lauga faa-Aana e faapena. Ua tatou taunuu mai i le taimi o le tatou malologa masani. Ou te faasilasila atu o le a faataatia ese Taulumaga a le Fono Aoao Faitulafono mo lana malologa masani e 15 minute. Faafetai.

Na faataatiaese Taulumaga a le Fono Aoao mo lana malologa masani i le itula e 10:49 i le taeao ma toe amatalia i le itula e 11:40 i le taeao.

Na toe faaauau Felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu. 2) 2015/2016 ma le Tulafono Tau Faaofi o le Faatatauina o Tupe 2016/2017.

FOFOGA FETALAI: Ou te faasilasila atu ua toe amatalia nei Taulumaga a le Fono Aoao Faitulafono.

Ou te tapa le Afioga i le Palemia mo sou finagalo i se lafo.

LAFO MO LE SUIA O ITULA FONO

Susuga Hon TUILAEPA FATIALOFA AUELUA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, ou te tulai atu e faatu le lafo, *Ina ia faataatiaese a tatou Tulafono Tumau 31(1) e avanoa ai itula Fono fou nei mo se taumafaiga ina ia uunai le tatou galuega mai le 9:00 i le 1:00 i le aoauli ona fai lea o le malologa, ona toe amatalia foi lea i le 3:00 seia maea i le ta o le 7:00 i le po.*

Ma le faaaloalo lava.

22 IUNI 2016

Lafo mo le Suia o Itula Fono

Faaluaina e le Sui Palemia, Minisita mo Pisinisi ma Alamanuia ma Leipa, Minisita mo Leoleo, Auaunaga o Tineimu ma Faalavelave Tutupu Faaquasei, ma le Minisita mo Faatoaga ma Faalapotopotoga o Suesuega Faasaienisi ma Faigafaiva.

Na faamaonia le lafo.

Na toe faaauau Felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu. 2) 2015/2016 ma le Tulafono Tau Faaofi o le Faatatauina o Tupe 2016/2017.

FOFOGA FETALAI: Ma o le avanoa foi lenei ou te tapa ma le faaaloalo se isi sui usufono mamalu o le Palemene e tulai mai e saunoa mo le tatou galuega. Ia, atonu e manaia lenei avanoa o lea lava e lelei le lava o le tatou taimi faigaluega, e manaia foi ona felafaoi.

O le avanoa mo se isi sui usufono e fia saunoa. Ia, tulai mai le sui usufono mamalu mo Gagaifomauga Nu.3, tulai mai le sui usufono Tamaitai e te saunoa e tusa ai o le tatou galuega. Ma o le uluai Paeaiga foi lenei ua tulai mai ai le Afioga i le sui usufono mamalu mo Gagaifomauga Nu. 3. Tulai maia ia manuia lau saunoaga.

LAUGA FAA-TAUPOU

Afioga FAAULUSAU ROSA DUFFY-STOWERS (Gagaifomauga Nu. 3): Faafetai lava i lau Afioga i le Fofoga Fetalai, ua maea foi le malu taeao aua se faasiliga malosi o le Maota Fono nei, ae faafetai tele i lau Afioga mo le avanoa faaauau ua mafai ona tuuina mai mo lou nei sui usufono mai le Gagaifomauga Nu. 3.

Mapu ane ia i taputoa oe le alii seu, ae ee ia i vaatapu ou paia sausaugata Samoa aua o oe o le aomamala i le afio o Lana Afioga Mamalu O Le Ao o le Malo, lau Afioga Tui Atua Tupua Tamasese Efi ma lau Masiofo, afifio o a outou Afioga i Sui o le Fono a Sui Tofia ma a outou Masiofo. Afio lau Afioga i le Palemia lau Susuga Tuilaepa Sailele Malielegaoi ma lou faletua. Afio lau Afioga i le Sui Palemia, afifio a outou Afioga i Minisita o le Kapeneta, afio lau Afioga i le Fofoga Fetalai, afifio a outou Afioga i le mamalu o le Palemene o Samoa.

Afifio le paia o le Afaigaluega a le Atua i fatafaitaulaga e fia, o le paia lava lea aua Aiga ma latou Tama, o Tama foi ma Aiga, Pule ma Tumua, Itua ma Alataua, Aiga i le Tai ma le Vaa o Fonoti, ma le mamalu tele o le Tafatolu o Faigamalo a Samoa.

E le faagaloina i le loto lo tatou vatapuia ma o tatou uso a tuaoi, le paia ia Sua ma le Vaifanua, Fofu ma Aitulagi, Saole ma Saleaamua ma le Launiu na Saelua, le Tama a le Manua ma Tootoo o le Faleula, le paia ia te oe le Manuatele ma oe le Faatuiolemotu. O ou paia na Samoa.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

Lepa ia la i le foe ae mapu ane i le too, ae se i ou liliu ane isi ou itumalo pele o Gagaifomauga Nu. 3, e amata mai lea i Fagae seia paia Aopo. O le a ou amata mai la i Aopo leaga o lea ou te Faaulusau mai i Aopo, isi ou nuu pele Aopo, i le afio o le Aiga o Mavaega, afio o Eetau ma le Ati Eetau, afio Tauaanae ma Matofai, alaalatai lau fetalaiiga Pao ma le falelima o Saeseese, aemaise o le afio o le Tapaau o le Tagaloa Aopo.

E le faagaloina foi si ou nuu o Letui i le afio o Aiga, alaalatai le nofo a ituaiga ia Fatua ma le Falelupe ma lau fetalaiiga Fiu, o le mamalu lava lea i le Faletolu. Susu mai foi Sa Tupua ma Sa Malietoa, le Matua o Leasi ma le aiga ma lou vaa fetalai, afio mai e na faasaosao ma le faapea Usoalii o suafa, alaalatai lo oulua Falelua, Saletolo ma Salealiifano, o le mamalu lava lea i le Faletolu. Afio mai foi Polataivao ma Saigoa, alaalatai le mamalu i le nofo a vaega ia Saitupua ma Leatiluatoa, o le mamalu lava lea i le faletolu.

E le mafai ona ou faagaloina le aufaigaluega paia a le Atua o lo o faafalelemalu i so o se fatafaitaulaga o si ou itumalo aua e faigata lau faaaloalo ma lau faaeaea i lou nei tagata faatauvaa. O ai ea ua outou sii ai le fale o Asomua i le mauga, ua malie le papa nai Galagala, ua malie le papa nai Tu , ua malie le faatolotologatama e pei o le tala i le fale Salemuliaga, ua ou tiu ai nei ua ou inu, ua ou malie, ua ou sapaia faatuaeleele la outou faaaloalo. E le i faigofie ona to mai la outou faaaloalo, ae o lea ua filitupetua i le pule a le Atua ou te tiu ai faamatalaao aua le suigaula i le papa nai Galagala.

Lou itumalo e, tuu maia la outou faatuatuaga o le a ou galue ai mo lenei lima tausaga aua se manuia o le tatou itumalo aemaise o Samoa atoa. E lua tai na folau ai Samoa anamua, o le tai o Alo ma le tai o Tigilau. Ou te le fia faaaogaina la le tai o Tigilau, e manino luga ae nenefu lalo, ae ou te fia faaaogaina le tai o Alo e manino atoa luga seia paia le alititai. O le finagalo foi lea o le Atua ina ia faia Lona finagalo i le lalolagi pei ona faia i le lagi. E pei ona faatonu e Tavita lona agaga ma faapea ane, òLou agaga e, ia faamanu atu ia ia Ieova, o mea uma foi o ia te au, ia faamanu i Lona suafa paia. Lou agaga e, ia e faamanu atu ia Ieova, aua ne i galo se mea e tasi o ana meaalofa.ö E faapea se agaga ia te au le Atua, o lau pule lea, faafetai i lou faamaoni, aua o oe na tofia lou nei tagata e ala i le musumusuga a le Agaga Paia i lou itumalo.

Lau Afioga i le Palemia, e momoli atu lau faafetai faapitoa i lau Afioga ma le Faigamalo i le Paeaiga ua mavae atu, e tusa ai ma le Tulafono ua amanaia ai le sao o le matou itupa, le itupa lea o tina ma tamaitai, ua mafai ai ona ou pale mai ma faamanuiaina ai lou nei tagata i lenei foi Paeaiga i lou itumalo.

Lau Afioga i le Taitai o le Malo, lau Afioga i le Palemia, e momoli atu lau faafetai faapitoa, lau Afioga ma le Faigamalo i le Paeaiga ua mavae atu e tusa ai ma le tulafono ua amanaia ai le sao o le matou itupa, le itupa lenei o tina ma tamaitai, ua mafai ai ona ou pale mai, ma faamanuia ai lou nei tagata i lenei Paeaiga.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

Lau Afioga i le Fofoga Fetalai, e leai lava ni galuega foi lea, o ni mea tetele o e tuitui ai si ou itumalo aemaise a nai nuu ia o Aopo ma Letui. O le tulaga foi o le ma itumalo lea e i ai nei, faafetai tele lava i le Afioga i le Palemia, le Taitai o le Malo i le tausaga ua mavae, le Paeaiga ua mavae, ua mafai ai ona toalua i maua nei i le Maota nei. Ia o lou nei sui usufono ma le Afioga ia Laauli, o le Minisita foi lea o Faatoaga ma Faigafaiva. Ma e ou te talitonu foi, atonu o lena foi o lo o... a misi atu ni mea ou te avatua mo le faaleleia o le ma itumalo, ia o la e foi o lo o nofo i totonu o le Kapeneta, e mafai ona ia musumusu atu i le latou vaega aua ni atinae o le matou itumalo. Ma e faapena lava ona ma fai mea fealofani, e ma te felafofai foi, o a foi ni mea e manaio ia ou te sau e faaleo atu iinei, e faapena lava.

Pau lava lea o le lagona o lou itumalo i le Tala Faatatau o le Tupe e pei ona folasia, o le agaga o le faafetai ma le faamalo, o le agaga o le tofa saili aua le silasila totoa i le taumafaiga lea o ni alafua aemaise o le silasila mamao, ina ia mafai ona faaleleia ma sii le tamaoaiga o si o tatou atunuu o Samoa. Po o a foi lava ni naunautai, po o ni atinae e fia faaleleia o lou itumalo, ia ou te talitonu, o lou taimi muamua lenei, ia o le tausaga muamua foi lenei o lau Paeaiga. Ae e talitonu e faasoa mai lava e le Matai Sili i le lagi le soifua ona faapena ai lea ona musumusu atu foi i le la itu i Minisita o le Kapeneta e faapena ona fesoasoani mai i le atinae o lou itumalo.

Ae na pau lava o lea, na o le lua lava ia nai Matagaluega e fia oo i ai se lagona ona o le mea foi lea sa sau ai le Paeaiga ua mavae, o le ave lava lea o le faamuamua i le Soifua Maloloina ma le Matagaluega o Aoga. Ma e ou te talitonu foi, ua loa foi ona i ai le miti lea a le Malo, ina ia tutusa le aoga iinei i le aoaoina o le tamaititi aoga i Malifa, ma le aoaoina o le tamaititi Aopo, ina ia mafai ona o tutusa lelei le aoaoina o tamaiti i vaega ia. Pei na pau lava si tuualalo i lau Afioga i le Minisita mo Aoga, ina ia matua uunai le Matagaluega aua le faataatiaga o ni metotia ma ni alafua ina ia mafai ai ona ausia lenei faamoemoe. Ia amata mai lava i le Pre School e tau i aoga maualuluga a le Malo. Sa ou manatu lava faapea, pe a ae faalaugatasia i lea taimi ma lea taimi pei se audit check se Pepa Suga National mai level eseese ina ia mafai ai ona iloilo lelei ai e le Matagaluega o Aoga po o oo lelei le kilivaina o le Curriculum i totonu o level eseese o aoga i tua, ma aoga i Upolu nei. Ma o se outcome foi o se National Exam e fai, e mafai foi ona iloilo ma le capacity o faiaoga o lo o aoaoina tamaiti i nuu i tua aemaise a nuu ia o Savaii ma nuu i tua. E leai se mea o i ai i aoga o lo o i Apia nei, ona o lea o lo o i luga lava o le laina, e pei o nuu i tua lava lea e faaletonu. Ma o le miti la lena o lea ua tulituliloa ai se lagona, ina ia mafai, ina ia oo lelei le kiliva lea i aoga ia i tua.

Lau Afioga i le Minisita mo le Soifua Maloloina, o le matou falemai lea i Safotu, ia o le tele lava o vaiaso e leai se foma. Ae o le talosaga lava lea, ou te talitonu ua faataatia ia le fale fou o le a mafai ai ona maua se fesoasoani i le vaega lea.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

O lena na ona ou toe faamauiina, o se lagona lea i se fomai lea mo le matou falemai lea i Safotu, ona o i e agai mai ai lou itumalo lea amata mai i Aopo seia oo mai i le itumalo o si ou tama lea o Faasootauloa i Saleaula. Ia na pau lava na o nai lagona o lo o i ai i lou itumalo i lenei itula, ia ae ou te matua ou momoli atu le faafetai i lau Afioga i le Minisita o Tupe, e matua lagolagoina ato e lou nei sui le tatou Tala Faatatu o le Tupe ua folasia. Ae ou te talitonu ma le atoatoa o le tofa saili na iloiloina ai le Tala Faatatau o le Tupe lea, ia na to mai lagi. Ma o le lagona foi lena o lo o i ai, leai foi la ma se manatu, ona ou te talitonu atoatoa, ia o le folasaga ua i ai le tatou Tala Faatatau o le Tupe. Ia o le tatalo, ia alofa mai le Atua ina ia ausia le faamoemoe lea, o lenei Tala Faatatau o le Tupe.

Ua uma se tautalaga a lou nei sui usufono lau Afioga i le Fofoga Fetalai, ia ae ia faamanuia mai le Atua i lau Afioga i le Fofoga Fetalai, le Afioga i le Palemia, lau Afioga i le Sui Palemia, le Minisita o le Kapeneta, o Afioga i Minisita Lagolago, ia aemaise foi le paia maualuga o sui usufono a le Palemene o le tatou fonotaga o lenei aso. E faapea foi ona faamanuia le Atua i le tapuaiga a Samoa o lo o faafogafoga mai, aemaise O Le Ao Mamalu o le Malo ma Sui o le Fono a Sui Tofia, ma tulaga uma faapea. Ia faamanuia mai le Atua i le tatou fonotaga. Soifua.

Na faaalua le agaga fiafia o sui usufono o le Maota i le patipati o latou aao i le maea ai o le Saunoaga Faa-Taupou a le sui usufono mo Gagai fomauga Nu. 3.

FOFOGA FETALAI: Malo le saunoa faafetai ua faafogoga le itumalo, aemaise o le atunuu i le saunoaga a lau afioga i le sui usufono mamalu. Faafetai tapena. Ia ua avanoa foi le tatou fonotaga mo se isi sui usufono mamalu ua faapena ona fia saunoa. Tulai maia se sui usufono e saunoa i le tatou galuega. Ia malo faafetai, ia o lea ua tulai mai le sui o Vaisigano Nu 1. E momoli atu le faafetai, o le tasi foi nei o sui usufono ua tulai mai o lona uluai Paeaiga lenei ma lana nofoaiga fou lenei, e avea ai ma sui usufono o le Palemene o Vaisigano Nu 1. Ia saunoa ia lau Afioga i le sui usufono mamalu.

LAUGA FAA-TAUPOU

TOFA LOPAOO NATANIELU MUA (Vaisigano Nu. 1): Faafetai i lau Afioga i le Fofoga Fetalai, le mamalu o le Maota nei, faafetai mo lou avanoa e fai ai se sao o lou itumalo, aua le fono usu a Samoa. Ae ou te le i taia le tutafaitoa sa see lilia ai Saveasiuleo, pe ou te sosoli foi le faafaufau o tapu ma sa o faatamasoaliiiga, ou te sosoli lava ma le faaeteete, ina nei meane ua ula sa le fono, ona le soo lea o le tai ao, ona avea lea ma aleu ma sese o le tamaloa mai Asau.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

Ae tulouna ia le faafofoga tapuai mai a lau Afioga O Le Ao Mamalu o le Malo, lau Afioga Tui Atua Tupua Tamasese Efi faapea foi lau Masiofo, tulou o la outou Afioga i Sui o le Fono a Sui Tofia, lau Afioga Tuimalealiifano Vaaletoa Sualauvi II ma le Masiofo, lau Afioga Tuiloma Pule Lameko ma le Masiofo, faapea foi lau Afioga Le Mamea Ropati ma lau Masiofo. Faatulou atu foi i lau Afioga i le Palemia, lau Afioga Tuilaepa Sailele Malielegaoi, faapea foi lau Afioga i le Tamaitai Sui Palemia, lau Afioga Fiame Naomi Mataafa, faatulou atu foi i le saofaiga i Minisita o le Kapeneta, faapea foi Minisita Lagolago. Ia faatulou atu foi i lau Afioga i le Fofoga Fetalai o le Maota, faapea foi le Afioga i le Sui Fofoga Fetalai o le Maota, faapea foi alii ma tamaitai faipule o le Maota o Samoa. Faapea foi ona faatulou atu i le Afioga i le Faamasino Sili ma le mamalu o le Ofisa o le Faamasinoga, faapea foi ona faatulou atu i le paia ma le mamalu i ulu ma Faauluuluga o Matagaluega a le Malo faapea foi Pisinisi Tumaoti o le tatou Malo.

E faapea foi ona ou faatulou ma faatalofa atu i lau Afioga i le Failautusi o le Fono lau Afioga Fepuleai faapea foi le mamalu o le tatou Ofisa, ae le mafai ona matou faagaloina le tapuaiga mau a le Afaigaluega paia a le Atua o lo o faanonomanu ma faafalelemalu aua le tapuaiga o faiva o le tatou Maota nei faapea foi le tatou atunuu. O taitai ma faauluuluga o ekalesia eseese faapea foi le Afaigaluega galulue i so o se feau, e le gata i totonu o Samoa nei ae o atunuu i fafo.

O le paia lava lea i Aiga ma Tama, o Tama foi ma Aiga, mamalu tele ia Pule ma Tumua, Itua ma Alataua, Aiga i le Tai ma le Vaa o Fonoti. Faatulou atu foi i le faafofoga tapuai mai a o tatou uso i Sasae, le Afio o Sua ma le Vaifanua, Fofu ma Aitulagi, Saole ma Saleaamua, ma le Launiu na Saelua, ae tainane le motu sa aua le Laau na Amotasi, le Afio o Alii faapea foi le Alii o Faatui, ma le mamalu o Tootoo o Faleula, ma upu ia te oe Manuatele tulou lava.

Ae le mafai lava ona faagaloina si ou itumalo o Vaisigano Nu 1. E ao lava ina ou lia faafoea le tautai ae, tatala foi le faautouto i le tulaga o le vaaloa o lo outou Sa ma Faiga, leaga o la outou tofa ma la outou faautaga, ua ou pale ma seei ai i le nofoa o le ta itumalo. Ua susu ma ee ai aiga, le paia i Aiga ma Salafai, o Aiga o Tupu, o Aiga o Nofo, Aiga o Papa, Aiga o Falefa, Aiga o Samoeleoi, o le Aiga Salilomaiava, o le na toala fanau fai, faaautamaina e Tuiatua ma Tuiaana. O lea e faatuloua atu ai i le paia o Aiga o Mavaega i le susu o lau Susuga Tufuga ma le paia o le Aiga, Afio o lau Afioga Matua ia Masoe ma le toalua i ai. Faapea foi le afio o lau afioga i le Maopu lau Afioga Tupua. Alaalatai le mamalu ia Salafai faaituala lua i le Falefia ma Siu o le Fanua faapea foi lo oulua sa tautai lua Fao ma Mua tainane le mamalu o faletua ma tausii saao ma tamaitai malosiaiga ia uamaga ma ava a aumaga, tupulaga o tama ma teine aemaise fanau o le itumalo.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

E faaapea foi ona matou faatulou atu ia Tapaau ma le gafa, i le afio o lau Afioga Toomata, Susu lau Susuga i le Gafa, lau Susuga Vaepule, afio lau Afioga i le Aloalii lau Afioga Vaai, mamalu mai oulua Tama Taulauniu ma Tuiasau, malii mai foi oe Sa Oloapu ma upu ia oe Safune. Faatulou atu i lau Afioga ia Lealiifano Valevale faapea Tapumanaia ma le afio o le Toalima ma upu ia te oe Safune. O paia ma mamalu na o le tatou itumalo. Ia ee laia i o outou fala le gae, mapu ane i fala matu ma fai malie le filiga ma le mataigatila, ae se i ou taumafai e faaleo sou finagalo ma faufau se manatu aua se manuia alu i luma o le ta itumalo e toomaga i ai nei, taeao ma i lu .

Lau Afioga i le Fofoga Fetalai, e fia momoli atu le faafetai i lau Afioga i le Minisita o Tupe ona o le folasaga matagofie o le Tala o le Tupe ua faapea ona tuuina mai i le Maota. Ae muamua ona ou fia tautala atu ma le ava ma le agaga faaloalo e tusa ai ma mataupu e faapea ona moomia mo lou nei itumalo.

E muamua ona ou amata atu i lau Afioga i le Minisita mo Aoga, Taaloga ma Aganuu aua se í O lo o i ai se manatu faapea, o le mamao o lou itumalo mai Apia, e i ai le upu faa-Peretania foi lele, out of sight out of mind. Ua avea le mamao ma mea ua faafaigofie ai ona faagalo i manatu o Matagaluega ae peitai i lou tulai mai ma ou faafeiloai atu i le Matagaluega faapea lau Afioga i le Minisita ua tau i ai se suiga. O lea e momoli atu ai le agaga faafetai. E i ai vaega o le tulaga faale-aoaoga o lo o manaomia ma fautuaina ai le mamalu o lenei Maota ona a tatou vaai aemaise lou lava itumalo. Ou te talanoa mo le Kolisi i Asau, o le 80% o faiaoga o Diploma Graduate ae na o le 20%, Batchelor graduates 20% na o le 4 faiaoga. E le na ma se laina, a faapea e fia silasila i ai i aoga lea i Upolu nei, e mautinoa e toatele atu le tatou au graduates po o tagata ua iu mai i faailoga maualuluga nai lo nai fanau ia fai Diploma, ia ae o le Kolisi le mea. O lau fesili ma le faaloalo lava i le mamalu o le Maota, o le a faapefea la ona popoto tamaiti o lenei itumalo pe afai o lea? E fia ni Inisinia, e fia Loia? E fia faitau tupe foi ia fanau a lenei itumalo. Ae peitai o le faavae e le o mafai ai e fanau o lenei itumalo ona ausia se isi matatia i luga atu o le mea o lo o mafai ona fai nei. E pei o le ala lena na fai atu ai se faamatalaga i le amataga a mamao lava i tua, ia ua faapena foi ona galo i finagalo ma loto.

Lau Afioga i le Fofoga Fetalai e avatu ai se talosaga ma le ava tele, afai e mafai ona ave le formation level e fai i totonu o Kolisi, atonu e mafai ai ona avatu ma isi faiaoga lelei ave ai i tua ma le tele o tamaiti ia e o atu i le NUS aua fai mai le Pule o le NUS e \$15,000 le tupe e faatupe ai le tamaititi toatasi e faatino ai ana aoga i totonu o le NUS. Ia atonu e i ai foi sina auala e mafai ona fesoasoani ai ia ma avatu ai ni faiaoga lelei ma tele ai ni tamaiti o le a feololo lo latou taumafai e ausia ai le o i luga e faiaoga. O le mea moni lau Afioga, o le level lea enter mai ai tamaiti e omai i le aoga faafaiaoga, o se mea i lalo o le 10 agai i le 20 le faatulagaina o maka.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

O le foundation lea e pasi i le 15, pe a, o lona uiga la o tamaiti ia e i lalo ifo o tamaiti na lea lau mai i le tatou aoga. E le faapea e talitua lima pe upu leagaina le taumafai o fanau o la foi e i ai lunivesite ua mafai ona tuutuu atu iai i luga lo latou taumafai e fai se isi mea. Ae talosaga atu ma le ava tele e naunau tele le sui usufono i le lelei o le itumalo, aua o le tali o le tatou faafitauli tau tupe o le atamamai o tatou fanau ma le lumanai o tatou fanau. Ae afai la e le o faia se auala e lava tapena ai a tatou fanau mo le lumanai ou te manatu lau Afioga o le a faapea ona faaletonu, tailo i isi itumalo a o lou itumalo.

Ia ona ou oo mai lea i le Matagaluega o le Soifua Maloloina, faafetai i lau Afioga mo le lipoti, a o nai mea e aafia ai le matou itumalo o le vaitaimi lea na sioki ai vai. Ia e le gata i lena, o le leai o se fomaini Doctor e fia alu atu e nofo i Savaii, ua uma le vaitaimi lea sa i ai Salausa. Na iu mai lava Salausa i ana aoga faafomai alu atu nofo i Sataua, ai ai lava e namu, ma tauanau atu e nisi o falemai e toe foi mai le Afioga Salausa ae lelei tele lena vaitaimi. Sa lelei foi le togafitiga ma le vaavaaia o si o matou itumalo, ia ae ona la o le taimi lena ua le toe i ai ni fomaini o toe fia o atu e nonofo i o. Pe le tataua ona toe silasila le Matagaluega pe le fai ni fale mananaia e o atu fomaini e nonofo ai, ina ia mafai ai ona faafiafia le loto. O lea foi ua i ai aoga a le faatuatua i o pe a faapea e iai ni fanau e popole iai nei tei ua leai ni avanoa e aoaoina ai, ae se i vagana public school ia o lo o i ai nai ogaoga e moomia le toe faaleleia, ia o le talosaga atu lena.

O le Pepa a le Palemene 2016/2017 Nu. 2 faasamoa itulau e 326, o lo o i ai ni fuainumera e faapopoleina ai lena tagata. O le aofaiga o le talavai i le tausaga lea na proposed ai e 356,400, a o le aofaiga na ausia e 397,980. O le aofaiga o lo o fuafuaina e 377,190, ua ala ona ou taua lea tulaga lau Afioga, ona e toe tupu foi le mea lea na tupu i le tausaga na tea atu nei ua le lava tatou vai. Ae na sili ona aafia lou itumalo, na ou tauanauina ia le Afioga i le Minisita faapea foi le Matagaluega i nai vai e avatu i lou itumalo. Afai na ova i luga le talavai na fai nai lo o le fuafuaga a o lea foi ua toe fuafua atu e le ova ma le mea sa i ai i le tausaga na tea atu nei, e i ai lou lagona e toe tupu foi. E feoloolo nei i Upolu la iai fale talavai a o Savaii e tasi a le fale talavai na o le falemai. O le mea lea e talosaga ai i lau Afioga, pe mafai ona toe silasila ane, e tele lava isi mea e fia talanoa ai ma auiliili le Tala o le Tupe ae peitai ane lau Afioga, e utiuti le taimi. Na ona faapuupuu atu o sou manatu e uiga i se auaunaga a le Soifua Maloloina, pe mafai ona toe silasila ane i le tulaga lea.

Ia ona ou oo mai ai lea i le Ofisa o Galuega Tetele a le Malo, lau Afioga i le Minisita e auala atu i lau Afioga i le Fofoga Fetalai, o le uafu i Asau ua leva ona taatia lena aseta aupito sili ona taua. Na faimalaga atu foi nai aufaipisinisi e fia taula o latou vaafagota i le matou uafu, ia ae peitai ane e i ai le faafitauli e leai se vai. Lau Afioga i le Fofoga Fetalai e i ai auala e maua ai le vai ae le o lava le sailiga. O Asau e vai spring water uma lava lalo o Asau i le mea la e i ai, o lona uiga e iai le mea la e ala ai ona mafua le i ai o le mea lea.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

Lau Afioga i le Fofoga Fetalai e avatu le talosaga a lenei nuu ma lenei itumalo, alofa se i toe sailiili ane ma se i toe sailiili ifo o lo o tele vai la e fau i Asau ae pau a le mea manaomia tonu le mea o lo o tu ai le tube lea tatau ona fai ai. Ae ua manaomia nai a matou auala galue e fia fai, silasila lau Afioga o le matou itumalo e tele ai le koko o lo o tele le demand o le koko i lenei vaitaimi. E talosaga atu i lau Afioga, aua le faataina na o le fai lava o le auala foi lele e alu i gauta tau i uta i le mea lea e i ai le Tuasivi, ae tuu pea faitalia matou ma teuteu. Ia ae talosaga atu tai ono masina ma avatu se grader ma se lola e tau omiomi ai le auala se i tulou le aoauli. E tau omiomi ai i lalo i lea taimi ma lea taimi, ae a faapea lava e le o faia e matou le tausiga ia aua le toe faia ae faamolemole aua le faataina leaga e tele le tau o le galuega pe a faata.

Lau Afioga i le Fofoga Fetalai ona ou oo mai ai lea i le Ofisa o Faatoaga, tele ia o le poloketi lea sa faatino i lalo o le SACEP, a o le koko o lo o manaomia e le tele o lou itumalo. E pei ona e silafia e i ai le koko lea e ave e Wildercon i le latou faigapaaga ma le Tofa Saleimoa Vaai e le gata i lea o le Afioga i le Aloalii. O faatoaga koko tetele ia ae o le lipoti lata mai e le o lava tele le tou fesoasoani. E i ai foi nisi o le matou nuu na oka ia koko i le tausaga lea na tea atu nei ia Mati, o lenei lava ua Iuni e le i avatua se mea uma atu le paleni. O lona uiga lau Afioga a faapea e tiai uma isi mea mo le itu Asau ae avatu na o le koko ma le talo, o le tali tele lea i faafitauli o le Afioga i le Minisita o Tupe e tele le sao o le tatou Ofisa o Faatoaga, tele le sao o tatou faatoaga. A o lou manatu e le o lava le tatou aufaigaluega, afai e tausaga atoa o faatali ia koko e nisi o faifaatoaga o lona uiga e le o lelei le tatou tali atu ma le faatinoga o le tatou poloketi lea fia miliona lea e alu ai. E manaia le taatiaga o le poloketi lea i ai, but e le o lelei le faatinoga o le tatou galuega lau Afioga, a ou nanaina, e leai se tatou mea e maua. O lea ou te tilotilo atu i le Tala o le Tupe a le tatou Minisita o Tupe o le tatou deficit e \$78miliona lea nono mai le \$98miliona e tau poupuu atu ai le tatou Paketi o lenei tausaga. Ae ana faapea e tali mai le tatou Ofisa i tatou Faatoaga e tele le fesoasoani mo le Afioga i le Minisita o Tupe faapea foi le tatou Malo i le faatinoina o le tatou atinae.

Ona i ai lea o si avanoa lenei e fia faaleo ai lau faafetai i le Pulega a le Women in Business, o lo o matauina le tele foi o le sao o lea auaunaga tumaoti i le tatou galuega faatino o lo o latou export ina le Virgin Oil ma latou export ina le koko, e tele a latou galuega lea fai. A fai atu foi a e aumai le kofe i le masina fou, e o lava aumai. O lona uiga lau Afioga i le Fofoga Fetalai ma le mamalu o le Maota nei, ou te le iloa pe i ai se tatou fesoasoani i nei ituaiga Faalapopotoga. Ae o lou manatu na o au e tatau lava ona i ai se isi \$2miliona a le Ofisa o Faatoaga e ave i ai atonu e sili atu ona lelei le auaunaga a lea vaega ina ia mafai ona faaoga tatou laueleele, aua o le mea lea ua fai mai nei o le a aumai Saina e faasino mai ia tatou le galueaiina o le tatou laueleele.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

O lea lava tatou te iloa fai e iloa lelei lava e le itu Asau fai le koko, a o lo o manaomia lava le fesoasoani a le Matagaluega. A le o lena foi o nai tagata ia pei ona ou taua atu suafa o nai tamalii, toe ave i ai ni tupe e toe faatetele ai toga koko, aua o lena tou te iloa tagata nei. Fai mai Vaai i aso ia ou te manatua pea le upu a Vaai o tupe la e maua i lalo o le koko, lalo o fai ma lalo o niu. E moni, e moni le tala lena ae o lo o manaomia le lagolagosua a le tatou Matagaluega ina ia mafai ona lelei le faasologa o le tatou atinae faafaatoaga e fesoasoani ai i le Tala o le tatou Tupe lea e manaomia le \$98milion. O lea e ala ai ona maua mai le \$74milion e maua ai tupe faaalu i tupe maua lea manaomia ai le nonogatupe lea e \$98milion. O lau fesili atu foi la i lau Afioga i le Minisita o Tupe, po o fea le mea lena e aumai ai lea nonogatupe mama le tului, ae pe fia foi le tului, aua na ona faapena mai ia ae fiu lava e sue atu i totonu o le auiliiliga o le Tala o le Tupe e le o i ai ni mea faapena, o lona uiga o lo o i ai nisi.

Ae ui o lea lau Afioga i le Fofoga Fetalai, ona tatou oo mai ai lea i le Ofisa o Faiga Palota, leaga o le finagalo lenei o le finagalo o lou itumalo pau lava lenei o le nuu pule o Salafai, e leai so latou tofi. na o Asau. Ua faatiga taliga foi le Afioga i le Aloalii fai mai aveese le sui o Asau ma le itumalo, na o ona tuu atu tafatafa o lau Afioga, silasila ane i ai, po o le a se finagalo o i ai, ae pei e manaia foi pe a tasi le sui o le itumalo o Asau. Ia fai le sui o Vaisala ma Auala pe a finagalo i ai lau Afioga i le Palemia ma le mamalu o lenei Maota. Ua faaiuiu atu le matou manatu na ona ou toe seu tasi atu lava i le Taulaga i Asau, lau Afioga i le Palemia le Taitai o le Malo, e auala atu le matou talosaga i lau Afioga i le Fofoga Fetalai, pe a faapea e lelava ia tatou seleni o se tuualalo atu pe le faa privatise lena port ae aumai se tagata e fesoasoani i ai te i ua pala le uafu, se i tulou le tatou Maota, e le i toe tuta ai se vaa karasini po o se vaa suauu. Ae o lo o i ai le Kamupani o lo o fia o atu e fia faaoga le matou uafu, ia ae paga lea e noatia ia o matou apaau i le pulega a le malo. Ae le o faapea o fai atu e aumai i le matou nuu le pulega e leai, atonu o lau Afioga e silafia mea uma ma tagata uma e o mai i lou Ofisa e fia fai ni mea faapea atonu o lo o i ai se isi e fia developina le uafu ona fai lea i ai se tulaga a la ua i ai customers already. O le isi e 30 lona fuavaa e fia omai i Asau. Ou te mautinoa o lena e silafia e lau Afioga ia ae se i e silasila ane i ai aua e aoga i le matou tamaoaiga o si o matou itumalo. O le mea lea e ala ai ona ou tetele atu ma augani atu faatoaga, aua na o le pau lena o tupe i le taimi nei, ae manaomia lava se galuega tele mai i lo outou mamalu i le ofisa o Faatoaga ina ia faaleleia le tamaoaiga o le matou itumalo ma faaleleia le faatoaga o mea na ua i o, o la ua matou galulue, uiga, o eleele la ua i ai ma ua galulue ai i le taimi nei.

Lau Afioga i le Minisita mo Galuega, ua faigata a le o i uta i auala. O Vaisala, o Auala ma Asau, aua le faataina ae na ona fai a faalelei, build le auala ia na ona faaoga lava o le base course ia, aua le faataina pau a le mea ia mafai ona o i uta taavale mananaia a nai o matou itumalo ina ua sui le itu e feoai ai.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

Ia faafaigofie ai foi galuega ma mea faapena o le matou itumalo. E tele a manatu, e tele a manao, ae e umi foi le tatou mafutaga i lenei 5 tausaga, ae na ona ou faapea atu, o nai nisi na o matou manaoga, tuulafoai atu tuu atu i outou luma, le mamalu o lenei Palemene lau Afioga i le Fofoga Fetalai, auala atu ai i lau Afioga i le Palemia, le Afioga i le Sui Palemia. Lena ua i lau Afioga foi i le Sui Palemia le talosaga mo le taligalu ona ua afaina tele se tasi o matou afioaga, ia agalelei ma alofa ane se i e silasila ane i le talosaga i lau Afioga faapea foi le Ofisa o Tupe Maua ma tatou Tourism. Ua fai sina concern o nisi o matou, o le fautuaga na aumai isi ou itumalo, pe a pe a maketi ese Savaii, maketi ese Upolu. Ona o le upu foi lele na ou taua muamua i luma o le tatou talanoaga sa fai, ua tele laau o le togavao ua le mafai ona iloa atu laau o le vao. We can't see the trees through the forest. Ia pei a fai faatasi Upolu ma Savaii, ia ae i ai le molimau faapea ai ana maketi na o Savaii, faapena foi le toatele o tagata e fia o atu i lo tatou motu o Savaii.

Lau Afioga i le Fofoga Fetalai, ia alofa mai, le Atua faapea ona fesoasoani i taulumaga o le tatou fonotaga faatoa amata, alofagia e le Atua lau Afioga i le Palemia, le Taitai o le Malo, lau Afioga i le Tamaitai Sui Palemia, le mamalu o le Aiga Kapeneta, faapea foi Minisita Lagolago o le tatou Maota, ia faapena foi le tatou itu nei na saunoa mai le Palemia, o tatou o le Itu Agai. Ia manuia le tatou fonu, manuia foi le faafofogaaga i lau Afioga i le Ao o le Malo, lau Afioga Tui Atua Tupua Tamasese Efi ma le masiofo, le saofaiga o le Fonu a Sui Tofia, ia i le mamalu i le Faamasino Sili ma le Ofisa o Faamasinoga, ia faapea foi tatou Ekalesia ma Faauluuluga o Ekalesia ma le afaigaluega Paia a le Atua o lo o faafogafoga mai i lenei aso, ia faapea foi le tatou atunuu atoa, ia aemaise si ou itumalo o Vaisigano Nu 1 mai Asau i Vaisala alofagia e le Atua lou tapuai faafetai.

Na faaalua le agaga fiafia o sui usufono o le Maota i le patipati o latou aao i le maea ai o le Saunoaga Faa-Taupou a le sui usufono mo Vaisigano Nu. 1.

FOFOGA FETALAI: Malo, faafetai saunoa i le sui usufono mamalu, se i tulai mai....

Susuga Hon Tuilaepa Auelua Fatialofa Lupesoliai Lolofietele Aiono Neioti Galumalemana Dr. Sailele Malielegaoi: Lau Afioga i le Fofoga Fetalai, ona o lo o noatia tatou i tu ma aga Faapalemene, e le faalavelaveina ai saunoaga faa-taupou a sui usufono. E pau lava le mea ou te faasilasila atu i vaega e lagalaga ai ia le manatu faasino i Matagaluega eseese. E i ai le taimi ona tali atu lea o Minisita ma faataoto atu ai foi nisi o gaoioiga o lo o faatino e le Malo e le o atoatoa i ai le malamalamaga o sui usufono o sausaunoa. O le tulaga lea i a tatou nonogatupe ona o le saunoaga a le sui usufono, e leai se mea o avatua e faasilasila atu ai.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

Ou te toe faatepa le mamalu o le Maota, i tatou Pepa mafiafia nei, le Tala o le Tupe o lo o auiliili atu ai. O lo o faamanino atu ai ma auiliili maea i le itulau faaroma XI, XII, XIII, XVI, XV, XVI, o auiliiliga uma o tatou atinae ia e faatupe mai i fafo. E le gata o atinae o lo o faatupe mai nonogatupe e mama le tului, a o tulaga foi o foai ia ma vaevaega e vaega eseese i Matagaluega, o lo o manino le auiliilina atu o le ala foi lea sa tau faaumiumi ai le taimi e amata ai le tatou fonu, ina ia lava ai le taimi e silasila ai sui aemaise sui fou. O le vaega lava o tatou nonogatupe uma mai le amataga e tau mai a i le taimi lenei o lo o togitogi pea. O lena o lo o auiliili atu i le itulau faaroma XXI, i le XXVII. E mafua ona faataatia uma mea ia e fola atu e le Malo, ona o lo o limataitaiina tatou i Tulafono o le Good Governance, Transparency and Accountability. Ia manino mea uma o lo o faatino e le tatou Malo, leaga o lea e agai i tua faasalalaua ia ma o lea foi e tuuaia ai le Malo i nisi o taimi tele o saunoaga e fai i fafo atu o le Maota lenei e le o avatua ia lea faamatalaga ma lea faamatalaga. A o lea o lo o manino lava i le Tala o le Tupe sa avatu manatua e ese le Tala o le Tupe saunoa atu ai le Minisita o Tupe, ma le auiliiliga mafiafia la ia e lua pepa ia toeititi a pei o le Tusi Paia le mafiafia. O lena la lea e alu atu uma ai a faamatalaga ia lea e lei silafia foi e sui. Ae o le mafuaaga lena e umi ai le taimi o tuu atu pepa nei ia lava ai le tou faitau ma le tou silafia. Lau Afioga i le Fofoga Fetalai, o le toe faaopopo atu lena a o le i saunoa mai nisi sui usufono.

FOFOGA FETALAI: Malo faafetai, o lea ua manino le faamalamalamaga e le Malo, ona o lo o faapena pei ona faasilasila mai ua manino le tatou Tala o le Tupe. Ia o le faasaoina o taimi o sui, ia aua nei toe taua lea tulaga, ia o lena ua faamanino atu e le Taitai o le Malo. Ia ma ua avanoa foi se isi sui mamalu e fia saunoa. Ia tele le tatou avanoa e uma ai a nisi o saunoaga se lua ae tatou te lei oo atu i le taimi malolo o lenei aso. Tulai mai se sui e saunoa.

Ia tulai maia le sui mai le itumalo o Siumu. Malo faafetai, ia ma o le saunoga faataupou foi lenei a le sui usufono mamalu ia e tusa ai o le nofoaiga ma le tatou Paeaiga lenei. Ia manuia le saunoaga a le sui usufono o le a saunoa.

LAUGA FAA-TAUPOU

Afioga FAALOGO IOSEFA SOPI (Siumu): E momoli le faafetai i lau Afioga i le Fofoga Fetalai mo le avanoa ua tuuina mai. Ia e manatu o le a le toe ta i tua se faamatalaga, ae o le a faaoga lenei avanoa faaauro i lenei taimi, e avatu ai se manatu o le sui mai lenei itumalo.

Ia e muamua ona faatalofa atu i Lana Afioga Mamalu O Le Ao o le Malo ma lau Masiofo, o le Vaa Nofoa Tolu, Sui o le Fonu a Sui Tofia, lau Afioga i le Palemia ma le Kapeneta, le Faamasino Sili ma le Aiga o Faamasinoga, le Fofoga Fetalai ma sui usufono mamalu uma o le Palemene.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

E faatalofa atu foi i Taitai o ekalesia kerisiano uma i totonu o Samoa, o lo o faafofoga mai. e faatalofa atu foi i Faauluuluga o Matagaluega ma Faalapotopotoga a le Malo, faapea foi Pisinisi ma Kamupani eseese o lo o faigaluega i le Malo. Ia o le paia lava lea i Aiga ma a latou Tama, o Tama ma Aiga, le Usoga ia Tumua ma Pule, Ituau ma Alataua, Aiga i le Tai ma le Vaa o Fonoti. Ia o tatou uso i le Motu i Sasae, le afio o lau Afioga i le Kovana ma lau Masiofo, le Kovana Lutena, le Fofoga Fetalai, ma sui usufono mamalu uma o Maota e lua, nuunuu atu ia outou paia ma sa ma faiga.

Lau Afioga i le Fofoga Fetalai, avea ia lenei taimi se i ou oo atu ai isi ou itumalo e pele ia te au, mai Siufaga seia paia Faletele amata mai Mauga tetele seia oo i maugaiti, i le susu o Faafeagaiga, o lo o nonomanu aua se manuia o si ou itumalo. O le paia lava lea ia Sa Asomua ma Aiga, Tuuu ma lo outou Aiga Sa Tuuu, le falelua o Tulafale ia Mano ma Faoagali, Lio o oe o le fofoga o le Alataua Utai Leuo ma le Faletolu. Ia e muamua ona momoli atu lau faafetai tele, i lou itumalo i le matupalapala ua outou tuuina mai i lou nei sui usufono. Faafetai i le manatu mai, faafetai i le faaeaea, ia tuu mai lo outou faatuatuaga i lenei lima tausaga, o le a taumafai la outou sui usufono i le mea e gata mai ai le taumafai.

Lau Afioga i le Taitai o le Malo, faafetai i galuega sa fai i le lima tausaga ua tuanai atu. Malo le faatoatoa, malo le galue, alo ane laia mo le isi lima tausaga, o lo o lumanai nei.

Lau Afioga i le Fofoga Fetalai, ia se i oo atu se faamatalaga i aiga Minisita o le Kapeneta. E muamua se faamatalaga i le Afioga i le Minisita o Tupe, e lagolagoina e lou nei sui usufono le Tala o le Tupe ua i lumamea nei. Ae maimau e pe ana tele ni a tatou tupe, semanu e le tau fai atu ni lauga. Ia ae e i ai foi le isi upu fai mai, a e iloa le mea e fai ae le faia, o le agasala lea. Ia o lea o le a taumafai atu ni manaoga, ia ma ni mea o fia faaleleia isi ou itumalo.

Lau Afioga i le Minisita mo Galuega, Felauaiga ma Atinae Eeseese, ia o lena ua tuuina atu le talosaga a lenei itumalo i se tusi ua oo atu i lau Afioga a Siumu, ae tau ina ou toe oo i ai i galuega ia, i auala i totonu o si ou nuu, i public roads ia e taua i le tusi, ou te iloa ua lua tausaga e le i toe oo atu i ai se vaega toe teuteu po o le maintenance. Ia e faapena foi ia auala galue i lenei nuu, tasi le auala galue na faia i le lima tausaga ua tuanai atu. E talosagaina foi le auala sima lea e latalata i le faleaoga ua tele ina faaleagaina ai meatotino a le Aoga pe a oo i le taimi e sua ai lea vai. E faapena le auala e tuafale cross island road a uma ane le lima tausaga ua faaleleia ia o auala e aoga mo turisi ma e malaga mai fafo. O le isi talosaga o moli auala atonu pau lea o le pito e le o i ai ni moli masalo pe na o le fa ni moli o lo o ola i le taimi nei. Na ona tuu atu i autafa o lau Afioga mo ni nai moli e ola i lenei vaitaimi.

Lau Afioga i le Minisita mo le Soifua Maloloina, faafetai o lea ua maua tala o le a le toe avea ni gasegase i fafo o le a taumafai e fai togafitiga iinei i Samoa ia atonu o le a sefe ai tupe ia ma maua ai foi le poto masani o susuga i Fomai o le tatou atunuu.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

Lau Afioga i le Minisita mo Faatoaga, Faalapotopotoga o Suesuega Faasaienisi ma Faigafaiva, e talosaga atu se mea toso vaa po o se ramp talu ona faia le taligalu i gataifale ua le o toe mafai ona tosoina i luga vaafagota o lenei nuu. Mo le silafia tasi lenei itumalo o lo o tautuaina le atunuu i vaafagota. Se i tagai ane foi lau Afioga i le faaaogaina lea eleele aua ua tele nuu ma alaafaga pei ua faaoga autafa o maota ma laoa e fai ai faatoaga ae ua faatuatuanai le toe agai i uta. Pe le o auala galue ea le mafuaaga ua ala ai ona le oo tagata i uta e faaoga fanua ma gaioi.

Lau Afioga i le Minisita mo Aoga ma Taaloga ma Aganuu, e faamoemoe o oe le isi tagata sa e taalo i le Manu Samoa se i taumafai aʻe le tatou au ua tauau ina seʻeseʻe malie atu i tua. Ua tauau ina le toe mafaia e tatou ia Fiti, ia ae tatou talia le taaloga ma Tonga i le Aso Toonai nei. E talosaga foi le malae o si ou aoga i Palalaua pe mafai ona toe tagai i ai na o le level lava le mea e manaomia i le taimi nei. Ia ou te iloa na o le pau na o nai talosaga o lo o fia molimoli atu i lenei itula, o nai motugaafa na, o nai talotalo foi na sei iai foi se isi taimi o se isi fonu ia ona tuuina atu lea o nisi manatu.

Lau Afioga i le Fofoga Fetalai ia faatasi le Atua ma le Fono mamalu a Samoa, a i ai se pati ua sala e matua atu i ina, manuia le tapuaiga a Samoa manuia le Fono, faafetai.

Na faaalua le agaga fiafia o sui usufono o le Maota i le patipati o latou aao i le maea ai o le Saunoaga Faa-Taupou a le sui usufono mo Siumu.

FOFOGA FETALAI: Malo faafetai manatu i le tatou galuega a fai nei malo tapena malo foi le saunoa ma le lauga faatoeaina, aemaise a oe le Itumalo na falefa iai Atua ma le o upu masani. Ia malo faafetai i le saunoaga a lau Afioga i le sui usufono mamalu, ia o le avanoa lea pe iai se isi sui usufono e fia saunoa. O le taimi a lenei la e taotooto toeaaina ma loomatutua ma faalogologo mai i le tatou galuega o fai nei ma tapuaia faiva o le Palemene. Ia tulai mai le sui usufono mo le Itumalo Safata i Sasae, ia o le uluai saunoaga foi lenei a le sui usufono aua le Paeaiga fou. O le uluai nofoaiga lenei a le sui ia o se tasi o sui sa faapena ona faauluulu ma avefa ma Ofisa Sili o Faalavelave Faafuasei. Ia saunoa ia manuia lau tapenaga.

LAUGA FAA-TAUPOU

Tofa NONU LOSE NIUMATA (Safata Sasae): Lau Afioga i le Fofoga Fetalai ma le mamalu o sui usufono o le Palemene o laʻu lauga muamua lenei i le Maota. O le a faapitoa se manatu i le agaga faafetai i lenei Maota i le tapuaiga a Samoa aemaise o lou itumalo Safata Sasae. Ou te faatulou atu foi i le tapuaiga a le Afioga O Le Ao o le Malo faapea foi le tapuaiga i le mamalu o Sui o le Fono a Sui Tofia, tulou le afio o lau Afioga i le Palemia faapea le mamalu o le Palemene.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

Ou te faatulou atu foi i le afio o lau Afioga i le Fofoga Fetalai ma sui usufono mamalu o le Palemene, ou te faatulou atu foi i le tapuaiga a le Afioga i le Faamasino Sili ma le mamalu o le Faamasinoga, o paia na o le ta faigamalo Samoa. Ou te faatulou atu foi i le tapuaiga a Samoa i Aiga ma latou Tama, o Tama foi ma o latou Aiga, Aiga o Nofo, Aiga o Alii, Aiga o Papa, Usoga a Tumua ma Pule, Ituau ma Alataua, Aiga i le Tai ma le Vaa o Fonoti. Ou te faatulou atu foi i le tapuaiga a le motu i Sasae, Sua ma Vaifanua, Fofu ma Aitulagi, Ituau ma le Alataua, Saole ma Saleaamua ma le Launiu Saelua, Faatui o le Motu, Tootoo o le Faleula ma le Manuatele. Samoa, o oe lava o le aomamala, pe ou te toesea pe faaopoopo le mamalu masani o Samoa faapea saʻu tautalaga ona lape lea tulou, tulouna lava. Ae faapito se faamatalaga i lou itumalo Safata Sasae amata mai i Niualama e oo i Fatituli. Afifio le Aiga Sa Tunumafono, Faauluuluga o le Aiga Sa Tunumafono, Tapaau o le Alataua, Taulauniu ma le í Aitutagata ma le mamalu o le Alataua. E momoli atu le faafetai tele e tusa ai ma le faatuatuga o le tatou itumalo i le tapuaiga a le aufailotu ma le paia lasilasi o e sa lagolagoina loʻu nei tagata. O le upumoni a loʻu tagata faatauvaa ma le mamalu faalupe o le Itumalo e momoli atu foi le faamalo i e sa tauva i Safata i Sasae. O upu masani e oso ae pea le la e faiaso foi le Alii.

Lau Afioga i le Fofoga Fetalai e momoli atu le faamalo ma le faafetai i lenei Tala o le Tupe. O lo o manino mai le sini autu o le Tala o le Tupe, faamalosi le faavae tapena mo taeao. O lona uiga o galuega e faatino i le taimi nei ma galuega e faaauau, o lo o manino i le ootoga o le Tala o le Tupe Maua ma Tupe Faaalu ma Nonogatupe, atinae faamuamua ma le pasene o le tamaoaiga ma ua lagolagoina e Safata Sasae le Tala o le Tupe mo le tausaga 2016/2017. lau Afioga i le Fofoga Fetalai, e iai nisi o galuega mo le matou itumalo pei o le faaleleia o faleaoga ina ia lelei le Siosiomaga mo le fanau. Mo le faatinoina o galuega o le taligalu ma le faaleleia o aualagaluega ina ia fesoasoani i le atinae o faatoaga. O lo o lelei le aualatele se i vagana e fai faalapoa le aualalaupapa i Tafitoala. Lau Afioga i le Fofoga Fetalai o lenei aso ia alofagia e le Atua le mamalu o lenei maota afua mai i lau Afioga i le Fofoga Fetalai, lau Afioga i le Palemia ma le Kapeneta aemaise sui usufono mamalu o lenei Palemene ia faatupu mai e le Atua ni o tatou manatu ia faatino o tatou tiute tusa ia ma le finagalo o le Atua aua se manuia o le tatou atunuu, soifua.

Na faaalua le agaga fiafia o sui usufono o le Maota i le patipati o latou aao i le maea ai o le Saunoaga Faa-Taupou a le sui usufono mo Safata Sasae.

FOFOGA FETALAI: Malo faafetai le tapena faafetai foi i le lagolago mai o le sui usufono mamalu i le galuega a le Fofoga Fetalai, ia o le tatou galuega e faapena ona tatou galulue faatasi ia ona tino lea ma taunuu le faamoemoe ia aea le feagai ai o le Kapeneta ma Matagaluega ma galuega fai ina ia vave atinae le tatou atunuu i le tatou Tala o le Tupe.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

Ia ua avanoa foi se isi sui usufono e fia saunoa mo le tatou galuega. Manatua foi o lo o fia faafofoga mai lou itumalo i lou siufofoga a o galuega a latou tuitui ia o le mea lena e taialalo le ia a Sa Saumani pei o lea muagagana ui o lea toaga e tuitui ma taialalo, ia ae faapena ona muamua faatino galuega. Ia o avanoa nei faimai sa fia maua e toeaiaa aua e lua avanoa, aua fai nei malolo le tatou fononisi i tatou toe omai faauma nisi mea e le o uma o le saunoaga lena. O avanoa lelei lava nei e seasea ona maua. Ia malo faafetai tulai mai le sui usufono mo Aleipata Itupa i Luga, o se tasi foi o sui usufono ua loa lana tautua i totonu o le Palemene. Tulai maia lau Afioga i le sui usufono mo Aleipata i Luga.

Tofa AMITUANAI FAGAIVALU KENRICK SAMU (Aleipata Itupa i Luga): E faafetai atu i lau Afioga i le Fofoga Fetalai tusa ai foi ma le avanoa e taumafai atu ai foi se sao o lena itumalo o Aleipata itupa i Luga, e le gata i le Tala o le Tupe lena, ia ae sei aveatu ai foi ma se faamatalaga i le faafofogaaga a si ou itumalo o Aleipata Itupa i Luga tusa ai foi ma le faamoemoe sa faapena ona feagai ma si o tatou atunuu i nai masina ua tuana'i atu aua le sailia o ni Taitai aua le Paeaiga Lona XVI lena.

Lau Afioga i le Fofoga Fetalai, ou te muamua ona ou faatulou i le paia o Tiafau nei aua o le malae o le Faautugatagi a Samoa. Ou te faatulou atu foi i le paia faatafafa o le Maota i le afio o lau Afioga i le Palemia, afio lau Afioga i le Sui Palemia ae tainane Minisita uma o le Kapeneta.

Ou te faatulou atu foi i lau Afioga i le Fofoga Fetalai, aemaise o sui usufono uma o le Fonousu a Samoa i lena aso. Ou te faatulou atu foi i le paia o Ofisa Sili o Pulega o Matagaluega ma Faalapotopotoga a le Malo i tupu ma tamaalii aua e le faagaloina la latou fatuaiga tausii o lo o vae ma lima aua le atiaieina o lo tatou Malo.

Lau Afioga i le Fofoga Fetalai, e muamua lava ona ou faatulou i le faafofoga tapuai mai a le atunuu, i le Afio o Lana Afioga Mamalu O Le Malo o Samoa, Afioga i Sui o le Fono a Sui Tofia, Afioga i le Faamasino Sili aemaise o le vasega o Faamasino. O paia lava nei aua Tama ma o latou Aiga, Aiga ma a latou Tama, Usoga a Tumua ma Pule, Ituau ma Alataua, Aiga i le Tai ma le Vaa o Fonoti. E manatua foi Tae-o-atua i le tapuaiga a le Motusa o Tutuila ma Manua, Sua ma le Vaifanua, Fofu ma Aitulagi, Saole ma Saleaamua, afio le Tuimanua tainane le mamalu o le Tootoo o le Faleula ma le Manuatele. Ou te faapoipoi vaiula i le paia i le susu o le Afaigaluega galulue o lo o tala faauto i itu e fia o Samoa ma atunuu mamao ae a le finagalo o le Atua.

Lau Afioga i le Fofoga Fetalai, o lea ua sao sao i le tumutumu ma soli le mogamoga o le fale sa o tatou fau i le ao ma fau i le po. A leitiai sa Meto ia Alo ina ia faia sona fale e lau i ula ae poupu i toa, e aso i le uluulu ae paleniu. Ona pei lea o upu na fai i le maota o Tagaloa na i Aiga tau Aana. O lea ua iite le malama nai Saua aua ua faatau muaava le sa o folauga, ua fotupule le faiva o tama aua o lea ua loloma le tai i Tumua.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

Ua fotu manu sa lilo, ae fai mai le upu na fai i le aai o tupu, o lou tofi tuu faasolo lena, ma lou malae o le aitu na liu ai le taeao usu. Aua la ne i tatou tepa i le lauamanu ae vaai le ia na i fanua o le ata ina ia tofusia ai lou Itumalo aemaise o Samoa aoao. O le a ou faga taavili ia i le tai lolosi aua o le tai sa faanana ae faatoetoe i lag , ae tau ia ina ou faaila e pei o le upu i faatufugaga aua o lele ua lupepe le taumanu ula ma ua nofoia pou o lauga o le Maota Fono a Samoa i lona Paeaiga Lona XIV lenei. E fai mai le upu nai le motu o Salaia, e le feagai papaiila ma mataeleaga e pei o le tala i le vaa mau o le Malo, ae o le a ou see lilia e pei o le faaseega nai le Alataua.

Lau Afioga i le Fofoga Fetalai, ae ou te le i oo i le Tulafono Tau Faaofi o le Faatatauina 2016/2017, o se avanoa lelei lenei se i fai ai sina upu aua le faafogafoga tapuai mai o lou itumalo o Aleipata Itupa i Luga mai Lalomanu, Vailoa ma Ulutogitia. I lou nuu o Ulutogia i le susu o lau Susuga i le Faafeagaiga Kororia Matamu, o le paia lava lea aua le susu o Tama o le Malo le susuga i le Sagapolutele, susu mai le Matua o Falanaipupu, susu mai le Taofia o Mataiai, susu mai le Usoalii, alaalatai le nofo a Alataua ia Saoluafata.

O lou nuu o Vailoa, susu lau Susuga i le Sea Iose Mapusegi, o le paia lava lea aua le afio o Alaalamalae, afio lau Afioga i le Saofetalai, afifio Usoalii ma le Matua o Tonufale, alaalatai Saveaalii ma Saleaamua.

Ona ou oo mai ai lea i lou nuu pele o Lalomanu, susu lau Susuga i le Faafeagaiga Etisone Tile Taligafa, o paia lava lea aua le Afio o le Tuiatua Faanofonofa lau tofa i le Matua Fumataga. Afifio le Falefia o Alii, afio Amituanai o le Maopu o le Tuiiaana, susu i laua o Suafa, lo outou Toafa o le Tootoo, le Igoamatua aemaise o le tapuaiga mamalu ia te oe Sialatua. O paia ia o lou itumalo o lo o ou tiu ai i Tiafau nei o le Maota o le Faautugatagi a le atunuu. Lou itumalo e, o lea ua ou tu nei i le foe ma ou sauni ou te folau i le vasaloloa. Ua outou sii au i luga o le maa salafa aua lenei Paeaiga. Ua le maganana le auauna, ua oge upu foi manatu, o ai ea lenei tagata faatauvaa ua outou manatu mai ai. E le tau selu atu le tofa ma le uta aua o i ina e malu ai nuu ma aiga, e malu ai le Galuega a le Atua. Ou te manatua le muagagana o faiva, a sii se faiva ae tapuaia e ae manuia. Lou itumalo e, olo le fua ma le pao ae seese i le mataigatila aua upufai o Malo mo se manuia o lo ta pausisi mo Samoa ma a taeao. O le a ou saili i se ia o le loloto se i inati ai le fale tautu vaa o Lilomaiva. O le upu e fai i le gatai fale e le mua uma ni vaa...

Tofa Olo Fiti Afoa Vaai (Salega Sasae): Lau Afioga i le Fofoga Fetalai o se mea e fia faasao.... lau Afioga i le Fofoga Fetalai ona o lea e maitau atu.....

FOFOGA FETALAI: Malie le sui usufono o lo o saunoa se i avatu lava le avanoa i leAe ou te le i tuuina atu le avanoa o lea ou te fai atu malie le sui usufono...Malo faafetai, ua ou musu e faana tuitui le saunoaga a le sui usufono ona o le tauga lelei lea o le faafogafoga mai o le itumalo.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

Ou te faamalulu atu ai ma ou te faauilavea foi ona ua oo i le taimi o le tatou malologa.

O le a faataatiaese Taulumaga a le Fono Aoa mo lana malologa ae o le a tatou toe amata pe a ta le itula e 3:00 i le aoauli.

Na faataatiaese Taulumaga a le Fono Aoa i le itula e 1:00 i le aoauli.

Na toe faaauau Felafolafoaiga a le Fono Aoa i le itula e 3:18 i le aoauli.

Na toe faaauau Felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu. 2) 2015/2016 ma le Tulafono Tau Faaofi o le Faatatauina o Tupe 2016/2017.

FOFOGA FETALAI: Ou te faasilasila atu ua toe amatalia Taulumaga a le Fono Aoa Faitulafono. E faia le malologa o lo o faapena ona saunoa le sui usufono mamalu mai Aleipata Itupa i Luga. Ma lou faaaloalo ou te tapa lau Afioga i le sui usufono mamalu e tulai mai e faaauau lau saunoaga.

Afioga AMITUANAI FAGAIVALU KENRICK SAMU: Faafetai atu i lau Afioga i le Fofoga Fetalai. E manatu o lea foi ua maua se faasiligamalos, e tusa ai foi ma le taligasua i lenei aoauli, e momoli atu ai le faafetai ma le faamalo i lau Afioga aemaise le Failautusi o le Fono.

Lau Afioga i le Fofoga Fetalai, o le upu e fai i le gataifale, ðE le mua uma ni vaa. ðE faafetai ai i uso sa matou aleaga faatasi. Sa o tatou piioga ma piigama a o tapena ai le faamoemoe o le atunuu i lana faiga-filifiliga. Ae ui i lea, ua le toe lilo se po i le finagalo autasi o lo tatou itumalo. O lea, aumaia lou alofa ta te mafuta ai, o lo ta va lelei lena. O le mea moni e sili ona ta mafuta i le alofa e aunoa ma le tofi, nai lo le ta mafuta i le tofi e aunoa ma le alofa. E faapitoa lau faafetai i ou aiga uma i Samoa nei ma atunuu e mamao, i la outou lagolago ma a outou tatalo, a o tapena ai le faamoemoe. Ae le gata i lea, o lau komiti mai Ulutogia, Vailoa ma si ou nuu faapelepele o Lalomanu i lo outou lagolagosua ma lo outou taimi sa faamaumauina, aua lava le tapenaina o le faamoemoe. E le o ia te au ni oa ma ni tamaoiaiga e tau ai lo outou tautiga aua le faatinoina o lo tatou faamoemoe. Ua na o le Atua e liligi ifo ana faamanuiaga e tusa ai ma lo outou gapatia. O lea, faafetai tele faafetai tele lava.

FOFOGA FETALAI: Malie le sui usufono o lo o tulai mai le faauilavea. Se i tulai mai le faauilavea a Faleata Sisifo.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoga i luga o le faitauga faalua**

Tofa Lealailepule Rimoni Aiafi: O le mea e fia faasao lau Afioga i le Fofoga Fetalai, o le taeao o le faiga palota, o la e ou te tu i Vaigaga e fai lau palota, ae sau le taavale a le sui usufono lea ma valavalaau atu, e pei e ula atu ia te au. Ia manatua o le sui usufono lea e leai sana palota na faia na nofo ma molia nai tama foi ia na tau o. Fai atu ai foi . .

FOFOGA FETALAI: Sei tulai maií aua e te manatu i lea tulaga lau Afioga i le sui usufono.

Afioga AMITUANAI FAGAIVALU KENRICK SAMU: Lou itumalo e, o a outou faamanuiaga e laulau sasaa ai le upega o le tautai. E sua ai pea le lolo e lala ai le tino o le manaia aua faiva o poula. O lea o le a ou aapa i se au e mafai ai, ma o le a ou fagota aua ni atu o vaa sii soo leaga o lea ua e topule, ae ou saafi e pei o le taotolima a Galumalemana e ala i le tofi o le itumalo. Ia utumataua pea le vaifaalele, o le tamaitai nai Malie ma Vaitoelau, talosia ia olo i toa le fafaga a la manu folasa, ma ia tau tupu le soaiga a le alo o le Tuiatua. A ia sili i na mea uma, le Atua alofa, ina ia lau ae lona lagi e folau ai i manu le tatou folauga mo lenei foi Paeaiga.

Lau Afioga i le Fofoga Fetalai, ou te faaaogaina foi lenei taimi, ou te faafetai ai lau Afioga i le Palemia ma lou auvaa sa outou folau mai i lena lima tausaga ua tuanai atu. E talitonu e i ai nisi o tamalii ua le mafai ona toe au mai, ae i ai le talitonuga ua tele lo latou sao, aua le atiaeina o si o tatou atunuu. E faapena foi i lenei lima tausaga ua amatalia. E talitonu e tele fita ma faafitauli, ae tatou te lafoai pea i le Atua e faapena ona fesoasoani mai, aua le atiaeina o si o tatou atunuu.

Lau Afioga i le Fofoga Fetalai, o le Tala i le Tupe lenei e talia ma le fiafia ma le faafetai tele e lenei itumalo. E talitonu o le Tala i le Tupe mo galuega faaaau mai lena lima tausaga ua mavae atu seia oo mai i lenei lima tausaga ua amatalia. O le a ou muamua lava i le Minisita o Galuega ma Atinae Eeseese, e talitonu o le pese lea sa pese ai foi i le lima tausaga ua mavae atu, lea foi o le a toe amata ona pese ai i lenei tausaga. O le suavai mai lava i le tausaga o le Tsumani i le 2009, o lo o faaletonu le suavai i si o matou itumalo. O le talosaga i lau Afioga i le Minisita, se i e silasila ane, e pei lava ua faataatia faiga faavae a le Malo, i le tau uunai lea o tagata i le maupuepue, pe e le alagataua se alavai po o ni paipa vai i le ala fou lea ua taatia i le taimi nei mai Samusu seia paia Lalomanu. Ona o le toatele lava o le mamalu o lenei itumalo ua agai i uta e nonofo ai mai lava i le 2009 o lo o faapena lava ona faaaoga e i latou le taavale vai e faasoa atu ai le suavai. Ae o le tele o taimi e i ai foi nai faafitauli i le le mafai ona oo atu o le suavai.

Lona lua, o matou auala galue, o auala galue mai Ulutogia, Vailoa ma Lalomanu. Ua uma atu lea lima tausaga e le í .ia e tatalo atu lava. E talitonu lava e lafo atu lava, e i ai pea le faasoa a lau Afioga i auala o o matou nuu nei i Ulutogia Vailoa ma Lalomanu.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

E faapena foi le auala i Tiavea, e pei ona i ai sa tupu ai nisi o faalavelave i tausaga ua mavae atu, se i alofagia e lau Afioga, po o le a se tulaga ma se vave ona faatino ai le galuega lea i Tiavea, ona o le tele lava o e o lo o uia le matou itumalo o turisi. E lamatia lava lo latou soifua ona e le o lelei lava le faatinoina o le auala i Tiavea.

O le tolu o talosaga o taligalu o si ou pitonuu i Lalomanu, Lata, o lo o faapena ona leai se taligalu i le taimi nei. Sa i ai le taligalu fou sa i ai i le vaitaimi ae le i i ai le mala faanatura o le Tsunami, na ona uma lava ona fai o le taligalu lea, aafia ma matou i le Tsunami ma faapena ona malepe ai ma le taligalu lea. Ae o se taligalu taua tele mo si o matou pitonuu lea i Lata.

O le eletise, faafetai i le taimi sa ou vaavaai atu ai i le taimi ua tuanai, e tasi lea mataupu sa e saunoa mai ai, ua tatau ona faapau le eletise, ia se i alofagia aua o matou, o la e i ai wind power i tua, se i silasila ane i ai pe le alagataata lava le pau o le eletise i lenei itumalo aua o lea e tu ai, tasi ia atinae a lo tatou Malo.

Ona ou oo mai lea i le Minisita mo Punaoa Faalenatura ma le Siosiomaga po o le Afioga i le Sui Palemia, se i alofagia ane le taligalu lea, aua e pei o le tatou Matagaluega o lo o i ai le taligalu lea agai i tai i Tapaga i Lalomanu lava. Sa fai muamua ae oo mai i le taimi nei ua fai si leva ona fai fai tuu, ua le uma le taligalu lea, se i alofagia po o le a se tofa ae toe faaaau le galuega lea, ona o la foi ua toatele i latou o le matou nuu ua faapena ona nonofo ai i le vaega eleele lenei.

Lona lua lau Afioga i le Tamaitai Minisita, le Afioga i le Sui Palemia, o le lapisi i lea tafa o le atunuu i Atua, pe le ua alagataata se tatou lapisi ona ua tele foi atinae i lea tafa o le atunuu ma Atua, ae ua fai si taumamao mai o le agai atu o taavale lapisi i tua. Ae manaia foi ona fai se tatou lapisi e faigofie ai mo atinae a turisi mo lea vaega.

Lau Afioga a le Minisita mo Aoga, Taaloga ma Aganuu, e momoli atu le faamalo ma le faafetai i lau Afioga, ae o nisi o mataupu a lenei itumalo se i alofagia, se i faasafua atu le tulaga lea i faiaoga, o lo o fai lava si utiuti i lenei vaitau, ae tatalo atu ma le agaga faaloalo i lau Afioga, se i silasila ane i le vaega lea. Ma le tulaga lava lea i le tele o vevesi i le taulaga i alo ma fanau, o le tatalo a lenei itumalo pe manaia o lena e i ai .. faamalosi faiga faavae, e faasafua lava fanau i o latou itumalo. Aua o le fesili tele, o le a le mea ua le vevesi ai Savaii ma tua, ae na o i inei lava i le taulaga? E i ai le talitonuga, e tatau lava ona vaai lava alo ma fanau e tuu i kolisi o la lava ua tofu le itumalo ia ma le kolisi, e faapena ona aotauina ai i latou.

Lau Afioga i le Minisita mo Faatoaga ma Faigafaiva, faamalo i lau Afioga. O le tatalo a lenei itumalo, po o le a se tulaga o i ai a tatou manupapalagi, po o lava faasoasoai .e i ai foi nisi o lenei itumalo ua auina atu a latou talosaga. E pei ua taliga po o le a se tulaga ua i ai le faasoasoaina o manupapalagi.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

Ma le lona lua faafetai i le tulaga ua i ai le talo i lenei vaiata, tele le ituaiga talo. Po o le a se tofa i lau Afioga ma le Matagaluega pe le aoga ona toe aumai le talo Niue se i toe vaai pe ua tea atu le lega ma tatou, ae toe aumai le talo se i toe faaitaitai ona toto, atonu ai ua lelei i lenei vaiata.

Ona ou oo mai lea i lau Afioga i le Minisita mo Faiga Palota, e faafetaia pea le faiga palota talu ai nei lau Afioga i le Minisita sa i ai aemaise foi o le mamalu o le Pulega ma le aufaigaluega. Sa vaaia i le faamoemoe o le atunuu ua tuanai atu le siitia ma le lelei faatinoina o le faiga palota ua mavae atu. O le tatalo lava a lenei itumalo, e manaia lava le toe taumafai ia agai lava le tagata ia i le mea ua nofo ai, ia faamalositia e palota ai lava, ona e oo foi i le matou itumalo, o le tele o isi tagata la e i totonu o le lola palota, e talitonu e le i oo atu lava i Lalomanu po o Aleipata Itupa i Luga. O le tatalo a lenei itumalo i le lumanai, a o le faamoemoe o le atunuu sa mavae atu, ia faafetai tele faamalo le tautuaina o si o tatou atunuu e ala i le siitia o le tulaga ua i ai le faatinoina o faiga palota na se i mavae atu nei.

Ona faamuliai lea o se lagona o lenei itumalo, lau Afioga i le Minisita mo Leoleo ma Falepuipei ma Tinei Mu, e momoli atu le faafetai a lou nei tagata faatauvaa, ua le gata lava ina ua e toe tofiaina au e avea ma lagolago i lau Afioga, ae o le mea sili ona taua o le amanaiaina o lenei itumalo. O lea e momoli atu ai le agaga faafetai i lau Afioga i le Minisita mo Leoleo, faafetai mo le pou lea e i Lalomanu, o la ua amata le galuega. O lena lima tausaga ua faatiga taliga i lau Afioga le taumafai atu pea a o lea lava ua topule ma faatino le galuega, o lea e momoli atu ai le agaga faafetai ma le faamalo i lau Afioga.

O le matou Matagaluega o Leoleo faamalo mo le tele o galuega faamalo i lau Afioga i le Komesina aemaise foi o i latou o faauluuluga o Matagaluega o lo o faapena o lo o i le vaaiga a le Minisita, faamalo galulue faamalo le tautuaina o si o tatou atunuu. Pau lava o lea, ia i ai pea le faamaoni mo le faatinoina o le auunaga i le atunuu. A faamaoni e talitonu, ona taunuu lea i se taunuuga lelei o la outou galuega.

Lau Afioga i le Fofoga Fetalai, ou te talitonu o le a seu i fanua le lauga a lenei itumalo, ae avea ia lenei avanoa e avatu ai foi faamanuiaga a lenei itumalo i lau Afioga, ona o lau Afioga o lo o e faatonu folauina le Fonousu a le atunuu.

Ia faamanuia foi le Atua i lau Afioga i le Palemia ma lou auvaa aua lava le sa folau o Samoa mo lenei lima tausaga. E avea foi lenei avanoa e faaleo atu ai foi le agaga faafetai i lau Afioga i le Failautusi o le Fono, o e o lo o lagolagosua aemaise le mamalu o le Matagaluega o le tatou Ofisa, o le a lava le finagalo o le Atua i le lumanai i ni tiute ma ni faiva, tatou valavala, faamalo le tautuaina o le Fono a le atunuu. E iloa lava le tamalii i uiga faatamalii, faamalo, e le tau selu atu le galuega, e muli ni oli i ni foli, e muli ni mea matou te maua, a o uiga tausaaafia ma le fiafia, ia faatupu ai pea le lagona o le fiafia pe a autovaa mai i nei i le tatou Fono nei, e le gata i lena lima tausaga na sei mavae atu nei, ao lenei lima tausaga ua amatalia.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafolaiga i luga o le faitauga faalua**

Lau Afioga i le Fofoga Fetalai, ona uma ai lea o se sao o lenei itumalo. Soifua ma ia manuia.

FOFOGA FETALAI: Malo faafetai. Faafetai ua faaiuina le saunoaga, malo tapena, malo sauni i le sui usufono mamalu o le Afioga foi i le sui usufono mo Aleipata Itupa i Luga po o le Minisita Lagolago o le Matagaluega o Leoleo ma Falepuipui. Ia, ma ua maua foi le avanoa mo se isi sui usufono e fia saunoa aua le tatou galuega.

Tulai mai le sui usufono mo le Itumalo Tu Taulaga i Sisifo, o lana uluai Paeaiga foi lenei. Tulai maia le sui usufono e saunoa.

LAUGA FAA-TAUPOU

Afioga FAUMUINA ASI PAULI WAYNE FONG (Itumalo Tu Taulaga i Sisifo): Faafetai atu i lau Afioga i le Fofoga Fetalai i lenei aso. E viia lava le agalelei o le Alii ua mafai ona tatou toe maua lenei mafutaga e toe amatalia ai le tatou galuega i lenei aoauli. Faafetai foi ua maua se faasiliga malosi e toe faaauau ai le tatou galuega. Ae faafetai mo le avanoa ua tuuina mai aua se sao o lenei itumalo i le fonotaga a le tatou Palemene i lenei aso.

Ae ou te le i oo atu la i le tulaga o le tatou faamoemoe, e leai se agaga o le aso o le a taumafai atu ai se vaivaiga o lenei itumalo, ae faigata ou te iloa ua tataua ona faasolo le tatou galuega, ona ou te iloa po o nei lava e uma ai tatou lauga ia faataupou.

E muai faatulou atu i le paia o le Maota Fono o Samoa i le afio o lau Afioga i le Fofoga Fetalai, le Palemia ma le auvaa o le Kapeneta faapea le mamalu i sui usufono o le Palemene o Samoa. E faatulou foi i le tapuaiga i Lana Afioga Mamalu O Le Ao o le Malo faapea le auvaa toatolu i Sui o le Fono a Sui Tofia. E faatulou foi i le Faamasino Sili ma le Ofisa o Faamasinoga. E faatulou atu foi i le Aiga Sa Levi i so o se fatafaitaulaga o lo o nonomanu aua le manuia o Samoa. E faatulou foi i le tapuaiga a Samoa aoao i le paia i Tama ma Aiga, o Aiga ma Tama, le usoga a Tumua ma Pule, Ituaa ma Alataua, Aiga i le Tai ma le Vaa o Fonoti.

E faatulou atu foi i le tapuaiga i le Faigamalo a Tutuila ma Manua i le paia ia Sua ma le Vaifanua, Fofu ma Aitulagi, Saole ma Saleaamua ma le Launiu na Saelua, Faatui o le Motu ma upu ia Manuatele.

Ou te faatulou ma ou faatalofa atu i si ou itumalo, o le Itumalo Tu Taulaga i Sisifo. Ou te manatu o le itumalo lenei ua aofia ai Samoa aoao, aua ua le po se silafia i e o lo o sailimalo i le itumalo lenei, i le Itu Taulaga i Sisifo, ua aofia uma ai Samoa atoa, ae o le a le aveesea ai paia o Faleata. Ona faatulou lea i le afio o Tama Faleata, i le Toafa, le Pulelua ma le Faiga, le saofaiga a Atua ma le mamalu ia Faleata, tulouna lava.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

E le mafai foi ona faagaloina si ou nuu pele i Vaigaga, i le susu o le Susuga i le Faafeagaiga Taulagi a lenei nuu le Susuga ia Tautua ma le Faletua, susu foi le Alo o Malietoa ma le falefia o alii, e pola puipui e Ulugia ma Ulugia.

E le mafai foi ona faagaloina si ou aiga i Laloaoa e afio ai Sooalo o le tama tau Lepea, e polapuipui e Puaalatamai ma Puaasegisegi. E le mafai foi ona faagaloina si o matou aiga i Gagaifo Lefaga, lau Susuga Sua, afifio mai Faumuina ma lau Afioga Leaupepe ma le afio o le Maopu. E faatalofa atu i si ou aiga i Matanofa i Falelatai i lau Afioga i le Tuimalealiifano, le Taauso ma le tama a Tausala.

E le faagaloina foi le mamalu o le aufaipisinisi i le Itu Taulaga i Sisifo e toatele i latou o lo o aumau ma nonofo ai le mamalu o le aufaipisinisi, aemaise foi o le mamalu o le au Saina o lo o matou nonofo ai i lea itumalo. Ae o le a taumafai atu se vaivaiga a le sui usufono o lenei itumalo e uiga i le Tala Faatatau o le Tupe.

E muamua ona momoli atu le faafetai i le Susuga i le Minisita o Tupe aua foi le galuega maeaea, e ui lava ina faanoanoa i le le lava o tupe e faasoa aua le taumafai atu a itumalo taitasi, ae talitonu le agaga, o lena e i ina le tofa. O lea foi faatoa amata le tatou Paeaiga, o lea ua matou taumafai atu le toatele o i matou i mea e mananao ai, ae ou te iloa e le mafai ona lava lau faasoa. Ae faafetai tele mo lau galuega maeaea.

Lau Afioga i le Minisita mo Galuega, e talitonu lava le agaga ua toe piki lava oe ona o le ta itumalo fou lenei Itumalo Tu Taulaga, leaga o oe e te loto alofa o oe e te faamaoni, o oe e te toa. E ui lava e le lava tupe e avatu e te faasoa mai ai galuega, ae talitonu le agaga o lena e ia te oe le tomai. E le te i te i foi tuu atu oe e le ta itumalo, ona o le taua i le afioga i le Palemia o le Itumalo Taulaga lenei ta te tautua mai ai. O lea la se i e toe tagai ifo lava i le Itumalo Tu Taulaga i Sisifo ma le faamoemoega o i ai.

Mo le silafia, o le a ou amata mai Moamoa; e silafia e lau Afioga ua leva foi tausaga o e tautua ai, ua aumai nai tagata mai Apia ave i Moamoa ae leai ni auala, leai ni paipa, ae pei uma lava o le Tulafono e tataua ona fai muamua mea ia ona faatoa ave loa lea o tagata e nonofo ai. O lea la e talosaga atu ai i lau Afioga, ou te iloa lava o lo o lava le faasoa i ina, ina ia e taumafai se i alofa ifo lava i le itulagi lea. E le o lelei ni auala, e le i i ai foi ni paipa, o lo o nonofo foi i latou i le itu lea, ae o lo o i ai foi le aoga fesoasoani a le Ekalesia Katoliko. Ua maitauina a louloua le aso, e nonofo ai lava i Moamoa, aua a pa le vai, ia o le auala laupapa ua leva ona i ai ae le mafai ona sao ai se isi. E taatia atu i ina i lau Afioga.

Sa i ai le manatu i le Tala Faaopoopo o le Tupe aua le Matagaluega lea sa faia le tatou aualatele lea i Faleata, e amata mai Malifa e tau i Saina, e momoli atu le fafetai tele i le Malo mo lea fuafuaga, o lea ua latalata faaiu le galuega, ae se paga, ua fai afaafa a tatou galuega, ona e i ai isi nuu ma afioaga sa aafia meatotino, ae ua leai se seleni.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

O lea sa i ai le agaga faapea ai e tuu ifo sina mea faaopoopo i ai i ina aua le faaumaina o galuega o lo o totoe, lea e aofia ai si o matou nuu o Vaigaga i lona pa ua faifai ua le uma. O lea e taatia atu i ina i lau Afioga foi aua se taumafaiga o le tulaga lea.

O le a ou oo mai i le Minisita mo Aoga, lau Afioga i le Minisita, leaga e faigata o lau Afioga o le Toetaufanua, o le toa, o oe o le toa manumanu o le tatou atunuu, o lea ua e pale mai. O oe lava le isi tofiga aupito sili ona sao lea e i ai i totonu o le tatou Palemene nei, ae faafetai atu lava i lau Afioga ua e toe tulai mai. Se i toe tagai ifo lava faamolemole i faamanuiaga ia e maua e aoga tulaga lua, ua taofiofi le tatou seleni, ae ua le iloa e Komiti po o le a le mea o le a faatino ai le galuega. Ua tele ina taofiofi e le mafai ona faatino le galuega po o le grant lea ua aumai aua le faatinoina o galuega. Ia, o lo o taumafai foi Komiti o Aoga aua faleaoga fai, ae toe tatalo atu lava i lau Afioga, se i toe tagai ane lava i le grant, pe leai lava sina suiga laitiiti aua mea fai a le Komiti. Ua tele ina saisai vae ma lima se i tulou, ua le mafai ai ona faatino le galuega. O lea foi e alaala mai le sui usufono mo Faleata Sisifo ua leva foi ona galue ae o le a ou avatua pea si mataupu lea. O lo o i ai lava le fanua i Vaitele e leai lava se mea o tu ai, na o vao ua ato le 20 tausaga o tu ai. E tatalo atu i lau Afioga po o le a sou finagalo, tuu i ai se faleaoga e faaoga i ai, aua a ola le tamaitiiti, poto lona mafaufau i lo le ola o le vao e leai lava se tatou mea e maua ai. O lea e tatalo atu i lau Afioga, se i e toe tagai ane lava, a lava le faasoa, po o lea tausaga fou, a ia uma lau Paeaiga ua tu se faleaoga, o le afaaigoa foi i lau Afioga pe a oo i le taimi e tu ai.

Ona ou oo mai lea i lau Afioga i le Minisita mo le Soifua Maloloina, o lau Afioga lava e ola ai Samoa, o lau Afioga foi e feoti ai Samoa. Ae talitonu le agaga, o lona ua e tulai mai, o le faalua lenei ona e tulai mai, ua matua e iloa lava le faafitauli o lo o feagai nei ma le Matagaluega o le Soifua Maloloina. E tatalo atu i lau Afioga i le vaegatupe lea ua tuu atu aua gasegase e ave i fafo, pe le tilotilo i insure a le aufaigaluega ina ia mafai ona alu lava le tagata ia e fai se galuega mo ia ae le i oo i le taimi e gasegase ai. E mafai lava foi si tamai mea laitiiti e totogi e tagata faigaluega, faatoa ifo e le Malo ina ia maua ai le puipuiga ia aua ne i taofia ai le alu o le tagata e vaai le fomai i le tulaga lea. A maua e insure lea, ou te talitonu o le a tele lava lona faamamaavega i gasegase foi e ave i fafo, ae taatia atu i lau Afioga aua lea faamoemoe.

Ona ou oo mai lea i Tina ma Tamaitai, i lau Afioga i le Tamaitai Minisita, o oe lava o le pae ma le auli, e tele faafitauli o nuu ma alaafaga o lo o autovaa atu i lau Afioga aua foi nuu ma o latou faamoemoe. Ou te talitonu o le a auli ma lelei ia fuafuaga aua o lea faatoa oo atu lea o se tina i totonu o le Matagaluega lea. O lea la e faafetai ai foi le tofiga ua mafai ona maua mo lau Afioga.

Lau Afioga i le Minisita mo Leoleo, ou te iloa e te le o moe, ae tele ina momoe le aufaigaluega. Ua matua mafatia lava si o matou itumalo i le tele o pagota e omai tua, ae faafetai i fuafuaga a le Malo o le a ave i Tanumalala o le a maua ai se mapu o i matou nei i pagota o lo o sosola mai tua.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

E talitonu le agaga e au atu foi au i se isi manatu sa i ai a 200 pagota, 200 foi leoleo ina ia mafai ona maua ai se faamamaavega i le mamalu o le atunuu.

E momoli tele atu le faafetai i le Ofisa ma le Komesina o Leoleo, manaia le galuega taumafai o lo o ua maua ai nei se saogalemu e i tatou mai vailaau faasaina po o latou foi o lo o umia e oo foi i laau malolosi e faasaina, o lea ua i ai le suiga tele. Faafetai i lau Afioga mo le galuega maeaea. Ia, e tatalo atu foi i le Minisita mo Tagata Tafafao Maimoa Mai, a i ai foi se fesoasoani, ia fesoasoani atu i lou uso a Minisita aua foi le taumafaiga foi o le falepuipui aua o lo o i ai le tomai faapitua i lau Afioga.

I lou uso le Minisita mo Faatoaga, e leai lava ni mea tele o lenei itumalo, leaga e leai ni fanua e galulue ai, ae a i ai ni nai polokalame laiti se i tulou, e fai ni a latou pa e fai ai se latou tauvaga i tua lava o fale o i matou o lo o nonofo i Itumalo Tu Taulaga, manaia lena. Ae faafetai foi mo le toe tofia o lau Afioga i le tulaga lea.

Mo nisi ou uso a Minisita, faafetai lava mo le galuega maeaea, o lea e le i i ai ni lape o outou leaga o lea faatoa outou tulai mai, ae talitonu lava e gasolo le tatou galuega ma maua atu lava i se taimi. O lea e momoli tele atu le faafetai i lenei aso.

Faafetai tele i le Afioga i le Palemia ona o lona faatoatoa i le tulaga o tofiga a le tatou Malo o lea foi ua matou faatoatoa atu ai ma matou i lenei pito. Faafetai mo le avanoa ua tuuina mai. Ae toe momoli atu lava le faafetai ia i latou sa matou tausinio i le faiga palota, e le mafai lava ona faagaloina outou, ae faafetai mo le lagolago mai, ua maua se avanoa e oo mai ai aua le taumafaiga o le Palemene o Samoa.

Ia, o se manatu lea, ia maua lava e lau Afioga i le Fofoga Fetalai le malosi o le tino aemaise le agaga ma le mafaufau aua le faafoeina o lenei Palemene. Faamalo foi i sui usufono taitasi uma o le Palemene i le latou taumafai mai, ae ia manuia lava fuafuaga o lo o totoe o lenei aso ma le faasologa o Fonotaga a le Palemene. Faafetai lava.

Na faaalua le agaga fiafia o sui usufono o le Maota i le patipati o latou aao i le maea ai o le Saunoaga Faa-Taupou a le sui usufono mo le Itumalo Tu Taulaga i Sisifo.

FOFOGA FETALAI: Malo faafetai, faafetai tapena malo sauni ua maua le avanoa o se tasi sui usufono e saunoa ai. Faafetai atu i le sui usufono malo malele i le sui usufono mo le Itumalo Tu Taulaga i Sisifo. Tulai mai se isi sui usufono e saunoa.

Ia, malo faafetai, o lea ua tulai mai le sui usufono mo Salega Sisifo. Saunoa ia ia malie lau tifa aua lau uluai saunoaga faataupou.

22 IUNI 2016

LAUGA FAA-TAUPOU

Afioga TOOMATA AKI TUIPEA (Salega Sisifo): Faafetai i lau Afioga mo le avanoa ua maua e le sui usufono o lenei itumalo aua se manatu e uiga i le Tala o le Tupe ua i luma o le Laulau a Fono, le Tala Faatatau o le Tupe 2016/2017. A o le i faia se manatu e uiga i lenei Tala Faatatau o le Tupe, e muamua lava ona ou faatulou, tulou, tulou lava. E ao foi ona ou faatalofa i le tafatolu o Pulega a le Malo i Lana Afioga Mamalu O Le Ao o le Malo o Samoa, lau Afioga Tui Atua Tupua Tamasese Efi ma le Masiofo. Afifio Sui o le Fono a Sui Tofia i la outou seetolu, lau Afioga i le Tuiaana Tuimalealiifano Vaaletoa ma lau Masiofo, lau Afioga Tuiloma Pule Lameko ma lau Masiofo, lau Afioga Le Mamea Tuiletufuga Ropati ma le Masiofo, aemaise lau Afioga i le Palemia ma lou auvaa.

Afio le Faamasino Sili ma le Ofisa o Faamasinoga, afio sui usufono mamalu o le Palemene o Samoa, Faauluuluga o Matagaluega ma Faalapotopotoga a le Malo, aemaise o Faauluuluga o Kamupani Tumaoti o lo o fesoasoani tele i le atiaeina o le Malo o Samoa.

Ou te faatalofa atu ma faatulou atu i le paia o Malo mai fafo o lo o i ai o latou sui e faipaaga ma si o tatou atunuu aua le lima mafola i le fesoasoani mai i le atiaeina o le tamaoiga o Samoa. E le faagaloina foi le tapuaiga a si o tatou atunuu i motu uma o Samoa, Manono ma Apolima ma Salafai, aemaise Upolu nei. O le paia lava lea i le usoga a Pule ma Tumua, Itau ma Alataua, Aiga i le Tai ma le Vaa o Fonoti, Tama ma Aiga, Aiga ma Tama. Ae le faagaloina foi le faalogo taputapuai mai a o tatou Malo o uso o Faigamalo a Tutuila ma Manua, afio le Kovana Sili ma le Lutena Kovana, afifio o sui usufono mamalu o Maota e Lua. Le paia lava lea ia Sua ma le Vaifanua, Fofu ma Aitulagi, Saole ma Saleaamua ma le Launiu na Saelua, Tama a le Manuatele, Tootoo o le Faleula ma le Laau na Amotasi.

Ou te fia faatalofa afoi i lou i lou itumalo na mafua ai ona ou tulai i totonu o lenei Maota, Salega Sisifo mai Fagafau, Samataitai ma Samataiuta, Fogatuli ma Faiaai. Le paia lava lea i le afio o Fualau ma Aiga, afifio o Tilafono ma le Faavaoga, afifio Gisa ma Fepuleai, ae tainane lau fetalaiiga Tuisalega, o oe e te teuvaatele i lo tatou itumalo. Afio Afualo ma le Toafa o ou Alo, lau Fetalaiiga Faimanu o le fofoga o Usoalii. Afifio Alo o Lilomaiava, Seve ma Tilimafaga, Afio Tuimaugapo ma le Aiga Sa Tuimaugapo, ae polapuipui e le falefa o Sa Soa ma Sa Mai.

E faatalofa atu foi i lou nuu pele o Samataitai ma Samataiuta, afio lau Afioga i le Sao Toomata, afifio le toafa ma le toatolu o Alii, ae polapuipui e le mamlau ia Saleutogipoe o le limamatua i le faleupolu o tofiga. Faafetai i la outou puleto ma la outou faaaloalo ua mafai ai ona logona se leo o le auauna faatauvaa i totonu o le Maota o Samoa. Faafetai tele, faafetai, faafetai. Ae tapuai maia se i fai se manatu o le ta itumalo e uiga i le Tala o le Tupe ua iloilo ina nei e lana Palemene.

O le a leai sau faamatalaga tele i le tulaga o le Tala o le Tupe ona o lo o i ai le Taitaifono o le matou Komiti e faaleoina i se taimi le Lipoti a la matou Komiti, ae muamua ona ou faapea atu, lau Afioga i le Minisita o Tupe, faafetai faatoatoa, faafetai i Faauluuluga o Matagaluega, o i latou sa latou tapena lenei Tala o le Tupe.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

E le faigofie, aua e leai ni a tatou tupe tele e maua i totonu o Samoa, e utiuti lau faasoa, e fai o le manao, a o le fesili, o fea e aumai ai tupe e faatino ai le manao? E le lava lo tatou tamaoaiga i totonu o le tatou atunuu, faatusatusa i isi atunuu o lo o i ai o latou tamaoaiga e tele, o alagatupe e auala mai ai fesoasoani, a o tatou, e tagiilima, e taumafai, e aisi i fafo e nono tupe ona mafai lea ona faatino o tatou manaoga.

Lau Afioga i le Minisita o Tupe, o oe o le laua, ua e fagota i le sami loloto faava o Malo, ua lava lou silafia, ua lava lou iloa e te saili mai ai tupe e atiae ai le atunuu. E ui lava o lo o tau faasoasoa lau faasoa i lenei tausaga, a o lena tausaga, alo e fai ou faiva, faaoga i ai lou tomai, saili mai ni tupe e aumai ni fesoasoani ina ia sasaa mai i lo tatou atunuu, ona tuu lea o le 50pasene i Upolu nei, ae ave ave le isi 50 pasene e atiae ai si o tatou motu i Savaii. Ou te faapea atu, e le tele ni talosaga a lenei itumalo, ae i ai nai talosaga ogaoga e taua e tataua ona ou faaleo.

O le talosaga muamua, o lena ua i lau Afioga i le Minisita o Galuega ma Atinae Eeseese talosaga a lenei itumalo ma ona auala galue, mai lava i Fagafau, Samataitai ma Samataiuta, Fogatuli ma Faiaai. Ua maua le tala ua foi mai lau asiasiga. Ou te talosaga atu, e moomia lo tatou o faatasi e faasino atu tulaga o lo o pagatia ai nai o matou nuu. O lo o i ai fesoasoani a le Malo i auala galue, ae o le faafitauli o lo o i ai e le gafatia e nai o matou nuu ona teu ma faaleleia, ae o lo o i ai le manulauti a le HRPP, o mea e lelei ma matagofie mo Upolu nei, e fapena foi ona matagofie ma lelei mo Savaii. O le a le mea e le faata ai auala o si o matou itumalo? O i ina e ola lelei ai le niu, ola lelei le koko, ola lelei le talo, ma so o se mea, ona mafai lea ona lelei le atinae, aua o lo o fia galulue tagata, ae ua le tutusa generation i aso ia ma aso nei. Ua mananao ina ia alu le taavale i uta, o lo o i ai taavale, a o le faalavelave seiloga o le four wheel drive faatoa sao i uta i le aega. E moomia la le faaleleia ma faata e sao ai so o se taavale.

O le isi talosaga faamolemole, o le Matagaluega a le Soifua Maloloina, atonu ua faaleo atu e nisi o sui usufono o itumalo i tua faaletonu o lo o i ai falemai. O le faaletonu muamua isi o matou falemai, e leai ni fualaau i le tele o taimi. E tele foi ina tuufua falemai e leai se fomai faapitoa. Ua maua tala ua i ai le fomai ma lona faletua mai fafo, ae talitonu e le tumau lea fuafuaga. E tataua ai i le Matagaluega ona silasila totoa i ni auala e faatosina ai e ua maua le poto faapitoa i le faafomai ina ia mafai ona nonofo i Salafai, ua lelei aoga e aoga ai a latou fanau, ae manaomia sina two faaopopo i o latou totogi e faatumau ai ona nonofo lea i tua i falemai.

E le gata foi i lea, o le tele o nai tagata o si o matou itumalo, a omai e leai ni vai i Foalalo, ona omai lea i pasi e o i Tuasivi, e mamao. E oo mai isi gasegase ua maliliu i le ala. Ou te faamanatu atu, o le auala lea i le va o Taga ma Gataivai, sa taua i aso ia o le auala o le mativa. Ae afai ae maliliu soo nisi o le matou itumalo ona o le mamao o Tuasivi, ua tataua ona faaigoa o le ala o le oti.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

O le mea lea ou te talosga atu ai ma le agaga faaaloalo, se i silasila totoa i lea itu. E faatauaaina foi le soifua maloloina o nai tagata o si o matou itumalo ma le motu uma i Savaii.

O le isi talosaga faamolemole, o le talosaga i le Afioga i le Palemia, e i ai le taimi e auina atu ai faamanuiaga mo latou aiga, ua maua i faamatalaga e tau talosga ma fai le pepa e talosaga ai. Aisea le mea e le tuuina atu ai foi e faasafua, faasolo i nuu ina ia tofufufusia nuu uma ma ia faamanuiaga. Lau Afioga, e momoli atu lau faafetai tele e fai ma leo o le matou itumalo i lau Afioga i le Palemia ma le Kapeneta ma le Malo i tausaga ua mavae seia oo mai i lenei taimi, i le tauveina ma le faafoeina o le tatou Malo, e talitonu e le faigofie ae a ou toe tepa i tua i tausaga e tele ua mavae, ua tele suiga i le vaaiga e le gata ia i tatou o i Samoa nei ae faapea foi tagata mai fafo. Sa fesiligia nisi o lo o faimalaga mai fafo pe fiafia i Salafai, o le latou tali, òE fiafia tele i Salafai i lo Upolu nei. ò O lea e talosagaina ai le Malo se i silasila totoa i le atiaeina o le tamaoiaiga mo tagata tafafao mai fafo i le motu tele i Salafai, e i le tatou Tala o le Tupe. Lau Afioga, ou te le vivii atu, ou te le selu atu, ae ua tele suiga o le tatou atunuu i le Paeaiga a lau Faigamalo. Ia fesoasoani atu ia maua pea le lototele maua le malosi i le tino ma le mafaufau e faaaupegaina ai oe e le Atua aemaise o le Sui Palemia ma lau Kapeneta aua le taitaiga o Samoa i lenei lima tausaga.

Ou te faapea atu ai, ia manuia lau Afioga i le Fofoga Fetalai faapea sui usufono mamalu uma o le Maota, soifua.

Na faaalua le agaga fiafia o sui usufono o le Maota i le patipati o latou aao i le maea ai o le Saunoaga Faa-Taupou a le sui usufono mo Salega Sisifo.

FOFOGA FETALAI: Malo faafetai, faafetai saunoa i lau Afioga i le sui usufono mamalu. Ia, ua faapena ona faagasolo le tatou galuega. Ua toa 11 sui mamalu ua faapena ona maea saunoa. Ia ae manatu ina ia faapena foi ona vave tuuina atu le avanoa i le Kapeneta e tali fuaitau ai ia aemaise foi le Minisita o Tupe ina ia vave faatino finagalo e pei ona outou talosagaina. O le ala lena e naunau atu le Nofoa ina ia faagasolo le tatou galuega. Tulai mai se isi sui e fia saunoa.

Ia tulai maia, ia tulai mai le sui usufono, o se tasi o sui usufono o le Aiga Malosi. Tulai mai le sui usufono mo Safata Sisifo

LAUGA FAA-TAUPOU

Afioga LEAANA RONNIE POSINI (Safata Sisifo): Lau Afioga i le Fofoga Fetalai, ou te muai faatulou ma ou lalagi sugalu e momoli ai fetetaga o tupu. Ou te eli foi le tofau le anaia e tele o le a laga ai fetuøe o manaia.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafolaiga i luga o le faitauga faalua**

Ae o le mavaega foi na i utu o Manua, a tagutugutu le ala, aua nei fata laolaoina. Ou te taliulu foi i le fofoga ulaula o Sina Fatulua i lona vailia, ae popoø ne i see lilia lo ta faailo nai le faaseega.

Ae ou te faatulou atu i le tapuaiga a Lana Afioga Mamalu O Le Ao o le Malo o Samoa, lau Afioga Tui Atua Tupua Tamasese ma lau Masiofo. Afio o Sui o le Fono a Sui Tofia, Tuimalealiifano Vaaletoa Sualauvi II ma lau Masiofo, lau Tofa Tuiloma Lameko ma lau Masiofo, lau Afioga Le Mamea Ropati ma lau Masiofo. Ua sausaufialele foi le manu na gase i uamanu, ina ua musa lagona faagaetia i le afio o lau Afioga i le Palemia, lau Susuga Tuilaepa Fatialofa Auelua Lupesoliai Lolofietele Neioti Aiono Galumalemana Dr. Sailele Malielegaoui, o le Palemia. O oe o le siapo na lautele i Atua. Afio i lau Afioga i le Sui Palemia, lau Afioga Fiamē Naomi Mataafa, o le Saø Faapito. Afio i a outou Afioga i Alii ma Tamaitai Minisita o le Kapeneta. Le afio i lau Afioga i le Faamasino Sili, lau Afioga Patu Tiavaasue Falefatu Sapolu ma le mamalu o le Faamasinoga. :Le afio i lau Afioga i le Fofoga Fetalai, papaaao alii ma tamaitai faipule, o sui usufono mamalu na filifilia mai i itumalo taitasi i le Fonousu a le Malo Tutoatasi o Samoa, o le Fono Faitulafono po o le Palemene.

E le vaea le fala ooto, e le faagaloina le tapuaiga a Samoa o le atunuu tofi ua uma ona tafaitoto, mai paega mauululuga seia paia toafa tagutugutu o le loloto o ou vaof ilifili faapea ou vaosa ma ou vaofeai. I le afio o Tama ma o latou Aiga, o Aiga foi ma latou Tama, le usoga a Tumua ma Pule, Itua ma Alataua, Aiga i le Tai ma le Vaa o Fonoti. E talii foi ae popoe i le tapuaiga a Taitai o Ekalesia i le aufaigaluega tofofi a le Atua, i so o se fata faitaulaga, faanono manu i le Atua o le Silisili ese, aua se manuia o Samoa. Lea ua liu tino la outou tatalo sa fauao faupo, malo fai o le faiva.

Lea e saasaa foi tua le ava a Faleata, aua le tapuaiga o tatou uso i Sasae i le po o le fala ma ula le mulila, lau tapuaiga o ou faiva peau talaloa i le afio i lau Afioga i le Kovana Sili ma le Faigamalo, o paia lava lea aua Sua ma le Vaifanua, Fofa ma Itulagi, Saole ma Saleaumua le Launiu na Saelua ma Tama a le Manuatele. Ona ou faasee lea i Muliava, se i faalanu vai o Nofoa, aua le tapuaiga mamalu ma le leoleoa a loo itumalo pele o Safata i Sisifo. E ui ina vaeluaina lo ta itumalo e ala i le filifiliina o ni sui usufono taitasi o Safata i Sasae ma Safata i Sisifo i le Palemene, ae le mafai ona aveeseina ai mamalu o le ta itumalo, leaga o Safata o le Aiga Malosi. I le afio o le Falefa o le Uluga Tanifa, ma lo latou Faauluuluga, mamalu ia Taulauniu ma le Aitu Tagata ma le mamalu i le Le Alataua ma le Nofo a Tula ia Safata.

Ae faapitoaugafa sou leo i Safata Sisifo e amata mai Vaiee, Niusuatia, Lotofaga, Sataoa ma Saanapu. I le afio o Satunumafono, le afio o Tama a le Fale Teo ma Tuia, Afio le Matua, Susu Usoalii, Alalatai Safuiiane ma Faleata ma Gataiala ma lau Fetalaiiga Lutuimagamau.

Le Afio i lau Afioga i le Sao Faapito, lau Afioga Leituala, susu Manua susu Usoalii ma le Vaigafa. Lau Fetalaiiga Tupai o le Tootoo o le Manino ma le Aava, eetai tau i upu o Lealataua ma Tapaau le fano.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

Afio lau Afioga Afoa ma Ama, afio Pule ma Maugagaoa, lau Fetalaiga Saseve o le Igoamatua, ma le nofo a fanau, ma le mamalu o le Faletolu. Afio Taao ma Afemata, afio Seiuli, le Taauso ma le Maopu, lau Fetalaiga Faleafulugogo ma le Igoamatua, ma le mamalu i le Faletolu.

Afio lau Afioga Anapu o le Sao, afio o le Toalima o Alii, afio le Maopu o le Tuiaana, lau Fetalaiga Tuigaleava o le Igoamatua, o le Nofo a Ituaiga ma Aiga e lua ma le mamalu o le Faletolu.

E le mafai ona faagaloina Susuga i Faafeagaiga, ma o latou faletua o lo o falefaalemalu i lo tatou itumalo. O lo o outou faia le faiva o le tatalo, ina ia manuia lo ta itumalo, o soʻu foi faatauva e faaleo ai se finagalo o le ta itumalo. O mamalu na o lo o ta sapi ai, i upufai o Malo.

Lau Afioga i le Fofoga Fetalaiga, ma le mamalu o le Maota, e faaleo le agaga faafetai tele i lau Afioga i le Minisita o Tupe i le Tala o le Tupe ua folasia nei i le Palemene. E momoli le faafetai tele i le Ofisa o Tupe ma le mamalu o le aufaigaluega mo le tapenaina o le Tala o le Tupe. Ae fia faaleo nisi o mea e fia faaleleia o lou itumalo.

Lau Afioga i le Minisita mo Aoga, malo le galulue mo le atinaeina o tulaga o aoga aua o lea e ave i ai la tatou faamuamua, aua a manuia alo ma fanau o se atunuu manuia lea. Lau Afioga o le aoga o le matou itumalo, ua agai atu i le 500 tamaiti aoga o lo o i ai, o se fuainumera ua vave ona faatupulaia, e maitau atu ma sailiili atu, e na o le 10 faiaoga o lo o i ai. O lon uiga e foliga mai i le aofai o faiaoga o lo o i ai, a faatusatusa atu i isi aoga i le taulaga, e le i atoa se 500 a ua ou maitau atu toetiiti 40 faiaoga lea e i ai. E talitonu foi la le manatu, o le faasoaso tutusa o faiaoga, aua o i tonu foi e faaitiitia ai le agai mai o alo ma fanau o le matou itumalo i totonu o le taulaga. O lea e tatalo atu ai i lau Afioga i le Minisita i lo matou kolisi lea, ia se i alofagia ifo ni faiaoga o le itumalo.

O aoga tulagalua ia o le matou itumalo falelua i Vaiee ma Nuusuatia, o le aoga i Lotofaga ma le Aoga i Sataoa o le aoga i Saanapu, o aoga ia e le o atoa faiaoga, e tai toa ono faiaoga mai totonu o aoga ia. E talitonu foi o le taua lea o le matou maitau ai, ona e taitoatasi faiaoga i le lua vasega o lo o i ai. E talitonu o le faleaoga e momoli atu le faamalo i lau Afioga, ua i ai le tele o le suiga o le tulaga o faleaoga, a o nai faiaoga, o lo o manaomia ai le faaleleina o faiaoga, aua e talitonu, a lava a tatou faiaoga, ia o le manuia foi lea o alo ma fanau o le tatou atunuu.

Lau Afioga i le Minisita o Galuega, e momoli atu le agaga faafetai tele i galuega tetele i lau afioga foi, i le tele o manaoga o le tatou Malo, e faatutu atu i lau Afioga, o auala ia o le matou nuu i Sataoa, o auala ia i le agai i tai ma le agai i uta. A silasila lau Afioga pe afai ua oo atu i ai lau Afioga toetiiti a le sao ai se taavale i le agai lea i uta. O le auala lea o le tele o le matou nuu o Sataoa e nonofo ai ma afio ai. O le auala foi lea o lea e agai ai i uta i auala galue, e talitonu lau afioga e tuu atu i ou autafa, aua lau faaso i auala ia o si o matou nuu i Sataoa.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

E faapea foi si o matou nuu i Vaiee, le auala galue lea e agai i Vaiee, e talitonu a o auala ia e manaomia le faaleleia aua foi le mamalu o le atunuu o lo o agai i faatoaga, e tua i ai o tatou aiga.

O le isi lau Afioga i le Fofoga Fetalai, i le auala lea e agai i tai i Sataoa, e i ai le vaitafe lea e i ai i ina i le auala laupapa lea e i ina, ona o le suiga o le tau ua matou maitauina ai, ua pa atu nei le vai vae atu le paia o le Palemene, ona alu atu lea o le vai ua ova i luga o le auala. Ua agai atu le vai i tai i le aai, tele aiga ua afaina ai, talu ai suiga o le tau. Ia, tuu atu i lau Afioga i se suiga e toe sui ai le alalaupapa lea, mo le faasaoina lava o nai aiga ona o le tele o aiga ua aafia i le vai lea.

Lau Afioga i le Minisita mo Galuega, Felauaiga ma Atinae Eseeese maitau foi le auala lea i le alu i Saanaputai, le auala lea e faatino ai nei le ata tifaga. Ua tolu nei ata tifaga ua faatino i tai i Saanaputai, le auala lea e alu atu i Saanapu. Ae pei o le tasi lea o faafitauli e feagai ma kamupani mai fafo o le taumafai e faalaulelei le auala lea. Lau Afioga i le Minisita, ia tuu atu i ou autafa, ia e aoga foi le faaleleia o le auala lea e le gata o le matou nuu i le agai lea i tai, ia aua foi le faamoemoe mo mea nei o turisi e faatosina mai ai foi turisi aua le atinae o si o tatou Malo.

O nai moli auala i ina i le matou nuu i Vaiee, ia faapea foi le aoga lea a le kolisi a lo matou itumalo, e pogisa, ae manaomia ni nai moli e faamalamalama ai le kolisi lea, aua le faasaoina o latou meatotino a le kolisi ma le aoga a lo matou itumalo.

Lau Afioga i le Minisita o le Soifua Maloloina, faafetai tele i lau Afioga, i le tulaga lena ua agai ai le falemai i Saanapu. E momoli atu ai le agaga faafetai tele i lau Afioga. Matou te talitonu, o le vaai foi lea i le agai mai Apia ma le tatou falemai lea ma mataitu le tatou falemai, ua matua tumu lava. O lea e tatalo atu ai i lau Afioga i le Minisita, o se falemai, ou te iloa o i o le a sulufai atu i ai Safata ma Lefaga pe a mautu le falemai lea. Ae faafetai atu i lau Afioga, taatia atu i ou autafa, ia mo le toe faaleleia o le falemai lea i lo matou nuu i Saanapu.

Lau Afioga i le Sui Palemia, lau Afioga i le Minisita mo le Siosiomaga, o le matou nuu lea i Sataoa o la ua i ai le taligalu la ua i ai, ae ou te talitonu e le o faasaoina lo matou nuu. Tasi lea nuu tele o le matou itumalo, e manaomia le toe faauma o le taligalu o lo o i ai nei i tai i Sataoa. E tele se vaega e le i uma ona fai ai le taligalu, ia se i alofa ifo lau Afioga i le Minisita ia faapea foi Saanapu. O lo o i ai foi se vaega e toe faaauau i ai le taligalu.

Lau Afioga i le Fofoga Fetalai ma le mamalu o le Maota, o nai manatu i auaunaga lautele, aua le manuia lautele o si o tatou atunuu. Lau Afioga i le Minisita o Aoga, e taua tele i manatu le tulaga i aoaoga aemaise a le vaega lea o le aoga tulagalua. I lau maitau i aoga tulagalua i lo matou itumalo faapea foi nisi o aoga na asiiasi i ai, o lau maitau i ai, o le tulaga i mea o lipoti ia e aumai e tamaiti ia e fai, fai mai e aumai i faiaoga.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

Na ona faapea atu o le fautuaga i lau Afioga ma le Minisita mo Aoga i le tulaga lea i le faiga o lipoti aemaise lava vasega ia o le tulagalua, aua ou te maitau, pe fai e le Ofisa o Aoga ia ni lipoti e laugatasia uma ai ia Aoga ia Tulagalua. Ia ae vaai foi i ripoti, pei a e i ai mataupu ia e pei o le English, o le numera, pei na ona tau sao mai lava o le maka lea e i ai. Ia ae ua tatou oo i le vaitau lenei o le Igilisi ma le Numera, faamanino lelei le Vaega o le numera ma le Igilisi o la e vaivai ai le tamaititi ona maua ai lea o ona maka. Aua e pei e tau tuu saoloto ai faapea fai mai a o le numera e faaletonu. O le isi mea e tau maitau, ia aemaise a ia Aoga ia Tulagalua, aua a ou vaai atu nei i le Tausaga Muamua, Tausaga Lua ma le Tausaga Tolu, e tasi a le faiaoga e faia mataupu ia e fitu. E leai se Vaega foi lea, tatou fai piliota, aua e tasi a le faiaoga na te aveina le Tausaga Muamua, pule ia ma lona taimi e faavasega ai ana mataupu. Ae afai e faavasega foi lea i le tulaga e auai i ai faiaoga, e faapitoa le faiaoga Igilisi, faapitoa le faiaoga o le Numera, o i ina foi e iloa ai le faasoosoa tatau o taimi o le faiaoga e aoaoina ai tamaiti. Atonu o le mea foi lea e sau ai le isi tamaititi lelei na o le Samoa ae oti uma isi mataupu. Ae taua i lou manatu ona o i le e i ai le faavae o tatou tamaiti aoga. A lelei ona faavae ia le tulaga o aoga tulagalua, o le alu atu lava lea i le Kolisi, leaga sa ou galue i le Iunivesite, o lea ou te maua atu i le Tausaga 13 lea e agai atu, o le matuai maualalalo lava o le tulaga i le aoaoina lea e i ai, ona faitio foi lea i le isi taimi i le tatou Iunivesite, i le le lelei o tatou tamaiti na aoaoina, ia ae peitai na amata mai lalo o le vaega lea o le tulagalua.

O le isi mea e fia oo i ai se tautalaga lau Afioga i le Fofoga Fetalai, i le tulaga i le mea lea o le aiatatau a fanau. Lau Afioga e le iloa po o le tasi lea o mea o lea e afaina ai le tulaga o fanau aoga ia i le mea lea e i ai nei. O le maitau atu e latalata i le 30 tausaga talu ai, e matautia le tulaga lelei o amio faaaloalo o a tatou fanau. Ae o le aiatatau lea ua oo mai, o le tele ia o le suiga o uiga o alo ma fanau o lo o faaali i totonu o aoaoga aemaise lava le aoga a le Iunivesite. O le mea la lea lau Afioga, afai e le talafeagai le mea lea o le aiatatau, ia o le a le mea e le aveese ai le aiatatau. Tatou faaoga le upu, faataua a tatou fanau, ae o le aiatatau foi lea, ua tatou vaai ai i le tele o misa i aoaoga lea o fai nei.

Lau Afioga ona oo mai lea o se tala i le Iunivesite o Samoa. Faafetai tele i lau Afioga ona o le tuufaatasiga o le aoga a le Iunivesite ma le aoga a le Matata Eseeese, lea ua maitau nei ua 10 nei tausaga o faatino le faamoemoe lea. E momoli ai le agaga faafetai i Taitai o le Malo na latou faatinoina le faamoemoe lea. Ae ou te talitonu foi e tuu atu i lau Afioga lea ua atoa le 10 tausaga pe le toe i ai se komiti e toe iloiloina le tuufaatasiga lea, pe le toe i ai se isi suiga i le tulaga o le nainautaga o le taofi ina ia ave le tatou faamuamua i alo ma fanau ia lelei a tatou aoga. E fua foi i le aoga a Ausetalia lea e taua nei o le APTC. O le aoga lea a le APTC, o le aoga a Matata Eseeese mai Ausetalia, lea e vaavaalua i totonu o le tatou atunuu. E talitonu foi i ina i Ausetalia ma Niu Sila e tumaoti lava aoga ia.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

O le mea foi lea ua tatou vaavaai ai i le Aoga lea a le Matata Eseeese a Ausetalia ua aumai iinei, ona e tumaoti na ia mai le Iunivesite. Ou te talitonu la i le tulaga o le tuufaatasiga, ia faafetai i lea tuufaatasiga ua 10 tausaga ae le toe tagatagai ifo lau Afioga i le Minisita i lea tuufaatasiga, o le naunautaiga ia lelei alo ma fanau, aemaise lava le Matata Eseeese o le aoga lea tatou te tua i ai, e aotauina ai tatou fanau aua agavaa faapitoa, aua le tele o galuega aua ou te talitonu a lelei foi le tatou aoga lea, ia ua le toe aumaia foi ni konekarate mai fafo e faatino a tatou galuega lea lava ua maua i totonu o le tatou atunuu alo ma fanau e faatino ai ia agavaa eseese ia.

Ou te faafetai foi i le Vaega o Tusipasi Taualua, aua e maitau i le tausaga a mavae atu nei, e maua le 300,000.00 o le tupe na aumai i le Faalapotopotoga lea o Tusipasi Taualua, avatu i le Iunivesite e fesoasoani ma faatino ai galuega tau Matata Eseeese, ina ia faaleleia ai pea tulaga ia. O lea e momoli ai le agaga faafetai tele i le Vaega lea o Tusipasi Taualua, ou te faafetai foi ona ua faatu e lo tatou Malo le Faalapotopotoga lea, ina ia ausia ai e aoaoga uma a Samoa le agavaa maualuga ina ia aloaia ai tatou Tusipasi aua le feagai ai ma Niu Sila ma Ausetalia. A feoi foi lo tatou atunuu i alo ma fanau, e sue gofie galuega i atunuu mamao.

Lau Afioga i le Fofoga Fetalai, lau Afioga i le Sui Palemia, lau Afioga Fiame, e faaauau se manatu i le tulaga tau lisi o fanua lea e saina e lo outou Matagaluega le feagaiga lea. E talitonu foi o lea ua aafia ai nisi nuu o lenei itumalo, i sainiga o feagaiga ia, ona e tau maitau atu, aemaise a ia fanua ia e tu lalata i sami e fiafia i ai tagata tafafao maimoa mai, e i ai fanua e sainaia e le Matagaluega ona saina lea o le Feagaiga lea, ae tapa mai e le Ofisa o Turisi o le a le mea ua saina ai le feagaiga lea ma le Kamupani lea ae o le Kamupani lea e tataua ona aumai muamua e saili e latou po o i ai ni a latou tupe ae mulimuli ane ua uma ona saina le feagaigae le Siosiomaga ia ua leai la se mea e toe mafai i ai. O lea la e tau fai i ai. O lou la talitonuga, e a pe a aafia ai ma le Matagaluega o Tagata Tafafao Maimoa Mai. A o ni feagaiga o ni fanua tau Samoa ia, tataua ona aafia ai le Matagaluega o Turisi e sutesue lelei, ia kamupani ia mai fafo e faatu o latou faletalimalo. Po o ni kamupani e tele ni a latou tupe. E talosagaina foi lau Afioga i le tulaga tau oneone. O lenei foi nuu ma lenei foi itumalo e tele foi ina faatagaina le lauina o le oneone, ia se i alofa ifo e fua i ai le pemita mo le faatagaina o le lauina o le oneone.

Lau Afioga i le Minisita o Faamasinoga, faafetai tele i galuega fai a le Faamasinoga. Lau Afioga e maitau i totonu o le Faamasinoga aemaise a i faamasinoga tau apili ia e fai nei, masalo o le tele o tausaga o taliga le tatou faamasinoga o le apili. Pe leai se isi faiga a lau Afioga ma le mamalu o le Matagaluega e tau faavavevave ai tatou faamasinoga apili ia. Tau maitau foi i lau Afioga, ia e i ai foi isi taimi e taliga ai iuga o faamasinoga e i ai faamasinoga ua maitauina ua ova ma le tai tausaga o taliga o latou faaiuga, ia ua avefa foi ma mea ua taliga ai fuafuaga a aiga i o latou faamoemoe e le gata i matai, ia a o fanua foi.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

Lau Afioga i le Minisita mo Galuega, Felauaiga ma Atinae Eseeese, faafetai tele mo galuega tetele ia o tatou auala. O le matou auala lea i Saanapu lau Afioga, e i ai mea ia e faata foi lele e pei e faata motumotu foi lea le auala. E i ai lona aafiaga ua ou tau maitau e pei e lautele le itu lea ae pei e lauiti le isi e i ai le mea ua ou tau maitauina i le isi taimi, e pei ua tau saosaoa foi maua loa le malu lea, tau tupu ai loa faalavelave. O le faafitauli lea, tuu atu i lau Afioga e faasosoo atu loa le ta lea i le lautele ia ona manaia a lea o le feoaiga o le tatou atunuu.

O le resitala i le LTA ma le vaega lea o taavale. Ua tau maitau foi ma le totoa i totonu i le mea lea e pasi ai tatou taavale, o le tatou atunuu foi ua tele taavale. E silasila foi a tau maitau le aofai o taavale e pasi i le masina, ia ona fua lea ua amata ona tele, po ua amata ona tele. Pe leai foi se taimi e ono faamatu ai i tua, i le pasiina o taavale, ae i ai foi ni iaiaga e tuu i tua i Kamupani ua agavaa ma talafeagai e pasi ai a tatou taavale. E le gata i lea, o meafaigaluega o lo o pasi ai tatou taavale i le LTA. E iai nisi o masini ou te iloa ua tataua ona ua toe faaopoopo i ai aua le pasiaina tatou taavale. E i ai isi taimi o taavale na tau avatu o lelei taofi, ae tau patatu loa iina, ia ua tau faaletonu ai foi ma taofi o tatou taavale.

O le isi mea talu ai i lea na tupu i le ave taxi lea na taua na faia le mea valea i le tulaga o le Sisigafua lea na uma atu, lau Afioga i le Minisita, se i suesue maea ia le faiga o lipoti ia o avetaavale o lo o aveia ia tatou pasese, e tauvalea ai le tatou atunuu. Ia ana fai nei foi la o se tagata tafao maimoa mai fafo, ia ou te talitonu, lau Afioga i le Minisita o Matagaluega o Leoleo se i tagai totoa ifo lau Afioga, mo lipoti ia e aumai e le tou Matagaluega e ave e fai ai laisene avetaavale, ona faatoa fai lea o laisene o avetaavale. A o lea e maua le tama lea na faia le faaletonu lea ma le solitulafono sa i ai foi isi ana soligatulafono muamua, sa tataua lava ona aveese lona laisene ma aua nei toe aveia i ai se laisene avetaavale. Ou te talitonu e aoga foi i lau Afioga i le Minisita e tuu atu i ou autafa aua o lea na maua o le avetaavale lea sa molia muamua ia a o lea lava na faataga i ai le laisene avetaavale.

Lau Afioga i le Minisita o Tupe, malo le faautiuti o le faasoasoa i le utiuti o le faasoa o le Tala o le Tupe. Faafetai tele mo le Tala o le Tupe, ae pau lava lea o lau faafesili i lau Afioga i le Minisita o Tupe, e i ai le tatou tupe faasili lena e i ai, i le Tala o le Tupe lenei 2016/2017 e \$23 miliona. Faafetai tele i lau Afioga ona o lea e i ai lea faasiliga, ae sa tau i ai foi se manatu, pe le tau faaitiitia ai le tatou nonogatupe ae aua laia le faasili lea e \$23 miliona. O le agaga foi e faafetai o lea e i ai le faasili lea, pe le mafai ona fai ai se isi atinae a le tatou Malo o lo o manaomia ma ave i ai le faamuamua.

Lau Afioga i le Fofoga Fetalai, e fia faamauina le agaga faafetai i lau Afioga i le Palemia ma lau Kapeneta, faafetai mo galuega atinae lelei aua le manuia o le tatou atunuu ma e talia lelei e lenei itumalo le Tala o le Tupe ua folasia nei i le Palemene. Ona faaiu atu ai lea o so matou leo, lou itumalo e, e manatua pea i lou loto le agiagi a Fonoti ia Toleafoa, e ui a ina ua le toe lagona sau tala, ae ou te tautala pea i lou suafa i aso uma.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

O lau pule lea, e le palea nei lelea, e le ula foi i avea, ae o le a tusi i le papa aano o lou loto matamata tetele ai lau faaalalo, e le mafai ona galo. O le a sou faatauvaa, ou te faamoemoe pea i le Agaga o le Atua, e nanenanea ai sou vaivai faatasi ai ma la outou tapuaiga leleoa e atoa ai atu i liu aua so ta sao i upufai aua sona lumanai manuia. Ou te tatalo foi ia tumau manuia i ou aupā i lau Afioga i le Fofoga Fetalai, ia tofa i le Atua lau faatautaiga, lau Afioga i le Palemia ma lau Kapeneta, le afifio o Minisita Lagolago, ia lupeni faalupe taliaami la outou filifiliga, sagai ane ai o le tai, ia mamao la outou silasila, ia loloto la outou tofa, aua auma o tau pupue i la tatou folauga.

Le paia e o le Palemene o le Fonousu a Samoa, o tatou tauau lea ua fufusi ma lalafo mai i ai le faatuatua o Samoa, o le a se tatou maa e togi ma se aso e velo, ia fai lea ma ala e manuia ai Samoa, ae sili ai ona viia le Atua, Le o lo o faavae ai Samoa. Ia manuia tele Lana Afioga Mamalu O Le Ao o le Malo, le tapuaiga a auuuna a le Atua, tainane le tapuaiga a Samoa, manuia le Palemene o Samoa. Soifua.

Na faaalua le agaga fiafia o sui usufono o le Maota e ala i le patipati o latou aao i le maea ai o le Saunoaga Faa-Taupou a le sui usufono mo Safata Sisifo.

FOFOGA FETALAI: Malo faafetai. E le tau faafuluina le saunoaga mamalu. Malo tapena, faafetai foi i le itumalo i le latou tapuaiga ua manuia ai le saunoaga. E tapa se isi sui usufono e tulai mai e faaauu le tatou galuega. Atonu ua lata mai foi le tatou malologa masani ao lea lava e maua avanoa. E manaia foi le amata ae toe foi mai le malologa toe faaauu.

Ou te tapa le sui usufono mo Sagaga le Usoga. Tulai mai le Minisita Lagolago mo Galuega, Felauaiga ma Atinae Esee.

LAUGA FAA-TAUPOU

Susuga SEIULI UELIGITONE SEIULI (Sagaga le Usoga): Faafetai i lau Afioga i le Fofoga Fetalai. Sa i ai le manatu e le o le taimi lea ou te lauga ai, sa ou faatalitali sei maea mai le Itu Agai ona fai atu lea o se tala a lenei Itu. Po o le vaega foi lea lauga faataupou, aua o le latou taimi muamua lenei aua e lei leva atu foi ona ou taupou, ae o lea foi o le a toe faataupou atu lau lauga. Ae le afaina lea, leaga o lea uaí .se i outou faafofoga foi ma outou faalogologo foi i ni moegalalo foi o nofo ma lenei Itu. Ua text faafia mai lou itumalo fai mai ou te lauga ia. Ou tali atu i ai, òAua le popole, e le i leva foi ona ou lauga talu ai i lenei tausaga ua mavae atu i le Palemene ua uma atu. ò Ae te i ua toe text mai le isi alii o lou itumalo, fai mai, òSe o lenei ua lauga le Afioga i le sui mamalu mo Aleipata Itupa i Luga, ou fai atu, oi, ua tatau foi la ona ou lauga foi au.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

E le tele se manatu o lenei itumalo, e faigofie lava lou itumalo. O lou itumalo e le o se itumalo tagisa, e uma loa ona lafo i le Malo ona fai loa lea o le latou tatalo i le Alii, ia alofa mai, fesoasoani mai alofa i le Malo e tali mai. Aua o lea ua fetalai le Alii, ðA i ai se mea tou te mananao ai, ona outou ole atu lea e ala atu i Lona Suafa.ö

O le a taumafai atu lenei itumalo, e le umi se lauga. Lau Afioga i le Fofoga Fetalai, ua ou tulai atu i le ava tele ma le faaaloalo e fai se manatu o lenei itumalo o Sagaga le Usoga, e tusa ai o le Tala Faatatau o le Tupe, e pei ona soalaupule nei e le Maota. E faatalofa atu i lau Afioga i le Palemia, Sui Palemia faapea le paia ma le mamalu o Minisita o le Kapeneta, Minisita Lagolago ae tainane foi le paia ma le mamalu o sui usufono uma o le Palemene o Samoa. E le faagaloina lava le agaga o le tapuaiga i Lana Afioga Mamalu O Le Ao o le Malo Tutoatasi o Samoa ma lau Masiofo, faapea Tuatoatasi o Samoa ma lau masiofo, faapea foi Afioga a Sui o le Fono o Sui Sui o le Fono a Sui Tofia ma a outou masiofo. Afioga i le Faamasino Sili ma le mamalu o le faamasinoga, aemaise le tapuaiga a le aufaigaluega paia a le Atua o sui ma feoi o le Talalelei. O paia o Samoa o paia lava e le toe aveesea, o paia e tumau e le toe faaufaailoina i sau faamatalaga. Pe oo i ai sau faamatalaga pe leai foi, e le mafai ona toe toesea ai se iota se tasi. Aua o le ia e iviivia o le paia lava mai le amataga e oo lava i le gataaga. Ua faamalo le tapuai, ua manuia faiva o le Palemene ona o lau tapuaiga e pei o le patipati taoto a le Feepo. Ou te faatalofa atu foi i le alofaiva ai a lau Afioaga i le Failautusi o le Fono Aoaofaitulafono, faapea le aufaigaluega a le Ofisa o le Fono. Le tapuaiga a Faauluuluga o Matagaluga ma Faalapotopotoga Tumaoti a le Malo. Le aufaasalalau i le leitio Televisi ma nusipepa, faafetai mo lo outou sao taua faamalo lagolagosua.

Lau Afioga i le Fofoga Fetalai, ona ou oo mai lea i le Tala o le Tupe ua i luma nei o le Laulau a Fonoí .

FOFOGA FETALAI: Ua ou faauilavea i le saunoaga a le sui usufono mamalu, o le mea sili o lea sa faamoemoe se i maea lau folasaga aua le itumalo ma le afioaga. A o lea ua matau atu, o lea o le a e agai tonu lava i le tulaga o le tatou galuega aua le Tala o le Tupe. Ua i ai le manatu, o le a vavae foe, o le a faataatia ese galuega a le Fono Aoaofaitulafono mo lana malologa masani, ona talii mai lea e faaauau lau saunoaga. Faafetai.

Na faataatiaese Taualumaga a le Fono Aoaofaitulafono mo lana malologa masani i le itula e 4:46 i le aoauli ma toe faaauau i le itula e 5:25 i le aoauli.

Na toe faaauau Felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu. 2) 2015/2016 ma le Tulafono Tau Faaofi o le Faatatauina o Tupe 2016/2017.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

FOFOGA FETALAI: Ua ou manatu ua maua le faasiligamalosia ua matu i fau le taliga o le sua ma le tautega aua le taumafataga m m na tapenaina e le Ofisa o le Fono Aoa ina ia faapena ona maua lo tatou malosia e faaauai ai le tatou galuega. E faia le malologa o saunoa le Minisita Lagolago o Galuega po o le susuga i le sui usufono mamalu o le itumalo o Sagaga le Usoga. Ou te tapa le sui usufono mamalu e tulai mai e faaauai le saunoaga.

Susuga SEIULI UELIGITONE SEIULI: E momoli atu le faafetai tele i lau Afioga i le Fofoga Fetalai, faapea foi le Afioga i le Failautusi o le Fono Faitulafono o Samoa mo le faasiliga malosia aua le faaauaiina o le Fono a le Palemene. Lau Afioga i le Fofoga Fetalai, ona ou oo mai lea i le Tala o le Tupe, ua i luma nei o le Laulau a Fono, faafetai i le Minisita o Tupe faamalo i le Ofisa Sili ma le Matagaluega o Tupe, faafetai mo le faasoasoa i mea e manaomia ai le seleni aua le ola fiafia ma le ola manuia o tagata Samoa. Aua e fai foi o le silasila i lauamanu ae ao foi ona matait le faamulioatu. Ua matua lagolagoina e lenei itumalo le Tala o le Tupe ua soalaupule nei i luma o le Maota. Lau Afioga i le Fofoga Fetalai, e i ai le manatu, e ao ona ou oo i lou itumalo o Sagaga le Usoga, o lo o faafofoga tapuai mai aua e le galo lava Afia i si ona vaa.

Le paia o lou itumalo, lou nuu o Tuanai i le afifio o Saena ma le Aiga Sa Saena, susu Luafatasaga o le alo o Fuatino, afio Tuitea na tofia p p , lau fetalaiga Tupai le fale ma le afu o le Alataua. Ae faapea foi lou nuu i Afega le afio o le Aiga Sa Gauifaleai, lo oulua toalua Fata ma Maulolo o tuatua o le Gatoaitetele, le vagana i tulafale ma upu ia te oe Tuisamau.

Ae le gata foi i lea ae faapea foi le tapuaiga o lou nuu o Malie, i le susu o le Tapaau Faasisina le Malietoa, e susu i lona nofoa vaevelololoa, i lona tala na atoa, a malele ua faafofoga Samoa. Afio Maualaivao ma le Matua ia Faamausili, susu Seiuli o le ulu na taulata a le Malietoa, susu Taito o le Foalii ma le Aiga sa Maualaivao, le mamalu tele i le paia o le Toafitu o le maota o Malietoa, ma lau fetalaiga Auimatagi. Le upega o fetalaiga ma le lautia na laulelei, le alo o Leului ma Salapo. Faamalo i lau tapuaiga lou itumalo, o faiva e tapuaia o faiva ia e manuia. Ua faamalo le lagolago i lou nei tagata lou itumalo. Ua malie le pule i maga ua malie le ua na to i le va, ua malie Sogalesele i lau pule lea ua t t tetele, ua ou sapaia faatuaelele. Faafetai mo le tapuaiga, tatou te au i le tauola e au foi i le fagota. O lau faaaloalo lea, ua ou tiu ai nei ma ou sapi ai i upufai o Malo, aua nei faatoina faiva. O au nei, ao oe taeao. Se a ea le tagata faatauvaa ua e manatu ane ai? Ou te fia faaogaina foi lenei avanoa taua e momoli atu ai lau faafetai tele i sui tauva sa matou tausinio mo le tofi o Nofoa o le Palemene. Lau Tofa Togatalim Faafouina, lau fetalaiga Maulolo Tavita ma lau fetalaiga Fata Meafou. Faafetai i le Atua ua tau muliai i galu tau ma galu fefatiai, o lea ua lautasi le matagi, ua lafo le mal faafetai tauva faatamalii ma le tausinio faafaleupolu. Ua o se ata lau togi ua lagatila ae faapulou i le tualima, ua faamalo fai o le faiva. E iloa le tiā e malie e na ona fifimalie.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

Lou itumalo e, o a ni galuega e fia faaleleia mo le mamalu lautele o le tatou itumalo e pei ona ou talosagaina i le Paeaiga ua mavae atu, lafo maia lou faatuatuaga i le Malo mo lana faasoa. O le a faapea foi ona le mapu lou tuitui ma faaolomaau i le Malo ina ia alofagia a tatou talosaga ua maea tuuina atu.

Lau Afioga i le Fofoga Fetalai, e le faaitiitia le agaga faafetai i lau Afioga i le Palemia ma le Kapeneta mamalu, aemaise foi lau Minisita le Afioga ia Papaliitele Niko Lee Hang i loʻu valaaulia e tautua le atunuu, e ala lea i le tofi Minisita Lagolago mo le Matagaluega o Galuega Felauaiga ma Atinae tetele, e le i manatu lava Asomua o le a sii lona fale i luga o le mauga, ae faafetai alofa, faafetai le amanaia, ua mata e fia vaai le vaa o Inu, faamalo faaeaea mo si ou itumalo. O lau pule lea.

Lau Afioga i le Fofoga Fetalai, o le a seu i fanua le sa o lenei itumalo, e ui ina naunau atu i le avanoa faaauo ua tuuina mai mo lou nei sui usufono, ae manao i le ufi ae fefe i le papa. O si ota lima foi e toe paia ai si ota mata. Ia lagi e mama ma faafualoa e le Atua le soifua o Lana Afioga Mamalu O Le Ao o le Malo ma Lana Masiifo, ni ao gasolosolo aua le tapuaiga a Afioga i Sui o le Fono a Sui Tofia ma a latou Masiifo, lagi e mama lau Afioga i le Fofoga Fetalai o le Maota, faamanuia i le Palemia ma le Sui Palemia, mamalu o le Kapeneta, Minisita Lagolago ma sui usufono uma o le Palemene. Ia manuia le tapuaiga a si ou itumalo o Sagaga o le Usoga aemaise lau faafofoga Samoa, ae ou ola i le alofa ma le agalelei o le Atua. Faafetai.

FOFOGA FETALAI: Malo faafetai. Malo saunoa i le Afioga i le sui usufono mamalu, ma ua avanoa foi le Palemene mo se isi sui usufono mamalu e faaauau le saunoaga i le tatou galuega. O le avanoa lenei mo se isi sui usufono e saunoa faamolemole.

O lea ua faailoa mai le lamepa a le sui usufono mamalu, le Minisita Lagolago mo le Matagaluega o Leipa, le sui usufono mo Palauli Sasae. Ia, tulai maia o le uluai Paeaiga foi lenei a le sui usufono mamalu, a o le saunoaga faataupou foi lenei a le sui usufono.

LAUGA FAA-TAUPOU

Afioga TUIFAASISINA MISA LISATI LELEISIUAO PALEMENE (Palauli Sasae): Lau afioga i le Fofoga Fetalai o le Maota, faapea Sui Usufono mamalu uma o lenei Maota, tainane Samoa faa-foga-foga mai, ou te tulaʻi atu ma le ava, e fai se sao o lenei Itumalo, o Palauli Sasae, i le Tala Faatatau Autu o le Tupe 2016/2017.

E le gata i lea, aʻo le uluaʻi saunoaga a Faasisina ma S -Lilomaiava, ma le levaleva ia Sa-Faleletaua ma Palauli na potopoto, ma Oe le Pule, mo lenei Paeaiga Lona XVI, o le Palemene o le Malo Tutoatasi o Samoa.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoga i luga o le faitauga faalua**

Paia ma Mamalu: Ona faasifo lea ma le gatete o le tauvaʻa, au ua soʻua le lotolau ma lafolalo le tuaaʻu, ua taʻa le igafo o tanifa na iʻate i ai tautai a le Tuimanuʻa. Au paia, faʻaifogat o lenei Maota, tainane le maualuga faʻaofogat o Samoa, faʻaofoga tapuai mai.

Maota; A faʻasolo malie le seeliliʻa s ma faig , ona ou muaʻi paia lea ole maota ma le malae, aua e ui ua malae-tauave Tiafau, ae le tuʻeseeseina ma mamalu ole Maota o Samoa. Au le eʻe papa-aao o lau Afioga i le Fofoga o le Maota o Samoa, lau Afioga ile Fofoga Fetalai. Tainane le afio o le Afioga i le Taitai o le Malo, le Afioga i le Palemia, faapea Minisita o le Kapeneta ma Minisita Lagolago.

Mamalu mai foi lena itu o le Maota, i le afio o sui usufono mamalu o le Palemene, au Taitaifono ma Sui Taitaifono, ma sui usufono o Komiti Faapalemene.

Susu foi lau susuga i le Failautusi ma le Sui Failautusi o le Maota ma le Aufaigaluega a le Palemene, faapea Faauluuluga, ma Sui o Matagaluega, ma Faalapotopotoga a le Malo, ma le mamalu ua tatou faatasi.

Tafatolu o Faigamalo; ona afe lea o sa matou faamatalaga, au le taotoga-a-iʻas o le Tafatolu, o Ituau Fefaʻatauagai o Faigamalo. Ae a le tapuaiga a le Faamasino Sili ma le Faamasinoga, ma le potu moli i futiafu i lenei taeao, o le Pulega Faatonu ma le Palemene e tusa o la matafaioi uʻulima, e i ai lenei aso.

Samoa; Ona ou afea lea o le s -el -ma-taʻua, au o Samoa o le Ao e m -i-mala, i ona lum -fatu-toto ma ona papa-tu-loto. Ae, e leai foi se malosi aʻo se faafia-atamai e fia utu-vai-tofo i ai, au ua malu-tau-aso le Maota o Samoa.

Ua taoto-tanu le fatulua o tofiga, ua maape foi le tafaʻi-lauoʻo o mavaega, ae ua o tatou tautu-faasolo foi faaaloaloga a tua ua tofafa i tiʻas . Ae a le afio, i fata-lele o le s -folau o Samoa, O le Afioga O Le Ao Mamalu o le Malo o Samoa ma le Masiofo, faapea le malu-taueʻe, o le s -seʻetolu o le Fono a Sui Tofia. O le paia lava lea au Tama ma Aiga, Pule ma Tumua, Ituau ma Alataua, Aiga i le Tai ma le Vaa o Fonoti.

Tutuila ma Manua; ae manatua foi i le loto le tapuaiga a Tutuila ma Manua, au Sua ma le Vaifanua, Fofu ma Aitulagi, Ituau ma Alataua, Saole ma Saleaumua ma le Launiu Saelua, Faatuiolemotu, Toʻotoʻo-o le-Faleula ma upu i le Manuatele.

Aufaigaluega Totofi a le Atua; ae le galo foi i le loto le tapuaiga tatalo ma le faanon g man a leAufaigaluega totofi a le Atua i soʻo se fatafaitaulaga i so o se afioaga ma alaafaga.

Faafetai mo le Faaeaea: Lau Afioga i le Fofoga Fetalai, so o se folauga lava e taumuli i le ava, o fea e taoto ai faamoemoega ma taunuuga, ae taumulimuli talosaga ma faanon g man a le tapuaiga, ina ia taulau le faamoemoe. E mafua ai le agaga faafetai, e fia faaleoina.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

Itumalo o Palauli: Si o'u itumalo pele i le loto ma le mafaufau ó o Palauli Sasae. O ai ea le tagata ma le atalii o le tagata ua outou manatu ane ai. Ae p l na aog e asu so outou vaitaumafa, ae ua outou siá lava le tagata faatauva, i la outou tofa faaeaea. E mafua ai ona l m taofiofia le puna aøe o le agaga faafetai, ona o lau pule-t , ua malie mal , faafetai, faafetai, faafetai tele lava.

Vaitoomuli: Faafetai tapuai, faamalo tatalo i lau susuga Feleti Sefo ma le Faletua, faifeau EFKS, faapea foi le susuga Alosio ma le Faletua,- feasoasoani Katoliko, le susuga ia Pastor Pagaemaalii ma le faletua, faapea le susuga ia Tapusoa Faafia ma le faletua Epikopo i Vaitoomuli.

E faapena foi le faafetai ma le faamalo i le tapuaiga a Tapaau ma le Aloalii, ma Alo o Lilomaiava, faapea Tulafalealii, ia Fiso ma Seumanufagai ma le levaleva ia Sa-Faleletaua.

Faala: Faafetai tapuai, faamalo tatalo i lau susuga Uili ma le Faletua, Faifeau EFKS, faapea le Susuga ia Ioane ma le faletua, Fesoasoani Katoliko, faapea foi le Susuga ia Savea Levini ma le Faletua ole Epikopo i Faala.

E faapena foi le faafetai ma le faamalo i le tapuaiga a Alo o Lilomaiava, Sa Lulu ma le Matua, faapea le Saø Fetalai (Lagaia) ma le Uso (Tui ma Tapusoa) ma le Tofa Manusina.

Vailoa: Faafetai tapuai, faamalo tatalo i lau susuga Siaosi Leleimalefaga ma le Faletua, o le faifeau EFKS, lau Afioga Patele Falaniko, le susuga ia Sio ma le Faletua, Tiakono Katoliko faapea lau susuga Iosua ma le Faletua, Ekalesia Assembly of God i Vailoa. E faapena foi le faafetai ma le faamal ó i le tapuaiga a Faasisina, ma le Aloalii, le Fofoga o Lilomaiava, faapea le Faleao ma Sa-Letaulua, Toluono ma le aiga a Falelima, faapea Le tapuaiga i le Nofoalii, le tofa ia Savea ma Lemoa, Tui, Misa ma Ulumea, le tapuiaga i le Matua, le tofa Maá ma Latu, ma upu ia oe Palauli. Palauli e iloga oe i le Nofo- -Pule ma le va faafeagai ai ma Tumua, au e te toala-faa-autama - i Tama ma Aiga uma o Samoa, ma lou gafa-na-soo ai Samoa, ma ou vaipapa na susua ma tutupu mai ai, toa o Samoa.

Faafetai faaaloalo, faafetai faaeaea, faafetai faafetai tele lava. Tau ia, ia maua se malosi e tauave ai ou paia ma mamalu aua lenei faaaloalo maualuga, ua ou ula ai.

Sui tauva: Ou te fia faaleoina foi le faafetai, i tuafafine ma le uso (vaeatu outou s ma faig) sa o matou tauva i le tofi o la tatou itumalo. O le mea moni, o Palauli o le Aiga. Faafetai taupati faatamaalii, faamalo tausini faa-faleupolu. Tatou, taufai tatalo, aua, e oso lava malama, e togo foi, taeao matagofie, aua e agi lau-fofola le alofa ma le agalelei o le Atua, i aso uma.

Tapuaiga a Aiga: Ona afe lea o se tala faafetai i le lotoifale o si ou aiga, e l gata i Palauli ae faapea foi tafa e fia o Samoa, ma atunuu i fafo, faapea foi uso ma tuafafine, tausoga ma fanau, uo ma e masani, faapea foi Tamaitai Monike i Samoa ma Aukilani, Niu Sila. Faafetai alolofa, faafetai tatalo

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

Lau Afioga i le Fofoga Fetalai, ona ua i ai lava i le agaga faafetai, ae ou te iloa foi, o lauga faa-taupou nei a sui usufono, e toe saili mai e fai ai le molimau a le Malo pe afai e tuumalo se sui usufono. E mafua ai ona ou manatu, pe aamu mai foi nisi sui usufono, ae fai pea lau faafetai i lou toalua.

Talosaga ma le fanau, tusa pe tauemu mai isi sui usufono, ae ua faafofoga i luma o lenei Maota ma Samoa, ua ou faafetai atu ia te oe le pele ma le fanau. O le a foi le finagalo o le Atua, ae tautalaaso lenei lauga faa-taupou ile molimau a le Malo, e taulagia ai laʻo faafetai ia te oe ma le fanau, aua o se miti, aʻo se faanaunautiga na puna ae i loʻo loto, ae, o outou tauau ma le fanau, o lo o tausoa ai.

E le muliaʻi ona tuuititia lea o le loto faafetai mo le tapuaiga a si oʻu tina pele, o Faimafili Moefaaouo Leleisiua, faafetai tatalo, faamalo tapuai. E aliali lou alofa, e iloaitino foi lou agalelei. Ia, ua uma lea vaisua, o le loto faafetai ma le agaga faagaetitia i si ou itumalo ma le aiga, ona o le amanaia ma le faatuatuaga ua aumai.

Ona fou lea o si ou vaa, se i faaleo manaoga o si ou itumalo, e taatia atu i tafatafa o lau Afioga i le Taitai o le Malo ma a outou Afioga i Minisita o le Kapeneta, aua lenei 5 tausaga ua savalia.

Manaoga o le itumalo: Aotelega o le Tala o le Tupe. Lau Afioga i le Fofoga Fetalai, ua manino le saunoaga a le Minisita o Tupe i le Autu o le Tala o le Tupe 2016/2017, e faapea –“*Faamalosi le Faavae ma Tāpena mo a Taea.*” O lea Autu, o lo o sosolo mai le Sini Autu o le Tala o le Tupe 2015/2016, e faapea o ʻā fua o tatou manao i le seleni ua tatou maua. ʻō Lea e lalagofaatasi ma le faamamafa o le Tala o le Tupe 2016/2017, e faapea o ʻō Toe fetuunai tupe maua ma tupe faaalua, ina ia fausia ai se faavae mautu mo le tamaoiga mo le lumanai. ʻō

Lau Afioga i le Fofoga Fetalai, e le tau faamalalaina le tulaga o lo tatou tamaoiga, e leai ni a tatou minerale ma ni oa faalenatura tatou te faamoemoe i ai, e faatau atu e maua ai ni tupe se tele, e atinaʻe ai si o tatou atunuu, ia pei o le tamaoiga o isi atunuu. E mafua ai le loto faafetai, e le gata o le Autu ua tapulaaina, ina ia ʻō faamalosia faavae tau-tamaoiga, ma tapena mo a taeaʻo, ae o le faanaunautiga, ina ia mulimulitaia ma ausia le Autu ua faataoto. O le mea moni, e le gafatia e a tatou atinae o i ai nei, ona faafetai o tatou manaoga, ae faamoemoe i le tofa poto mai le Atua, lea ua foaiina i o tatou Taitai, e faafoefoe tatau ai, o tatou manaoga, ma ave ai le faamuamua i mea e tatau ona faamuamua mai lea taimi i lea taimi.

O i tonu, lea e taoto ai se taofi o Palauli Sasae, e tuu atu i tafatafa o lau Afioga i le Taitai o le Malo ma le paia o le Kapeneta, manaoga o lenei itumalo, au lau faasoa i lenei 5 tausaga o le Paeaiga. Ae auala atu i le Nofoa, le tuualalo a Palauli Sasae i lau Afioga i le Minisita o Tupe, e faapea, se i e tagai totoa ane i le atinaeina o le taulaga i Salelologa ina ia maua ai ni galuega mo tagata Savaii, ma le toe tau omai i Apia, ae ia nonofo pea i aiga ma afioaga i Savaii ma atinae ai laufanua mo fua o faatoaga, aua le auina atu i fafo, e maua ai seleni e tua i ai le tausiga o aiga ma tautua ai ekalesia ma nuu.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

Matagaluega mo Galuega, Felauaiga ma Atinae Eeseese; lau Afioga i le Fofoga Fetalai, e auala atu i le Nofoa, le talosaga i le Afioga a le Minisita mo Galuega, mo auala galue o si o'u itumalo, e moomia le faaleleia;

(i) Auala Galue o Vailoa, Vaitoomuli ma Faala, e moomia le fia faaleleia, ona o lea ua toe lalaga maumaga, ma ua maua avanoa i faitotoa e aveina ai a tatou talo i fafo. Aua a lelei auala, ua faaosofia foi le fia galulue ma toaaga e fai maumaga, ma le toe-tau saili galuega solo mai i le taulaga, i Apia.

(ii) Auala i le Afu Aau; e moomia le fia faaleleia o le auala i le mataaga lea i Vailoa, mo le faafaigofie ai ona afea e tagata tafafao maimoa mai fafo, aua e maua ai seleni mo le afioaga, faapea le atinaeina o aiga taitasi.

(iii) Auala i le Galu Faasee; e moomia foi le faaleleia o le auala i le mataaga i Aganoa, Faala, lea e i ai Galu Faasee, faapea foi fia-faaleleia o mol o le auala, aua le faafioaga o tagata tafafao maimoa mai fafo ma le aufaigaluega a le faletalimalo, faapea le mamalu o le atunuu lautele.

Lau Afioga a le Fofoga Fetalai, o lau mataupu mulimuli i le Minisita mo Galuega, se i toe silasila ane i le Uafu i Vaitoomuli. Mo le silafia, e tulaga ese le Uafu sa i ai, e l gata o le saogalemu o femalagaaiga, ae mafai foi ona silasila i ai mo le atinaeina, o faiga-faiva ma tagata tafafao maimoa mai fafo.

Matagaluega o Aoga, Taaloga ma Aganuu; lau Afioga i le Fofoga Fetalai, e leai se matua Samoa e l lagona le faanoanoa i faafitauli o lo o tulai mai i le fanau aoga, i Apia. Au o le mea moni, e leai se matua e l popole i sana fanau e aafia i ni faalavelave tutupu mai. Ae, mo tatou o Taata o si o tatou atunuu, tatou te lagona le faanoanoa, ona o ata vaia ma le faaluma-lumaina o si o tatou atunuu i le silasila mai a malo ma tagata mai fafo.

Lau Afioga i le Fofoga Fetalai, e matu lagolagoina e lou sui usufono le toe-faataatiaese o le Tulafono o lo o faas ai, le sasa o le fanau. Aua e leai se isi o tatou e le i mao ai se matua, ma sasa e faiaoga e oo lava i faifeau. Ae, o lenei lava tatou te ola maloloina ma malolosi. E tel le fetena o a tatou talitonuga ma poloaiga faakerisiano ma a tatou tulafono fou lea e faas ai ona toe sasa tamaiti.

I le Faataoto 13 - fuaiupu 24: O lo o faapea mai; O le, ua tuuna lana sasa, ua inoino lea i lona atalii, ae o le ua alofa ia te ia, ua saili le aoaiga mo ia. O le a le aoaiga lea e talanoa mai ai le Faataoto-?? O le AOAIGA - O LE SASA.

O totonu foi o aoga, ua aaitui tamaiti aoga, ma faatupulaia le l mafaufau i faiaoga, aua ua iloa lelei e faasa ona toe sasa i latou. Lau Afioga i le Minisita mo Aoga, lau Afioga i le Toetaufanua a le Malietoa, fai mai Moretekai ia Eseta; oPe na iloa e ai, e fai oe mo aso faapeneio. E ui e le o lau afioga o se Eseta, ae o le faataua o na faia lau Afioga (vaeatu ou paia apoapo gata) mo aso faapenei, se i silasila totoa ane, ia uma atu lenei Paeaiga, ae ua l toe tua nei faafitauli faalumaaluma Aiga, Nuu ma le Atunuu.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

O le fesoasoani a Palauli Sasae ó ia faataga ona toe sasa le fanau aoga. Aua e 90% o tatou tagata o lo o soifua i le olaga faa-Samoa moni i afioaga i tua ma Savaii, ae o lea, ua ola le toatele o le fanau i le talutalu-fou, o faiga mai fafo, e saoloto ai i mea e fafia i ai. O le isi fesoasoani a Palauli Sasae ó ia faamalosi loa le agai tamaiti uma o itumalo taitasi i Kolisi i o latou itumalo, e taofia ai le toe omai e aoaoga i Apia. E taugofie lea mo matua, i pasese, ae sili ai, o le nofo o le tamaititi i tafatafa o le tin ma le tam e aoa ma faatonu ai, i lo le tuufau e omai i Apia, ae le iloa mai, amioga ia e fai.

Lau Afioga i le Fofoga Fetalai, ou te iloa foi o le mafuaaga lea e naunau ai matua e aumai o latou alo e aooga i Apia, ona o le talitonuga e na o Apia o lo o i ai faiaoga lelei, aemaise ai lava i mataupu Faasaienisi. O si a matou tuualalo; pe l mafai ona toe faatuuina se televise mo aoga a le fanau. Ou te manatua ai i aso ia, sa fai atu ai polokalame i le leitio mo tamaiti e aoa faasolosolo ai i vasega, i lea aso ma lea aso. Sa faatautaia e le susuga Meki Stewart ma si tina ia Palagi Faasau ma nisi. Ou te iloa, vagana se toaitiiti o lenei Maota e le i sivasiva i pese sa usuina atu ai, ma faataitai i mataupu sa aoaoina atu ai. E faapen le manatu lea e talanoa atu ai, e faatulaga i le televise, le aoaoina o mataupu Faasaienisi lea e tau leai ni faiaoga, ona aoaoina atu ai lea, ae aooga mai le fanau i aoga maualuluga i afioaga i tua ma Savaii. O le vaifofo lea mo le utiuti o faiaoga Faasainesi ma o le fofo foi lea e taofiofia ai foi le fanau i aiga, nuu, ma afioaga. Ma o le a faaoga tatau ma atoa ai le National Broadband lea e i ai.

Lau Afioga i le Fofoga Fetalai, ona afe mai lea o se tala i manaoga tau aoaoga ma tadoga o lenei itumalo: (i) Faalauteleina o le Malae Taalo o le Kolisi Maualuga o Palauli ma Satupaitea ina ia tutusa ai ma malae taalo i Apia nei, aua le atinaeina o taleni taalo. (ii) Fausia o se Faletaalo Laititi (Mini Gym) ó mo taaloga netipolo, volipolo ma fusuga aua o le kolisi o Palauli ua tapuvae tasi i ai taaloga a kolisi o lea itu o Salafai. (iii) Toe tatalaina o le Aoga mo fanau e i ai Manaoga Faapitoa ó o le taimi nei ua leai se auunaga faapea i Salafai, ae moomia tele lenei atinae mo lenei itumalo. (iv) Matagaluega o Faamasinoga. (v) Lau Afioga i le Fofoga Fetalai, e faaleo atu se talosaga i le Minisita mo Faamasinoga ó ona ua maituina le autovaa mai o aiga i Faamasinoga e fofoga i Apia nei, ae sa masani na suesue lava mataupu tau faamasinoga a Savaii, i Savaii. O nisi o aiga e tau saili foi ni aiga i Apia e api ai, pe a fofoga sa latou mataupu, aemaise pe a soa, ma, e l taugofie.

FOFOGA FETALAI: Malo. Toe lima minute o le sui usufono.

Afioga TUIFAASISINA MISA LISATI LELEISIUAO PALEMENE:
Ae o le mataupu lava ua avea ma faafitauli, o le tolo soø o Faamasinoga, ae ua malaga mai tagata mai fafo. Pe le i ai lava se faiga e mafai ai ona faatulaga lelei Faamasinoga e tuuitiitia ai le tolopo soø, ona e taugata foi pasese e malaga mai ai aiga, mai atunuu i fafo.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

FOFOGA FETALAI: Po o maua mai e le sui usufono toe lima ou minute.

Afioga TUIFAASISINA MISA LISATI LELEISIUAO PALEMENE:

Mataupu Faapitoo: Lau Afioga i le Fofoga Fetalai, e i ai nai mataupu lautele ia ou te fia talanoa atu ai. O ni mataupu ou te iloa, e tatau ona silasila totoā i ai lenei Maota, ona o aafiaga ma le tausiga o le filemu, faapea le atinae o si o tatou atunuu.

Aia toatele vs Aia taitoatasi: O le mataupu leni, na ou maitauina mai le tatou Symposium sa fai ina ua maea faataut i tatou ma tatala leni Paeiga. Atonu foi, e manatua e le toatele o sui usufono sa auai, o se mataupu sa fetuunai ai, le Afioga i le Taitai o le Malo ma le afioga i le Faamasino Sili i lana folasaga sa fai. O le tulaga na ou maitauina, pe afai e tuuina atu se mataupu i luma o le Faamasinoga. E l mafai ona manumalo se faaiuga a Alii ma Faipule o afioaga ma alaafaga pe afai e feteenai ma se aiatatau a se tagata e toatasi, o lo o puipuia i le Faavae o Samoa. Ae o le tele o faaiuga a Alii ma Faipule, o lo o faia mo le lelei o le lautele o tagata o le afioaga. O se faaupuga lata mai o e sili le faataua a le Faavae i le aia toatasi o lo o le aia toatele. O se mataupu lava ua luatatauina ai loā mafaufau, ma tuufesili o pe leai lava se auala e maua ai se avanoa e mafai ai ona tutusa le silasila a le Faamasinoga i ai nei e 2. Ona fai lea o le faaiuga, fai fuafua i le t ua o mafuaaga o lo o faavae ai finauga. Ona o le taimi nei, e matu leai se avanoa e m lo ai se finagalo o Alii ma Faipule pe afai e oia ai se aiatatau a se tagata e toatasi. E tai pei foi le mataupu leni, o le faas ona sasa o le fanau.

O le 90% o tatou tagata o lo o soifua i lalo o le pule faamalumu a Alii ma Faipule, ae limataitaiina le soifua, i taiala mai fafo, e faamuamua ai le tagata e toatasi, ae lolo i ai le finagalo autasi o le toatele. Ou te manatu, o a tatou faiga faatemokarasi, o lo o faavae ai o tatou Faigamalo. E amanaia aia a le toaitiiti ae faatino le finagalo o le toatele. E pei foi o lenei Maota, e ui e le o aloaia se vaega e agaia le Malo, ae le aveesea ai le amanaia o aiatatau a sui tutoatasi, ma sui usufono uma o lenei Maota. Ae a oo ina fai faaiuga o le tulaga lava, e mafuli i ai le toatele, o le faaiuga foi lena.

Ia ae lafo atu, e saga faatupu manatu, mo le agai i luma, aemaise mo le tausiga o le filemu ma le nofo lelei i totonu o afioaga, au o le mea moni, e tuai atu Leoleo, ae o le tof ma le faautaga a Alii ma Faipule o lo o tausi vaatele, e toafimalie ma filemu ai se nuu, ma malu ai tagata uma o le faiganuu. E mafua ai ona lagolagoina e Palauli Sasae se teuteuga o le Faavae e silasila tutusa ai le faamasinoga i ai toatele ma ai taitoatasi, ia fai fuafua i mafuaaga o se finauga.

Faamautuina o Samoa o se atunuu Kerisiano; ua agiga le finagalo o le Taitai o le Malo i le mataupu leni; ma ua fagua ai foi peau o le matagi-toga i finagalo tete, ona o le aiatatau ma le saolotoga lava leni taitoatasi. Lau Afioga i le Fofoga Fetalai, e i ai le upu faasamoa-o E fua le kupa i le tai kupa, e saili le u i le tologa, ae fana le manu i le au-fue-taö. O lona uiga, e fua le gaioiga i mea e tulai mai i lea taimi i lea taimi.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

FOFOGA FETALAI: Malo. Faaiu mai le saunoaga a le sui usufono ua maea lou taimi.

Afioga TUIFAASISINA MISA LISATI LELEISIUAO PALEMENE:

. Fai mai le taitaiu tautaua o Farani, o Napoleone óõA uma ona fua le fili, ona fili lea o le au, ma fua le malae.õ O le mea moni, e leai se mea e tupu fua, e faaosofia mafauauga, i mea e tulai mai.

Lau Afioga i le Fofoga Fetalai, ou te talitonu, o i tonu lea e faamanatu mai ai Peteru ó e faapea õia outou mataala, ona o l , ua fai outou mona fili, o le tiapolo lea, o lo o fealualuaõ o ia, pei se Leona tagi, ua saili se tasi e aina e ia; ia outou teteõ atu ia te ia ina ua outou iloa o lo o oono lo outou au uso i le lalolagi, i ia lava mea tiga.õ (*1 Peteru mataupu 5-fuaiupu e 8*).

Susuga Hon Laauli Polataivao Leuatea (Minisita mo Faatoaga ma Faigafaiva): Lau Afioga i le Fofoga Fetalai...

FOFOGA FETALAI: Malie le sui usufono mo Palauli Sasae, se i tulai mai le Minisita mo Faatoaga ma Faigafaiva.

Susuga Hon Laauli Polataivao Leuatea: E leai se agaga e faalavelave i le saunoaga a le sui usufono mamalu, se ua alu lota gaualofa i le saunoaga a le sui usufono, o lea foi ua saunoa o lana lauga lava lea e fai ai lona molimau e lau Afioga. Ua ou tulai atu ai e faatu le lafo, *Ina ia faaopopo ni minute mo le sui usufono e faauma ai lana saunoaga.*

O le lafo lea ma le faaaloalo.

FOFOGA FETALAI: O le agaga lava o le Nofoa ina ia tulei le tatou galuega, ae afai o le finagalo lea, o lea ua faatu mai le lafo e ala lava i le lafo faatu, ua faaluaina.

E le i tuuina atu le maliega autasi a le Maota i le lafo.

FOFOGA FETALAI: Malie le sui usufono faaiu maia lau lauga o lea tatou te le i see atu i le auiliiliga o le tatou Tulafono e maua ai foi le isi afa itula i ina e lua avanoa mo le tai 15 minute. A o le manatu i le tatou galuega, e faapena, ona o le saunoaga faataupou. Ae ui i lea, e leai se isi i luga o le Tulafono, ae faapena se lagona.

Ae malie le sui usufono e ese le manaia o le lauga, malo tapena, malo sauni, ae ona o le manatu i le tatou galuega e faapena, ae malie ia si ou uso, tuu nisi mea o totoe mo avanoa ia e lua tai 15 minute ae faaiu maia le saunoaga.

Ma lou faaaloalo, faafetai.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

Afioga TUIFAASISINA MISA LISATI LELEISIUAO PALEMENE:

Faafetai lava i lau Afioga i le Fofoga Fetalai. Ou te talitonu lava e tasi lava le taimi e taupou ai le taupou, ae o le a ou usitaia lava, e afaina loa ona le toe taupou lea. O lea ua maea atu ni nai mataupu e fai i ai le faasoia a lau Afioga i le Taitai o le Malo faapea le paia o le Kapeneta, ma le Faigamalo.

Ia, lau Afioga i le Fofoga Fetalai, maua lau tof faale-Atua au le faafoeina o le Maota o Samoa. Alofagia foi le Taitai o le Malo ma le Kapeneta ma le Faigamalo, maua la outou tofa poto mai le Atua aua le faafoeina o lo tatou Malo.

Ia lena foi itu o le malu, i Taitaifono ma Sui Taitaifono ma sui usufono mamalu o Komiti Faapalemene, maua foi la outou tof , aemaise o le malosi moomia aua galuega ua tofia ai. Ia faapea foi i Faauluuluga o Matagaluega ma Faalapotopotoga a le Malo ua tatou mafuta.

Ia faamanuia le Atua i lenei Maota faapea le tapuaiga a Samoa, mai ona ao se i oo i le fu-aga lalovaoa. Faamanuia foi i le galuega tapuai ma faanonomanu a le Aufaigaluega tofofi a le Atua.

Le tapuaiga a si ou itumalo pele o Palauli Sasae, aua Faasisina ma S - Lilomaiaava, ma le levaleva ia Sa-Faleletaua ma Palauli na potopoto, ma Oe le Pule. Faafetai tapuai, faafetai tatalo. Faamanuia tele le Atua i lo tatou itumalo. Foi mai sa matou tala, alofagia e le Atua le nofo tuavae o le Failautusi ma le aufaigaluega a le Palemene.

O le matou tala lea ma le ava, soifua ma ia manuia.

Na faaalua le agaga fiafia o sui usufono o le Maota i le patipati o latou aao i le maea ai o le Saunoaga Faa-Taupou a le sui usufono mo Palauli Sasae.

FOFOGA FETALAI: Malo faafetai i le saunoaga matagofie a le sui usufono, e pei lava ona matou talanoa atu, e leai se agaga e faauilavea i le finagalo o le sui usufono, ua malie taliga e faalogologo. Ua logo faa-Tutuila foi le tapenaga, malo le sauni, e le tau laeia pe tau sulaina le toga lelei, e faapena ona saunoa a o faafofoga mai le itumalo aemaise foi le tapuaiga a Samoa. O le mea la lea, e faamalie atu ona o le naunautaiga, ina ia tulei le tatou galuega.

Ua avanoa foi le tatou Maota nei mo se isi sui usufono e saunoa. Ia, tulai mai le sui usufono mo Faleata Sasae, le Afioga i le Minisita Lagolago mo le Soifua Maloloina, o lana uluai Paeaiga foi lea i totonu o le Palemene. Saunoa ia ia manuia le saunoaga.

LAUGA FAA-TAUPOU

Afioga SALAUSA JOHN AH CHING (Faleata Sasae): E tulai atu i le agaga faaaloalo tele ma le migao e tatau ai, ona o le avanoa ua tuuina mai e lau Afioga i le Fofoga Fetalai. E muamua ona ou faatulou i le tatou Tapaau Sili o i le Lagi o le faavae papa lea o le Malo o Samoa.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

E faatulou i suli vaaia o le Atua ma le Aiga Sa Levi, susuga i Taitai o Ekalesia e fia i Samoa, ma le paia o le aufaigaluega o lo o aumau ma faafalel malu i nuu ma alaalafaga e oo atu lava i tuluiga uma o Samoa. O la outou faan n manu, ua liligi mai ai le alofa mutimutivale o le Atua mo Samoa ma lona Malo.

E faatulou atu i le tapuaiga mau a Lana Afioga Mamalu O Le Ao o le Malo o Samoa, lau Afioga Tui Atua Tupua Tamasese Efi ma le Masiofo. Le lagolagosua a outou Afioga i Sui o le Fono a Sui Tofia ma o outou faletua. E faatulou atu i le tafatolu o le itufono faafetauagai o faigamalo, i le afio o lau Afioga i le Faamasino Sili ma le vasega o alii ma tamaitai Faamasino, ma le Ofisa o Faamasinoga. Lau Afioga i le Palemia ma Minisita o le Kapeneta faapea Afioga i Minisita Lagolago ma le Ofisa o le Palemia. Lau Afioga i le Fofoga Fetalai o le Maota o le Fono Aoaofaitulafono o le Malo Tutoatasi o Samoa, e afifio ma alaalatai ai sui usufono o itumalo taitasi, o lupe na f a mai le fuifui, mo le tapenaina o le Maota o Samoa. O le Maota e utu ai tagi o le atunuu i mafatiaga o le olaga ma le soifuuga faapea foi le Afioga i le Failautusi ma le Ofisa o le Fono Aoaofaitulafono.

E faatulou atu i le faafofoga tapuai mai a si o tatou atunuu pele o Samoa aoao. O paia lava e faasino i le usuga a Tumua ma Pule Ituaia ma Alataua Aiga i le Tai ma le Vaa o Fonoti, Aiga ma latou Tama, o Tama foi ma o latou Aiga. Ae tainane foi le faafofoga tapuai mai o tatou uso i le motu i Gaga i Amerika Samoa, le tafatolu o le faigamalo le paia o le falesefulu faapea oe le Motu le Manuatele. Tulou, tulou, tulouna lava. Lau Afioga i le Fofoga Fetalai, faafetai tele mo le avanoa ua tuuina mai.

Ae le i faaalua se manatu i le Tala Faatatau o le Tupe ua folasia nei i le Maota, avea ia leni avanoa e avatu ai se manatu a o se folasaga o le agaga ma le mafafau i si ou itumalo pele o Faleata Sasae, si ou nuu i Lepea e afio ai Faumuina o le Tupufia, Usoalii ma Tamapaa, afio Leota Matagiolevao, alaalatai oulua le nofoasa lau Afioga Vaitagutu ma Aia, le mamalu ia te oe le falelima ma le falevalu o tagatanoa, ma le lua vaifale, alaalatai Tauaitu ma le saofaiga a Atua.

Si ou nuu i Vaimoso e susu ai Mataia le tama a le Fale, afio le Usoalii ma le Matua ia Patauave, alaalatai oulua Igoamatua Tomaagauaune ma Manuleleua ma oulua aiga o Aogamalie ma le Faleagafulu. Susu Nofotama ma Matua o Toala ma Tiufea ma le Malae.

E faapea foi si ou nuu o Vailoa e susu ai Siliga ma Umusa i le Siliga, alaalatai lau tofa Nuu ma Leatinuu ma upu ia te oe le Faig . O paia na o si o tatou itumalo, nuunuu atu laia i tootoo o le itumalo o e o lo o latou tausia ma puipei mamalu ia.

Si ou itumalo pele, ua iu le ta faiga palota, o lau faaaloalo maualuga ua lafo mai i lou nei tagata faatauavaa, e fai ma ou siufofoga e molimolia sou finagalo a o sou manatu i upufai o lo ta Malo. Ua lafoai faaiuga o le faiga palota, ae o lau sui usufono o le sui usufono mo tagata uma o lo ta itumalo.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

E ao ai ona faaogaina lou malosi o i ai, e finafinau ai i mea lelei, e le gata mo lo ta itumalo a o se ta sao mo le lelei agai i luma o Samoa atoa ma ona tagata.

E le faagaloina foi le tapuaiga i susuga i faafeagaiga i fatafaitaulaga e fia i totonu o si o tatou itumalo. E le faagaloina le tapuaiga i susuga i faafeagaiga i soo se fatafaitaulaga o itumalo, o Tapaau ma faleupolu, faletua ma tausii. saoa ma le malosi o le itumalo. E le mafai foi ona faagaloina tina ma tama matutua ma i latou foi ua faataotolia i fale, ona o maʻi tug o le tino. E avatu le faafetai faapitoa i si ou nuu i Lepea lo tatou aiga Sa Faumuin , ona o lo outou sailimalo, ua outou finagalo ai e aveia lenei tagata faatauvaa, e fai ma ou sui tauva i le faiga palota na se i mavae atu nei. Faafetai i lau Afioga i le sui o le nuu, lau tofa Vaitagutu, faafetai i le Usoalii ma Tamapaa, faafetai i le Tauaitu ma le Saofaiga a Atua. Faafetai i faletua ma tausii, faafetai i lau Afioga le Telesa ma lou aualuma, faafetai i lau Afioga Tuimavave ma lou aumaga.

E toe faapitoa lava le faafetai tele i le matou komiti o le palota, nai ou aiga uma o uso ma tuafafine, uo ma e masani, ona o le tele o le lagolago sa outou tuuina mai i auala eseese, e tatalo lava i le Atua ia faatutumu avanoa uma o mea sa faagaogaina, ona o lo outou alofa moni. Ou te taumafai e fai sou aoga mo lo tatou nuu ma le itumalo.

Faafetai tele foi i si au manamea o si ou toalua o La Tanuvasa Salausa Ah Ching, ma si au fanau i lo outou onosai i nei mea, o le galuega ma le lagolago e le faigofie.

Lau Afioga i le Fofoga Fetalai, o le a see atu loa se manatu i le Tala Faatatau o le Tupe, e pei ona folasia mai i le Maota. E avatu le faamalo ma le faafetai i le Minisita o Tupe ma le Malo, i le tapenaga o lenei tala ma faamatalaga, faamalo i le silasila alualu amao ma le tofa ua matua loloto tele i le fauina ma le faataatiaga, o le Tala Faatatau o le Tupe 2016/2017. Faafetai atu i le Malo na se i mavae atu nei, ona o le faafoefoeina mai o le sa o Samoa, ana faaletonu le tuanai atu lea, e matua faaletonu le tamaoiga o le atunuu o le a i ai i le taimi nei. Ae o lea ua faamaonia mai le faatupulaia o le tamaoiga o le atunuu i le 1.7% i tausaga e tolu na se i mavae atu nei, aemaise le aafiaga o le atunuu i le afa o Eveni. Se i silasila la i le manaia? O le a se isi manatu ia i tatou uma? E le taumate tatou te mananao uma ia aveave ai loa lenei lelei, ma tatou taumafai uma ina ia siitia le tamaoiga o le atunuu i tausaga uma. E ese foi la le manaia o taiala ua faataatitia mai e lau Afioga i le Minisita o Tupe e faatonutonu ai lo tatou sa mo lenei tausaga o i luma nei. Afai e ogatasi taiala ia ma le gaoioi faatino a tatou uma, faapea le gaoioi faatino o le afaigaluega uma a le Malo, e leai se mea o le a ponatia ai le agai i luga o le tamaoiga o le atunuu.

O le Lipoti na folasia e le Minisita o Tupe i le aso 31 Me 2016, ua taatia mai ai le ata o le tamaoiga o Samoa i lona aoaotetele i le taimi nei. E foliga mai o lo o saogalemu lo tatou tamaoiga ma atinae mo le taimi nei.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoga i luga o le faitauga faalua**

Ae peitai ane, o le tatou tamaoaiga ma lona tulaga, e taatia ai mai lea taimi i lea taimi, e aafia tele fesuiaiga o le tamaoaiga o le lalolagi. O le lipoti mai le Faalapotopotoga o Tupe a le Lalolagi le IMF, o le a faaitiitia le malosi o le tamaoaiga o le lalolagi i le tausaga 2016/2017. O le mea lea e ao ai ona tatou tapena nei, e puipui i tatou mai lona aafiaga tele i fesuiaiga o tupe a le lalolagi, ia tupu ae a ua tatou sauni i ai.

E momoli atu ai la le faafetai i lau Afioga i le Minisita o Tupe ma le Malo, o lea ua faataoto mai fuafuaga e tapena ai lo tatou tamaoaiga, ina ia tupu le malosi. O le tilotilo la a lou sui usufono i tapenaga aoatetele ia, ua talafeagai le lelei mo lenei vaitaimi, e fuafua le lelei o mea faatino, i tupe maua, faaitiitia tupe alu le talafeagai, uunai le atinae o pisinisi tumaoti, siitia le lelei ma faatinoga o auunaga a Matagaluega a le Malo. O le mea lea, lau Afioga i le Fofoga Fetalai, ua lagolagoina ai e le sui usufono o Faleata Sasae le Tala Faatatau o le Tupe ua faataatia mai 2016/2017. O le a la se isi sitepu e sosoo ai? Ua tatau ona i faatasi e faatino loa ia fuafuaga ua uma ona faataatitia. Ma o le motto lea e tatau ona tatou alalaga ai i le vaitaimi lenei, o le faatino, faatino ma faatino. Manaia tele le gaga lea na ae i le taimi o le faiga palota i faasalalaua a le Ofisa o faiga palota, e faapea mai, Resitala ma palota, resitala ma palota, resitala ma palota. Ou te manatu o le agaga foi lea e tatau ona tatou mulimuli ai nei, fuafua ma faatino, fuafua ma faatino. Ma o le alaga lea ua tatau ona lagona i totonu o Matagaluega uma o Faalapotopotoga a le Malo, tele ma tele fuafuaga lelei ma matagofie ua uma ona faataatitia i totonu o Corporate Plans ma Strategic Plans, ae o na lelei faatoa manuia le tagata soifua pe a faataunuaina ma faatino. O le tele o taimi ua ova le fuafua, ma fuafua ai lava ae faatino ane ua toetiiti uma le tausaga faaletupe. O le tele foi o nisi o a tatou polokalame ua leva ona uma ona faapepa ma faatusi, ona faataatitia atu loa lea i si toaina e igoa ia taatiamai, se i malie lava lona loto ona fai lea. E le aoaia e Laupua Tamafaiga lau Afioga i le Fofoga Fetalai, ae ona o le tulaga ua faataatitia ai nei a tatou Government Sectors, e tele foi stakeholders i totonu o Sectors taitasi.

O le mea lea e taua ai tele le faatoaga ona faaauau fonotaga faatulagaina masani a stakeholders i totonu o Sectors taitasi, e soalaupule ai ma faatino mea uma ua uma ona fuafuaina, ina ia o gatasi mea uma i le tulaga faa-coordination ma le collaboration ma toe fuafua nisi mea lelei mo le lumanai. E pei lava ona silafia, o le tolo o mea e mafai ona fai nei, o le taugata foi lena o lona toe faatinoina i le lumanai. So o se taimi lava e faatino ai se fuafuaga, o le a siitia foi lena auunaga quality of service improves. O le mea mo i tatou uma lava e faatinoina le public service e aofia ai foi ma sui usufono uma, e tatau ona tatou faamalolosi, e le faigofie le tatou galuega ma e leai foi nisi tatou te faamoemoe i ai e omai e fai, o i tatou lava tatou te faamoemoe i ai. O le taimi lava lenei o le tauamataina o lenei Paeaiga, e laititi nai mataupu e fia talanoa i ai, aua le tamaoaiga ina ia siitia lona lelei i tausaga taitasi.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafolaiga i luga o le faitauga faalua**

E tele lava nisi atinae a le Malo, ae o atinae nei e faamoemoe i ai le lotoifale o le atunuu ma lona tamaoiga i le aiga i luma o le atinae o faatoaga ma le atinae o tagata tafafao maimoa mai. E leai o lena e i ina le silafia ma le potou masani i lau Afioga i le Minisita ma Afioga i Pule Sili o Matagaluega. E matou te tuu atu le faamalosiua ma le faamanuiaga ina ia agai pea i luma a tatou atinae e le faigofie, ia tumau le faatuatua tatou te fuafua faatasi ma faatino faatasi ma le Atua.

O le atinae o faatoaga, lau Afioga i le Fofoga Fetalai, ua ou iloa e tele fuafuaga a le Minisita o Faatoaga ma Faigafaiva ua faataatitia nei mo le atinae o faatoaga, ae ua na o ni nai motugaafa e tuutuu atu i ou tafatafa, faaoga lelei, a leai faamolemole toe faafoi mai. Ou te iloa ua uma ona asia muamua le fuafuaga lenei ma ua taʻu mai le tali, e matua faigata lava ona faatino. Ua tiga la ona ou iloa e faigata, ae ua i ai le mafuaaga ua ala ai ona ou toe laga lenei mataupu, afai e i ai se avanoa pumoomoo lava e mafai ai ona faatino, o lona uiga e i ai sina avanoa e mafai ai ona toe asia le mataupu ma faatalanoa. O le mafuaaga lenei, sa ou talanoa i se tasi o tam mai le faasiusiuga i sisifo o le motu lenei o Upolu, fai mai lana tala ia te au, ua tele le mativa, ona ou fesili atu lea i ai. E faapefea lo outou eleele ma le gataifale? Ae fai mai lana tala, matou te le matitiva i taumafa, tele a matou faatoaga lelei foi lo matou gataifale i iā.ø A o le faafitauli ou te sau ma au tautalo e faatau i le aualatele, o la foi e sau le isi toeaia o le matou nuu ma ana foi tautalo e faatau i le aualatele. Ona ma taufai faatau ai lava lea faapena, se i vagana ua i ai se isi tagata ese e ui atu ma faatau a matou tau talo, ae a leai e iu lava ina ou toe alu e ave lau tau talo e faatau mai ai le tau talo a si toeaia o lo o i le isi itu o le auala. E faapena foi le tala i tauia, o le mea o lo o manaomia o sina tino o le tupe, e faatau ai isi mea e manaomia o le aiga. E faatau ai le suka o le masina o le fasimoli, o le tooth paste ma le tooth brush, e totogi ai le pili o le aoga, faatau ai le cash power saogatupe a le Ekalesia ma le nuu, aua e le mafai ona ave le tautalo i saogamea a le Ekalesia. E manaomia se tino o le tupe mo le faamati ma mea faapena.

O le manatu autu la, ana faapea e i ai se faleoloa a le Malo pe o se isi lava faalapotopotoga e mafai ona omai i ai le aufaifaatoaga e aumai ai a latou fua o faatoaga, tuu atu i ai ae tuu mai le tupe, ona faasaga loa lea o le faalapotopotoga e faatau atu fua ia o faatoaga, i totonu o le atunuu ma auina sao atu i maketi i fafo. Ou te manatu sa oo talanoaga muamua i se mea e tau o le export authority ae sa matauina i lena taimi le faigata ma le lavelave o lona faatinoga. E tele mea fou i lenei vaitaimi, alu foi i luma le silafia ma le atamamai o le aufaigaluega a le Malo. Pe le ua suia ai faigata ia sa i ai muamua i se isi auala talafeagai e mafai ai ona faatino se mea faapenei, o se auala foi faapenei e matua faaosofia ai le loto naunau o le au faifaatoaga ma le au faifaiva e galulue, ma o le a fesoasoani malosi i le siitia o le tatou tupe faaleoleo i fafo po o le foreign reserve.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

O le soifua maloloina e muamua ona avatu le faamalo ma le faafetai i le Minisita mo le Soifua Maloloina, faamalulu atu lau Afioga i le Fofoga Fetalai, ae ou te le i oo atu i le tulaga lea, sei toe faauma atu le isi faaopoopoga lea o le tuualalo i le Minisita mo Faatoaga ma Faigafaiva.

FOFOGA FETALAI: Toe lima minute o le sui usufono.

Afioga SALAUSA JOHN AH CHING: O le isi tulaga lea ua i ai a tatou **mobile abbatoirs**, e fasi ai a tatou povi i lona tulaga saogalemu ma le soifua maloloina. O le isi a tatou maketi sa i ai muamua ao ta fasi a tatou manu i le laolao, o le tatou motu i Tutuila. Ou te manatu sa tofia le avatu ina o povi i Tutuila ona o Tulafono a le Feterale ma le tulaga sa ta fasi ai a tatou manu, ae o lea ua saogalemu le fasiina o a tatou manu i mobile abbatoirs. O lea ua alagataata ai, le toe lagalagaina o le tatou maketi lea i Tutuila e manaia e lata mai, toe lelei le faafesuaiga o le tupe Amerika ma siisii ai lava i luga le tatou foreign reserve. E faaputupu lava nai mea laiti na ma alualu malie ai lava i luga le foreign reseve, aua tatou te naunau tele i mea tetele, ae o nai mea laiti lava e faaputupu e maua ai le mea tele. O le atinae o le soifua maloloina, e muamua ona momoli atu le faafetai i lau Afioga i le Minisita o Soifua Maloloina, le palemia ma le Kapeneta i le tofiaina o au, e ave ma Minisita Lagolago mo le Matagaluega. E tele faatulagana fou o lo o taumafai i ai le atinae o le soifua maloloina ma a faatino mai ia fuafuaga uma, o le a siitia le lelei o le auaunaga aemaise ai le toe siitia ai o le auaunaga i falemai faaitumalo, ma le fesoasoani muamua e mafai ona maua e o tatou tagata i totonu o aiga ma nuu, i polokalame faa fesoasoani muamua po o le primary health care. O lona autu, ia faalatalata le auaunaga i le mea e nonofo ai tagata. Faafetai i lau Afioga i le Minisita ma le Ofisa uma o le Soifua Maloloina i le fuafuaina ma le faataatiaga o tulaga, pau lava le mea o lo o totoe nei o le faataunuaina loa o nei fuafuaga uma. O se tasi o toatug tele o lo o i ai nei le auaunaga a le Soifua Maloloina, o le l lava lea o le afaigaluega tomali faapitoa aemaise lava fomai ma nurses. O le faigata lena o atinae faapenei, o le manaomia o tagata aoaoina faapitoa ma o ia foi aoga, e tau i le fitu tausaga faatoa maua se fomai.

FOFOGA FETALAI: Faauma mai le saunoaga a le sui usufono ua maea lou taimi.

Afioga SALAUSA JOHN AH CHING: Faafetai. O le a faataatia le ofisa o soifua maloloina. E fia faaleoina la seí .e. faauma atu ai lau tautalaga. E momoli atu ai le faafetai, sa ou fia oo foi i le turisi ae e le afaina atonu e maua se isi aso. E fia faaleoina le agaga faafetai i nisi o Minisita na oo atu i ai nai talosaga, Minisita mo Galuegaf

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoga i luga o le faitauga faalua**

FOFOGA FETALAI: Malie le sui usufono, ai o se faauilavea. Tulai mai le sui usufono mo Falealupo.

Afioga Aeau Peniamina Leavaiseeta: E leaif .

FOFOGA FETALAI: Faafetai, o lea na tulai mai le sui usufono e fia saunoa ae ua tuai ona uma le taimi o le sui usufono. Faauma mai pea la le saunoaga a le sui usufono mamalu.

Afioga Aeau Peniamina Leavaiseeta: Ua maua le avanoa ona o le susuga i le fomai nei e lef .

FOFOGA FETALAI: Malie le sui usufono e le faalavelavea lau saunoaga i le sui usufono o lo o saunoa vagana ai le Fofoga Fetalai. O le mafuaaga foi lea o le soso atu o le Fofoga Fetalai, ma e talu ai o lau Afioga o le Minisita Lagolago o le Soifua Maloloina, manatu o le tasi lea o itu o lea sa ou televave atu ai. Ae ui i lea faaii maia le saunoaga, lau Afioga i le Minisita Lagolago o le Soifua Maloloina. Leaga o lea ua e toe saunoa i le tou Matagaluega ae o oe o le Minisita Lagolago o le Soifua Maloloina. Ae ua maea lou taimi, o le ala lea ua tau fiti fiti ai finagalo e faafesili atu. Ae ua ou talosaga atu e faaii maia le saunoaga ua maea lou taimi.

Afioga SALAUSA JOHN AH CHING: Faafetai i lau Afioga i le Fofoga Fetalai o le a faauma atu ia. Tuu ese pepa ia e lima sei oo i se isi aso. Faauma atu ia le faamatalaga, e momoli atu le faafetai ma le faamalo i lau Afioga i le Fofoga Fetalai, faapea foi le tapuaiga mau i le Palemene. Tau ia ina ia alofa mai le Atua i lou malosi aua le faafoeina o le Maota o Samoa. Alofa mai le Atua i le Afioga i le Palemia Sui Palemia ma le Kapeneta, i tiute fita o feagai ma outou i aso uma. Ia alofagia foi e le Atua le Palemene o Samoa, ia maua se ai mo lenei Nofoaiga mo le lumanai. Soifua.

Na faaalua le agaga fiafia o sui usufono o le Maota i le patipati o latou aao i le maea ai o le Saunoaga Faa-Taupou a le sui usufono mo Faleata Sasae.

FOFOGA FETALAI: Malo faafetai tapena i le saunoaga a le sui usufono. Ae ona o le taimi e faapena lava, e 30 lava minute o le saunoaga a le sui usufono. O le taupou ia, o le mea e fai i le tatou vafealoaloai, ae o le faataotoga o tatou galuega, o le Tulafono o le mea e faamuamua. O le mea lea lea, ia o se isi sui usufono e tulai mai e saunoa. Masalo toe lua ni sui usufono ona uma lea o le tatou taimi. O taimi faapenei sa tuli e le aumatutua i aso ia e lua taimi e saunoa ai, o le taimi e faaii ai ma le taimi e toe tauaofia mai ai le Fono taeao, e maua avanoa e lua, e seasea ona maua. Ia, masalo pe tau tulai mai ea le sui usufono mo Salega Sasae.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

Tofa Olo Fiti Afoa Vaai (Salega Sasae): Lau Afioga, o lea lava e tapuai le Komiti o Tupe se i maea lelei sui usufono ona avatu lea o se vaivaiga o Salega Sasae.

FOFOGA FETALAI: Malo faafetai lava. Ia se i saunoa mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Aiono Neioti Galumalemana Dr. Sailele Malielegaoui: Lau Afioga i le Fofoga Fetalai, o lea e taumafai le tatou galuega ina ia faavavevave ona o lo o faatali mai le atunuu i le pasia o seleni nei ma faagasolo loa tatou galuega. E pei e manaia le mea lea o le tofi mai loa e lau Afioga, o lea foi la ua uma ona e tofia Salega, afai e le lauga Salega, ua uma foi ma lona taimi.

FOFOGA FETALAI: Masalo o lea ua faamanatu mai e le Palemia a tatou Tulafono Tumau, e leai se mea e noatia ai le Fofoga Fetalai i le faia o lana faaiuga i le see atu lea o le tatou galuega e talifuaiteu le Malo ua lava ia saunoaga a sui usufono mamalu, ia, po o le tofi atu foi e le Fofoga Fetalai po o le Nofoa o sui usufono e tulai mai e saunoa. O le mea la lea, e lelei lava ona toe tuu atu le avanoa ne i o matou sui se isi faavae a o le tulaga lena o tatou Tulafono Tumau. Ma ia manatua foi e lea Itu o le Palemene, e pei o Minisita Lagolago la e i le isi Itu, e lavea uma lava, pe saunoa pe le saunoa o la e lavea uma lava i le itu a le Malo le Executive, ioe, le Pule Faatonu. A maea ona outou saunoa, ua faigofie le galuega ua lafo loa i le Malo. Toe o le sui usufono mo Falealili Sasae la e pei e tulai mai pe a. Ia tulai maia le sui usufono mo Falealili Sasae e saunoa.

LAUGA FAA-TAUPOU

Afioga FUIMAONO TEO SAMUELU TEO (Falealili Sasae): O le usitai lava o le mea sili lea lau Afioga i le Fofoga Fetalai. Sa ou manatu o se faifeau sa outou tofia o le a i ai sona taimi faapitoa i le aso a taeao, ui i lea, faafetai mo le avanoa. O lea foi na tuumumusu mai ou uso nei, ae sa ou manatu e tau faaumiumi sina taimi ta te taupou ai, aua a uma loa le aso ua le aoga foi, ae faafetai mo le avanoa.

Masalo o lea ua faafofoga le Maota i felafolafoaiga aemaise o lauga faataupou a sui usufono mamalu. Sa usiusi lava faavaa o savili le faalogologo ma le maitau, o le ala foi lea o le tuai ma musu se lagona e faaleo atu i lenei itula, peitai, e lagona lava le agaga o le usiusitai i lau Afioga o lo o faatautaia lenei Maota.

Ou te manatu o lea ua faafua pupue galu feai o le vasa ma peau faailo mala o le matasaua na to ai manu o Malo, ma ua gase atu le au i Fagalele na tauilo ai manu o Malo.

22 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

Ou te taofi, e le seetuagalu le gogo a Sa Fenunivao pe fou le lauamanu, ae ou te talitalimanu i le faamuli o atu. E le tau sailia foi se faga ou te malu ai aua e le o au o se lupe na see mai i le tiotio o faiva o le gataifale po o le tuavao, leai, o au lava o le tama a tu tula ma tu tula na ou see mai i le tiotio o faiva a manaia. E!, se ua viligia le vaiti gase o le u a le tama Falealili o Manusamoa, o le ala lea o lou saafi, aua ua pepese ai Samoa e faamanatu le manumalo aiai o le tama Falealili o Manusamoa. E ui lava ina tau faaletonu le taumafaiga o lo o i ai nei a le tatou Manu, ae talitonu ua ao Samoa ma ua lauiloa ona o lau Manu Samoa. E nenee ma mimita ai so o se Atua ma Samoa atoa. Talofa Samoa, o lea ua tafatu seuga o lo outou sa i auvai, ma ua malu le fau o outou faiva manaia, ua logo foi le pualilo o lo outou uta fanua ma ua mu totototo lou suniula, ua talatala foi le ilaoa o lau pelu tala mama, ua e folau i lou vaapipi ma ua e aloalo i lou foe leifi, aisea? Aua ua see lo ta vaa i tuluiga e fia o le kelope ma ua amanaia lo ta leo i upufai o faigamalo tetele o le lalolagi. Lou itumalo pele Falealili Sasae, ou te le apoina ou paia i iu aua e pele ma mamae oe ia te au, e amuli ona tala faalauvae le upega o tupu, o ou sa, o ou paia, o ou faiga ma ou ao tu tafaitoa, a o usi faavaa savili le faafofoga a Samoa. Ou te tulivae ma ou toele ma le agaga loto maualalo, o le fisaga o matagi e toto ai le sau ma momoli mai ai le malu ma apoina ai le susu i ou laugutu o se faamanatu o le faaaloalo ma le migao e laualuga i le vatapuia le sootuli ma le avafatafata.

Ou te faatulou atu i le tapuaiga malu i le afio o Lana Afioga Mamalu O Le Ao o le Malo, lau Afioga Tui Atua Tupua Tamasese Efi, o le Tama na saesae laufai ai Tumua, o le Tama a le Aiga Sa Fenunivao ma lau Masiofo. E faatulou atu i le tapuaiga mamalu a Sui o le Fono a Sui Tofia, afio lau Afioga i le Tamaaiga Tauaana, lau Afioga i le Tuiaana Tuimalealiifano Eti Vaaletoa Sualauvi II ma lau Masiofo, afio lau Afioga i le alo o Tuiaana Sagate, lau Afioga Hon Le Mamea Ropati Mualia ma lau Masiofo. Afio lau Afioga i le Manu o le Tuasivi e fagota i tai e lua lau Afioga Hon Tuiloma Lameko ma lau Masiofo.

Ou te faatulou atu i le afio o lau Afioga i le Palemia, Tuilaepa Fatialofa Auelua Lupesoliai Aiono Neioti, Galumalemana Dr. Sailele Malielegaoi. Afio lau Afioga i le Tamaitai Sui Palemia lau Afioga Fiamē Naomi Mataafa. Afio alii ma tamaitai Minisita o le Kapeneta, afio i Minisita Lagolago ma le paia maualuga o sui usufono uma, o sui usufono mamalu o le Paeaiga Lona XVI o le Palemene o le Maota o Samoa.

E faatulou atu i lau Afioga i le Faamasino Sili ma le vasega o Faamasino o le Faamasinoga a Samoa. E faatulou atu i le susu o susuga i faafeagaiga taulagi i so o se fatafaitaulaga i Samoa, le paia maualuga i le Afaigaluega tofofi a le Atua o lo o faafaletuluia ma faafalelemalu i nuu ma afioaga aua se manuia o Samoa mo a taeao.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

Sesema ni manu ma talosia le mana o le Atua soifua mo tagatanuu uma o Samoa, aemaise o ana tama fanau o lo o i ai i le tafa o taua i le puipuiga o le saogalemu o le lalolagi, aemaise ole taase e fai ma vaa ma ipu i atunuu ese, a o alo ma fanau o lo o taase i le sailiga o le poto salalau aua ni taitai o Samoa mo a taeao.

E faatulou atu i Faauluuluga o Matagaluega eseese a le Malo, Faauluuluga o kamupani, pisinisi ma Faalapotopotoga Tumaoti i totonu o Samoa, o paia mamana na o Samoa i ona faafua e fa, o ona galu e iva ma ona peau e 13 aua Aiga ma latou Tama, Tama foi ma o latou Aiga, Aiga o Tupu, Aiga o Nofo, Aiga o Papa, Aiga na Tafai, Tumua ma Pule, Ituau ma Alataua, Aiga i le Tai ma le Vaa o Fonoti. E le faagaloina foi le paia mauuluga o tatou uso i le motu i Sasae, aua le nofo a Maopu ia Sua ma le Vaifanua, Ituau ma Alataua, Fofu ma Aitulagi, Saole ma Saleaamua ma le Launiu na Saelua, a o mamalu aua le Laau na Amotasi, Faatui o le Motu ma Tootoo o le Faleula ma Tama a le Manuatele. O ou paia mamana na Samoa nuunuu atu faatini o tausala.

E faatulou atu i lou itumalo peleina Falealili Sasae, ma avatu malu i puega pe afai e sala se leo o la outou auauna i le faaleoina o ou paia, e le o ia te au se atoa, aisea? O sau upu ea e toe suia ai ou paia? E leai. O sau e toe faaopoopo ai ou mamalu? E leai. O le tatalo, afai e galo ia te au se iota o ou paia ma ou mamalu, ia malie afenoa, o le leo o le auauna ua na o se taua o fafo o le manu e le fofoa, aisea? Aua e i ai le taimi e soa ai e le tagata le iā, e soa foi e le iā le tagata. E ui ua vaeluaina le tatou itumalo, ae le mafai ona toesea paia ma mamalu aua Alaalagafa ma lo lua nofo a Tulafale ma le Tauagaeseese ia Falealili. Ae tumau pea le mafanafana o le nonofo ai o Falealili i so o se itu ma so o se mea, e suafetuitui ma mili alafau i so o se taimi.

I lou ava ma lou faaloalo tele, ou te faatulou atu ai i lou nuu pele Salani ma ou aiga e fia ou te mitamita ai i totonu o Salani. Tulou ia le afio o Aiga Sa Fenunuiavao ma la outou Tama, tulou le afio o lau Afioga i le Gafatasi, lau Afioga Fuimaono ma ou alo tutusa, afio Leasiolagi o le Saoao, afio Sifuiva o le Matuaalii, malui mai oe le Tofa i le Matua Tofuaiifoia ma le mamalu ia Sataeleava ma le Fuaiala.

E faatulou atu i auauna a le Atua i totonu o lou nuu pele o Salani, faatulou atu i faletua ma tausi, Tamasailau ma le aualuma, Tupua ma le aumaga aemaise o ni o tatou paolo tupu e malu ai lo tatou nuu. Le fuaga o lalovaoa o le tatou nuu i Salani, o ou paia apoapogata na, ia ao ia ma sunui i le tupua i Salani ma Alofisula, o Tuani ma Pitovaoaiga tainane Lotomua ma Fogavaiuta.

E faatulou atu i le afio o Sa Alaalatoa ma le alo o Samalaulu, alaatai lau fetalaiiga Faatili o le Tapunuu, alaatai lau Tofa Gaopoā o le Tulafale a le Tuiatua, alaatai lau tofa i le na faialaga, lau tofa Letoga Ulupuaa ma le mamalu i le Faleono.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

Susu lau Susuga i le Toeaina Faatonu o le Sui Taitaifono o le Ekalesia Aoa, lau Susuga Tunumoso Iosia, susu susuga i faafeagaiga i lena itu o le vai, faletua ma tausī, tamaitai ma saoa ma le malosi o le nuu i lo tatou nuu Sapoe. Ae le faagaloina ou aiga pele.

Tulou le afio o lau Afioa i le Aloalii Muagututia, afio Tufugafale ma Seugalii ma le mamalu i le faletolu ma le lauti na laulelei. Susu susuga i faafeagaiga taulagi i lena itu o le vai, le mamalu i faletua ma tausī, tamaitai ma saoa, Tupua ma le aumaga ma le fuaga o lalovaoa ma lo tatou nuu pele o Utulaelae ou te nene ai.

E faatulou atu i lou nuu pele ou te matanana ai Salesatele i le afio o lau Afioa i le Alo o Salamasina, o le uluai tupu na Tafaifa ia Samoa, lau Afioa Tapusatele ma ou alo, Faleafaga ma Alaifea, afio alo o Leilua o Fonoti ma Sialea, afio le Aloalii o Paitomaleifi, susu Leota, alaalatai le Aiga Talimalama, alaalatai le tofa i le matua o le tama a Malaelua lau fetalaiga Faleafaga, le mamalu i le nofoala. Tulouna le auuana a le Atua ma lou faletua o lo o faanonomanu i le alaalafaga, tulou faletua ma tausī, saoa ma tamaitai, Tupua ma le aumaga ma le fuaga mo a taeao, aemaise ou aiga peleina i Salesatele. Ao ia ou paia i Taoaluga ma Taoalalo, o Faga ma Siuofaga o Tuavao ma Maota, o le tupua i le Malaeoletalu.

E faatulou atu i si ou nuu pele Siuniu, e te itiiti igaga ae te lave i mala. Tulou le afio o le taofia a Moetalalelei, Teo ma Meleisea ma Togaiulupe, alaalatai le tafa Salalemosooi, Taelega ma Lauvao ma le nofo a ituaiga. Susuga i le faafeagaiga aemaise le Susuga i le Peresetene o le Paranesi ma lou faletua, o lo o faanonomanu i le afioaga, faafetai tatalo, faafetai anapogi. Faletua ma tausī, tamaitai ma saoa, Tupua ma le aumaga ma le fuaga o lalovaoa, ao ia ou paia i Malae, o ou paia na, o ou faiga na, o ou sa na ma ou ao na, lou itumalo peleina o Falealili Sasae.

I le agaga maualalo ma le loto faagaetia ia te au e momoli atu ai lau faafetai, faafetai, faafetai tele lava. Ua tali felagiai le pepese o fetu o le lagi ua saafi foi le masina ma ua liliu le alo o le la, ma ua sisiva i luga o peau. Aisea? Ua ou atu e, atu e, ina ua faaolo le sau i la outou tofa faatupu ma le faautaga sailimalo. Pale ua pale, ula e ua ula, ua ou sei, ua lalelei. Ua se ie ua folasia i malae, se ua ou titi ina ua e topule i lou faatauvaa. O la outou faatofalaiga ua ou malu ai. O ai ea lou tagata vaivai ua afe ai le alofa ua faamafola lou agalelei, ona o se tautua le lava ma le auu ua e sii au i le mauga e pei o le upu ia Asomua. Le vai sa ota momoo i ai ta te fia inu ai, se ua ou inu ua ou malie. O moomooga faalupe o naumati i lo outou soifua ma lou ola, ia tapuaaoina e le agalelei o le Atua ina ne i ota momoe ma manu ae sau mala e atiae. Lou itumalo peleina, lafo mai laia o lou faatuatuaga. Ou te matua talitonu o le a e tapuai faanonomanu, po le fala, ula le mulila ma tui le mulipapa ae se i ou molimolia la outou tofa ma le faautaga, so ta sao ia manuvao mo se atinae manuia o lo ta itumalo. O le mea e lelei i Apia, e lelei foi i Falealili Sasae.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

E momoli le agaga faafetai o lenei itumalo o Falealili Sasae i lau Afioga i le Palemia i le tofa poto ma le tofa loloto sa saili i le Atua le tofiga o lau Kapeneta. O le tala a lenei itumalo, e lagolagoina ma le atoatoa ua sao le tofiga ua tofia ma valaauina ai sui usufono mamalu e pei ona tofia nei. Se ua faafetai le toa malo sailimalo mo Samoa aua se lumanai manuia mo Samoa mo a taeao, ua malie le faaaloalo ina ua e topule i se tofa faamatua moepo ina ia vaeluaina lenei itumalo e pei ona i ai nei, o se faiga ua matua faatauina e lenei itumalo, ua mafai ai ona faia lana filifiliga i se tulaga saoloto ma le fuafuaina lelei i le tagata o lo o faia le tautua i le aiga, o le nuu ma le Ekalesia.

O le tatalo, ia faafualoa e le Atua lou soifua, aua o lou olo ma lou malu o le Atua, ia tului ma faatamaoigaina lau tofa i le alofa mutimutivale, aua ua iloga mea silisili ma le tauleleia ua faataunuaina ma ua taunuu ua siitia ai le tulaga o Samoa nai lo le tele o isi atunuu o lo o i ai nei. A o le tatalo ma le faaaloalo a lenei itumalo o Falealili Sasae, lau Afioga i le Palemia ma lau Kapeneta, e faapito augafa sa matou faamatalaga i nisi o Minisita.

Ae le i tuu atua manoga o lenei itumalo, e fia faamauiina lava ma faaleoina le agaga o le faafetai i lau komiti filifilia o le Palota sa latou galulue punouai, o lea ua tini le faamoemoe. I ou aiga o lo o alaala ma papaaao i so o se tafa o Samoa ma atunuu e mamao, o uo ma aumeamamae, o uso ma tuafafine, o kamupani sa agalelei aemaise o si ou toalua faapelepele ma si au fanau toaitiiti e toasefululua, sa matua lagolago malosi i lou faamoemoe. Mai le taele o lou loto ma lou agaga, faafetai tele i lo outou lagolago. Faafetai atu i lou toalua ona o le taulagalaga i mea lelei, ua e unuaia ai au ou te alu i lenei mea. Faafetai.

E fia tuuina atu se agaga o se talosaga, masalo ua tele ma ua le ofi api a Minisita o lo o tusinga ai talosaga a sui usufono, ae toe faaopoopo se isi laupepa se tasi mo Falealili Sasae.

E fia agai se faamatalaga mo le Minisita mo Galuega, Felauaiga ma Atinae Eeseese lau Afioga Papaliitele Niko Lee Hang. E ese lou fiafia ina ua tofia oe e ave ma Minisita, aua o oe o le tagata lotu, e te alofa e faasafua lou alofa e le faatuaioia. O auala i nuu o Salesatele, Salani, Siuniu, Sapoe ma Utulaelae, e pei ona avatu le talosaga, pau lava le mea na manao i ai lenei itumalo, se i e afio atu e te tagai, ona e afio mai lava lea pule oe po o afea e fai ai. E le o se tala e fatu, ae i ai lou talitonuga faatoa talitonu lava Toma ina ua vaai. O nei auala ua ova i le 30 tausaga e le i faataina, o auala galue foi i Siuniu, Salesatele, Salani ma nuu nei e lima, e le i i ai ma se auala ua toe suaina pe faataina. Ae silafia, tasi lenei itumalo o lo o logologoa le tala o le talo o lo o sau ai, e le misi tailua vaiaso ma o atu i latou o lo o faia le aoina mai o le talo e ave i fafo a o le mea leaga o le le mafai e le faifaatoaga ona amo i le mea mamao ona ua eseese foi aso.

22 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)
2015/2016 ma le Tulafono Tau Faaofi o le Faatatauina o Tupe 2016/2017
- felafolafoaiga i luga o le faitauga faalua**

Ua uma foi ona mamate nai manu sa faaaogaina, solofanua, se i tulou, ua alu alu ua uma le malosi, ua toe foi lava i le amoina o fua o faatoaga i le main road e faatalitali ai le taavale. E tusa lava pe le faatina lau Afioga, tau lava o le sua ina ia sao ai se taavale e faamamaavega ai i si o matou itumalo.

FOFOGA FETALAI: Toe lua minute o le sui usufono.

Afioga FUIMAONO TEO SAMUELU TEO: O le escape road pei ona e silafia, tasi lenei itumalo sa aafia i le Tsunami ua uma ona faataunuu le taligalu, faamolemole lau Afioga i le Minisita e le i uma le taligalu ae le i i ai se taligalu i Utulaelae Sapoe ma Salesatele, ae maitauina i ia vaitaimi o le Tsunami le aafia tele o tagata tafafao maimoa mai fafo o lo o i ai.

E tatalo ai ma le agaga o le loto mauualalo lau Afioga pe mafai ona silasila ane ia oo atu i aso faigata, pe i ai se mea e mafai ona sosola ai i uta le nuu e pei ona talosaga atu ai. O auala galue, ia o le a taoto atu e fai i ai le fuafuaga potu aua le faamamaavega i o matou faifaatoaga. O moli auala faailoilo aua le fegasoloi o fanau aoga i le vaveao e pue le pasi, aemaise o tama ma tina matutua, e tuuina atu i lau Afioga faamolemole, e moomia ni nai poumoli o lo o i ai nei ina ia mafai ona avefa ma faamalamalama ala i taimi o feoaiga aemaise o gaioiga e fai.

FOFOGA FETALAI: Ou te faamalulu i le sui usufono mamalu ona o lea ua tatou taunuu i le tatou taimi manava, o le a faaauau le saunoaga, toe lima ou minute i le aso a taeao e faamaea ai.

Ia, e tele lea taimi o totoe mo le aso a taeao e faaiu mai ai le saunoaga a le sui usufono mamalu.

Ona o lea ua tatou taunuu i le siui o galuega o lenei aso ma tatou itula faigaluega, ae tatou te le i tolopo, ou te tapa le Afioga i le Sui Fofoga Fetalai na te faaiuina le tatou Fonotaga i se tatalo.

Na motusia Felafolafoaiga ina ua tolopo Taulumaga a le Fono Aoao i le itula e 7:03 i le afiafi seia aulia le itula e 9:00 i le taeao o le Aso Tofi, 23 Iuni 2016.